

雷經館遺集

譚延闓署籤




上海图书馆藏书



A541 212 0021 4455B

俞經館遺集

譚延闓署籤



序

畚經老人歸道山後十年文孫士卓就予請曰先大父詩文不多見今存一
二手鈔本凡若干首親友爭快覩而苦難徧及欲印行乞吾丈一言爲識惟
丈累世通家重之以婚姻於先大父生平爲人與造詣之甘苦類能言之親
切有味以視求彼達官貴人之諛慕浮詞以爲增重者不旣多乎哉且夫今
之達官貴人亦安足爲先大父重者義年義不敢辭謹綴數語如左公諱煥
章字成軒系出襄陽詩人工部裔也遠祖元輔公以明季進士官四川敘州
牧歷數世而家於今之萬縣祖養雲以選拔授富順教諭陞任江蘇安東令
父覲廷邑名諸生公少孤而慧數歲解韻語母夫人王督之嚴每歸自塾且
紡且課與弟煥南棠村先後餽於庠名藉甚時有二杜二劉之目謂公兄弟
暨先伯紀三私諡端敬先府君吉六私諡端介是也日益以文章道義互相切劘

相率而遊於熙臺朱先生之門時陳緝菴徵君主萬川講席邑侯長沙樹堂

卓懷

馮公儒學隆昌宗山

秦衡

范公皆負海內經師人師之望風流宏獎得

人號極盛而於此四君子間所以陶冶而期許之者尤摯且厚無何棠村以秋試被放嘔血死端敬先生舉丁卯賢書第一再上春官不第旋以哀毀卒公且潦倒名場垂三十年至光緒丙戌始選授銅梁教諭先端介亦於次年任簡州訓導不兩稔而薨於位豈所謂天公忌才而六親同運者非歟嗚呼何數之奇也乃公氣不稍奪仍復再接再勵力戰秋風及猶子翰藩以拔萃登癸巳鄉薦報至則大獲謂此可慰亡弟於地下所異者義年以羣從弟子每負杖侍竹林遊僅弱阿咸三歲許何物造化弄人竟遲我十年兄弟兩三人

人

乙青立青兩弟中本省鄉試予捷北闈

乃上與老阮僭齊年之誼至是而公亦輪甲

子一週久矣辱書馳賀略謂八十老嫗倒翮孩兒猶學新嫁娘爭畫眉樣入

時夕陽雖好已近黃昏尙敢作龍頭老成想耶顧講學半生門下士之掇巍科拾青紫以去者指不勝僂而慰情聊勝以年年送人作郡之身今亦爲人送作郡又不覺破顏一笑殊君家弟兄不可當予以堂堂太親翁資格於乙青復忝一日之長若立青則末座年少直吾族慘緣行耳亦竟咄咄逼人俾予不得不退就年家眷弟之列君達人或有以處予以予究何以自處耶然自是吾兩家一段科名佳話吾似紀三而棠村似吉六不於其孫於子孫醜酒九原大足爲有才無命者吐氣吾言雖謔吾心滋快已蓋其喜之深而不覺其言之長也迨癸卯禮闈一別官轍東西分飛勞燕至壬子七月公遽以疾由嘉定教授陞任乞歸終於里第春秋七十有七遺著種種均待續刊茲集其一也公嘗謂文字小道但語語要從心坎中流出方有我在勦襲雷同人人皆等身著作矣何尙焉又謂作者競欲傳夫傳豈易言者卽足傳矣而

有幸不幸在吾第求免覆瓿示子孫耳此中三昧夫子固自道之游夏奚贅
一詞哉見淺見深是在讀者義年嘗鼎一臠如飶百饑以質進高亦許爲真
知味者否然而擲筆惘然吾家之家珍集近且同兩弟極意搜羅成書訖不
知何日也噫中華民國十二年中秋前五日姻世愚姪劉義年拜序於盤山
別墅之小離垢軒

題辭

我昔弱齡好文藻往往郵詩乞削稿二十六年彈指間公歸道山我亦老論
戚公是丈人行論才公亦負時望廣文官冷詩不寒管城子有食肉相公之
賢孫我之甥郵公詩卷來燕京謂公於我有夙契同年同里窺生平况我少
也受衣鉢風騷旨趣早領略校正魯亥箋蟲魚敢以不敏負所託經冬復春
無停時勘畢還甥剗劂之公詩清老豈待贅後之覽者當自知

姻愚姪謝樹璧拜題於京師宣南寓齋

書後

萬縣杜成軒先生耆老於學篤行植品爲縣士大夫所嚴事凡一時勝流有聞於世者非其羣從媼故則弟子也予舊與其猶子詩笠論交今文孫進高復以畬經館遺集見示得竟觀之大氏壹意獨造不事規摹而風骨清迥滌盡塵坌其源於道義者深也進高天資明悟嗜學妮古詩律書勢均守家法持此不懈殊不能量其所止杜氏爲有子矣因附書於集後乙丑十月朔奉

節劉貞安

畚經館遺集總目

遺象二

遺墨四

年譜一卷 榮哀錄附

詩鈔一卷 和作原作附 凡二百四十首

文鈔三卷 凡一百又九首

駢體文一卷 凡九首

聯語一卷 凡七十又一聯

較閱名氏

黎庶昌 蕤齋 評文

陳昌 世五 評聯語

左斗才 逸仙 評聯語

劉義年 峙冬 主任較閱

謝樹璧 菡莊 分較詩集

譚以大 直方 較閱

劉樹聲 乙青 較閱

劉貞安 問竹 較閱

陳濂 蓮波 較閱

王琨 海容 較閱



像 遺 主 館 經 畚



像遺庵笠姪其及主館經畚

畚經老人自述年譜一卷

附榮哀錄

畚經老人自述年譜

道光十六年丙申一歲九月十三日丑時母氏王誕小子於萬縣城南縣署之東街老宅

宅爲嘉慶間族人所售今轉售於天申當郭姓

者是年先考覲廷府君以郡試第一人入泮

丁酉二歲

戊戌三歲八月十一日弟煥南生

己亥四歲

庚子五歲從府君識字

辛丑六歲從府君受毛詩

壬寅七歲一日讀書晏起府君呼佃者龍大曰若明日將小擔來吾家某不勤讀書當隨着擔糞去小子遂潛入座竟日不出懼擔糞者携之去也午餐熟女僕強持出之坐上已遺矢矣

癸卯八歲曾祖母氏朱卒於東城新宅各房長幼男女齊集治喪嘗召術者殷躄子爲搏紙變鴿食火吐箋之戲余尙向母氏曰此邪法也

甲辰九歲府君有疾數月輟讀

畚經老人自述年譜

乙巳十歲正月十三日府君卒仲父恪菴公延地師張協堂卜葬於五桐坪其地爲母氏王奩業袁門坳所易者也既葬母氏猶時哭諸室小子亦時侍側隨之輟哭乃去是年弟南病痘毒於臀上瀕危者屢後以羊肉湯愈之遂偕從季父巽齋公讀值成皇帝六旬萬壽各廟會街衢慶祝一月極闐咽繁華之盛十月季父游宦河南遂罷講

丙午十一歲與弟南從再從伯熙亭公受學於東門吉人從祖宅五月東郭災延燒南郭入城予老宅門外爲瓦礫場門內無恙火既滅其臥室竹簾爲樓迹之則榱桷成炭而竹簾如故也人以爲母氏節孝致有鬼神阿護云丁未十二歲與弟南從姚薰南師於外大父王燮齋公宅是年外大父卒伯兄煥房亦殤年十四矣

戊申十三歲與弟南從萬壽亭仁培師於王黼廷舅氏家

己酉十四歲與弟南從譚祖錫師於舅氏家習時文試帖

庚戌十五歲與弟南仍從萬壽亭師於舅氏

咸豐元年辛亥十六歲與弟南從萬子千元俊師於吉人從祖宅同學者劉君紀三家歲試冠軍

壬子十七歲與弟南在舅家從李月齋兆庚師時文外兼習詩賦師善講說每授陳文一篇余聽畢卽能成誦是年大母王卒地師曾矮子卜兆於黃泥地曰當發次房以大父論之則恪菴公爲次以大母所生論之則先考爲次季父巽齋公曰無論何房有發便爲吉壤遂窆

癸丑十八歲與弟南初應童子試因與李南岑向陽李偉仙宏圖王會之輔朱鏡溪心田吳定臣安良王式九熙八人通譜南岑會之卽以是年入泮

甲寅十九歲娶於程氏邑庠生海珊公繼洛仲女也

乙卯二十歲從李月齋師於舅氏左堂宅邑侯陸次山瓊浙東名宿每月詣書院課時藝外別試雜作曰遙課

初立以國士無雙賦置余冠軍弟南亦以擬杜少陵諸將五首七律前列於是兄弟皆有詩賦名

丙辰二十一歲十月院試典試者爲侯官鄭九丹瓊詔太史試夔六縣詩賦取余第四人棠村與焉正榜出兄弟

皆獲雋遂以新生錄科卽以第五人補廩童試水號面覆創於夔棚後各省皆仿行之是年棠村完婚朱氏邑副

貢熙臺仁字公女也

丁巳二十二歲從朱熙臺師於虎頭寨治舉業同門者爲姚在堂本地譚翼青雲鵬譚資生一元王介侯文炳王

式如佐文芹溪廷藻並余與棠村而八其應童試者則汪次峰如霖王子才植枏施虞廷惠王仿之懷本甘龍淵

泉諸人後本地選拔雲鵬佐如霖與余中鄉試植枏等亦舉茂才一時稱極盛焉其服官者翼青爲江西知縣芹

溪爲貴州縣丞式如選酉陽訓導次峰爲眉州學正劉吉六家謙由歲貢爲簡州訓導同學時猶未及冠也

戊午二十三歲與棠村同赴鄉舉依朱熙臺師寓成都南聖壽寺內殿王介侯王式如張新菴積厚張敦甫裕厚

及中表王會之與焉其外殿則魏小珣喬梓及其張甥開絲黎栩集及其門人鄭子喬外臺則開縣張儀雲李海

樓儀雲氣宇英發爲沈秋帆西序廉訪宅相後果作宰江西是秋回萬縣與儀雲諸人同登嘉定凌雲山東坡讀書樓丙寅有追憶詩

己未二十四歲同棠村再赴省試與謝雨亭詩章謝春帆詩正程庶唐繼勳文芹溪同寓城南梓潼宮時劉綏之

衍福寓下殿能以視目療人疾有某姓者請視劉爲言其平生過惡其人痛哭悔改疾亦旋愈於是綏之醫名大

譁七月棠村子翰藩生九月自省回萬道出叙州時於匪藍大順等已破筠連高鞏等縣叙州戒嚴萬軍門統兵

東下尙未成行予與同人倉皇解纜去聞次日賊旗臨江矣

庚申二十五歲賃小南門老宅於恒德當爲季父巽齋償債四月移居小西門王宅六月大水王宅街門淹及丈

是年舉拔萃科學使黃樹階侍郎賞余錄科策題頗屬意焉後姚本地以賄得余遂失選

辛酉二十六歲與紀三棠村會文於禹廟之觀音堂五日一聚廟僧懶雲三空和尚能詩亦邀劉丈敦山采莖並起詩

社時有唱和潢池人李春榮雅慕之掃凌雲閣煮茗以待夜必小集過者輒指爲名士廬是年滇匪李短辨竄蜀

鄉試停科萬邑遂設局籌防總辦南北岸防堵縣公余濟清居寬另立城守局於公樂堂禮子專司會計其分任

局事者爲棠村紀三及柯瓊階隆埠賴玉峯資穀王煥齋廷章於是置四城長修城梁安墪道建砲臺哨樓創製

旗幟刀矛鎗砲鍋帳藥火彈丸招募五百營勇以霆營副將馬輔廷統之一月而畢在局治事無間晴雨日唯歸

家餐宿而已臘杪除日大雪猶使棠村與汛官梁卓齋正超登都歷峰勘寨築關險以固城防故明年賊至城守

得以無虞

同治元年壬戌二十七歲張匪五麻子藍大二順先後過境繞城而去及二順回竄縣屬之紅谷田馬輔廷定國全軍皆歿六月縣公張鶴儕琴從周達武圍鶴遊坪周逆紹湧於開縣後坪壩殲焉川東以平縣公上其事前制府駱顓門乘璋保余兄弟以三班訓導並戴六品藍翎餘俱不與是年十二月撤局計費一萬餘金其日費月費歲費之數皆榜之局門申之縣署無遺無濫故軍興以來各縣皆有稟控局士之案而萬縣獨否核實故也

癸亥二十八歲初授徒於南津程氏葉樹恒蘭坡後程鎮少相後與焉縣公張鶴儕過訪路人異之

甲子二十九歲仍館南津七月與弟南同赴省試南病於寓瀕危延彰明老儒萬靜軒治之七日而瘳臨行猶書丸劑歸而攔之十月室人程舉子翰屏深夜被寒胞衣不下數日而卒子亦尋殤

乙丑三十歲三月弟南以舊疾作月餘不起十二月余繼娶邑太學彭晉階維觀仲女爲室時待嫁二十五年矣丙寅三十一歲前儒學范宗山師泰衡於書院開局續成萬縣志陳緝菴朱熙兩師任分纂余與劉敦丈劉紀

三王升甫同分校兩月竣事繁難乃命移居水竹壩內子彭病足數月始瘳七月再赴省試仍被黜落而紀三領

丁卯三十二歲母氏以縣事繁難乃命移居水竹壩內子彭病足數月始瘳七月再赴省試仍被黜落而紀三領解去

戊辰三十三歲紀三入都其門人易景唐張天樞劉家讓荆樵及程先培子木皆來贊六月母氏病瘳復痼諸醫

束手予日集方書自治亦不效遂以十月八日終養予以哀減夜膳後竟不復是年十二月長女廬生生以其在居廬時也後自名曰翰文

己巳三十四歲三月葬母氏於五桐坪道由屋梁坪下尾牽不力舉舉者其勢若飛幸而未墮至今猶心悸也常戒子孫以殮親者棺勿過大葬親時人勿稍減遇有坡坳尾牽宜加多爲要是年文化舒伯安來就學與姪藩同習時文出筆卽順左斗中左鴻才左鴻壽詩勛皆來贊

庚午三十五歲王壩形甫王襄季衡王綸經甫王用九治安程鎮來就學以劉五炊爨於魏室是年六月次子翰聲生生之前夕有肩輿來謁者持金聲名帖投刺遂以名之

辛未三十六歲館在東廂王用九去館王壩之弟壩崇甫與舊學者四人俱來左鴻壽附之至院試王壩王襄俱獲隸

壬申三十七歲館在東廂程鎮王壩朱壽康治安羅有翼劉高獄左鴻壽劉聲華從弟煥旻煥貞煥良皆來學是年十月三子翰後改漢標燦漢標生命元缺火故取南方亦帝之名以補之

癸亥三十八歲携從子藩讀書於萬壽寺汪次峰如霖蔣海方步瀛皆來會是秋如霖獲選予仍荐不售是年內子病弱購一牝牛乳之兩日牛斃裹帷而瘞之病良已

甲戌三十九歲課從子藩讀書東廂程壩朱壽康來伴讀舊門人易景唐左斗中從弟煥旻入泮旻乃在學加功

兩月而捷獲者也

光緒元年乙亥四十歲受杜德光謙甫聘教其弟德崇雲生及甥左秉銓量夫後改權與從子藩而三時翰聲亦以五

歲童子從入學德光母見而奇賞之是年王墀彤甫呈文四閱月隨舉京兆試予仍鄉荐不售

丙子四十一歲築甯經別館於居宅之岔口來學者十餘人程鎮朱壽康譚二典鍾九鵬雲衢易昌鑾汪範疇王

光奎從弟煥貞煥綸從姪翰藻翰芹皆與年遠亦難盡憶其名是年為從子藩娶婦劉氏邑名士劉敦山丈秉莖

女孫也是科仍荐不售門人葉樹恒舉於鄉左鴻壽亦登北榜

丁丑四十二歲參學者較去年有加其院試入選則王綸譚二典程墀及從子藩是年仲女興楣生後自名曰翰

武

戊寅四十三歲館徒日衆新增者有符榮貴嚴其霖程德雖胡年豐穰生胡年春田興鑑從姪翰珂翰垣輩若而

人不盡記是年與劉紀三同續縣志百篇上之大府

己卯四十四歲二月與趙翼之尙同赴京師中表王式九熙約同人集三千金諷令入貲為宰時陶默存懋恭

由黔來京引見亦力勸之予以京兆試不售嗒喪而歸在寓之日謝紹唐詩醇常慎之溫九皇熊準堂俱稱相得

後準堂中式九皇卒於都門遂與紹唐駛輪回蜀有出都雜詠詩五十首是年內子在籍久不得京耗外有惡傳

怙而成疾危者數四長女廬生年十歲侍疾不解帶男僕陳二亦忠謹夜半延醫市藥無難色後至東城老書院

懇陳緝師診治始愈而門人劉高狷日陪緝師臨視尤爲難得

庚辰四十五歲舊學諸生仍請開畬經館於啞口新贊者爲程天錫光延文之中文之和熊榮生劉隆祀從弟煥

瀛是歲易昌鑾金門王光奎 棗星鍾九鵬杜煥瀛胡年春俱入學而余於七月患血痢三月館政不廢後竟不藥

而瘥是年歸猶女於程仁安心德

辛巳四十六歲創議改建宗祠於釣龍灘老祠後之鴨蛋坪畬經館仍住二十餘人程鴻藻爐青陳興德迪九陳

興讓柏森文化舒文德林李常安朱鏡溪子從弟煥棠皆與

壬午四十七歲程心德劉耀琨王贊勳禹思程先翔從弟煥墀從姪翰穆從姪孫嗣襄等二十餘人咸在七月以

鄉試赴省諸生公餞於朝陽寺揭曉仍荐不售

癸未四十八歲畬經館人復增蔣寶琨少選謝禮鑿味根改 名炳勳史錫經醉六郭永祺從弟煥楣等院試時程鎮程鴻

藻胡年豐蔣寶琨劉隆祀文化舒從弟煥墀皆入選姪藩亦得擬拔門墻稱極盛焉

甲申四十九歲畬經館生徒如舊其後中式者爲陳馨德文化舒劉樹聲及姪藩選拔者爲程鴻藻入泮者復有

謝禮鑿文之和程心德陳興讓史錫經從弟煥楣諸人是年冬月有分纂邑志之役其明年將議北上於是館堂

罷講人以爲風流歇絕焉

乙酉五十歲王輔子木暨弟禹思恭三厚徵及史朗齋助資入都乃與趙翼之煥之尙章王肇侯恭同行謁選以

海防八成花樣掣簽第二五月分應選溫江教諭以註冊之日京官印結到部稍遲堂官放衙不果遲二年始選時翰聲病手疽經年市海上藥愈之

丙戌五十一歲畬經館門人仍來就學弗許惟自課三子讀聲腕初愈而無力教以左腕習書尙能成字是年爲程仁安修族譜兩月歲事姪藩朝考失選繼考八旗教習分校鑲紅旗由是留京供職

丁亥五十二歲六月部選銅梁教諭九月爲次子翰聲完配劉氏簡州訓導吉六仲女也是月卽同廣東典史朱綏甫鴻猷江西典史王澤青忠赴省驗看領憑冬月十九日到任三子翰燦隨侍入銅梁

戊子五十三歲正月內子同朱姊携眷至銅梁十二月回籍歸長女於謝禮熙旭初後改樹藩時全眷皆行惟燦煊二子

留署二月府試舊例六學監場至武試畢棚始歸在郡約住百日而各學又有本縣本棚送考之例余邀監場者請於府憲以送考之員作監場之員先洗首縣代表繼則面陳府憲王藝圃遜文遂改前章著爲新令同人咸稱便焉四月赴省鄉試寓文翰丞之藩成都學署揭曉薦不售

己丑五十四歲正月兒聲在籍病歿遂於二月送府試後携燦煊二子旋里三月始率全眷返銅七月再赴省試訪劉吉六於簡州信宿而別至省復寓文署仍荐不售

庚寅五十五歲姪藩自京來銅梁越三日而季子翰煊殤暫殯西門外書院田莊是秋藩奉母率妻子回籍而內子大病矣劉吉六君卒於任遣劉么持賻奠之

辛卯五十六歲再赴省試與姪藩同寓文署仍荐不售

壬辰五十七歲携眷回籍遂葬子煊於鐘鼓樓欄磚灣議以六月爲子燦完婚謝氏雲南鄧川知州紹唐仲女也期未屆而學憲抵瀘之電音至星夜赴渝是冬子燦亦婚畢入泮內子携全眷來銅梁在途疾作至合州僑寓河干旅舍醫治三日予始挈之歸銅梁三月餘始瘳

癸巳五十八歲姪藩選溫江教諭奉母到官由銅梁至省住十日卽行是秋中式仍送母妻來銅梁子身北上至銅梁之夕被盜竊去皮衣銀物刻卽報縣縣君秦俊臣當囚總班六人不一日而人贓全獲矣本年初次俸滿驗看借携子燦赴省鄉試因往溫江旋省途中遇雨受寒抵寓卽食蝦麪次日病瘡醫治無效有薦以薙髮者遂如其言携葉菸一匹汾酒四兩米酥一枚以往於玉紗街整容室遇之其人約三十許見菸酒卽知爲治瘡者兩不語言但坐我於前檀凳上彼卽持米酥書符因以授余立余座後飲酒啜菸若爲余理髮狀有頃忽拍余肩大呼曰走遂踉蹌出不返顧而去抵寓漫食米酥而病如釋越八日入場仍荐不售歸銅梁時邀從弟對山猶婿易藩丞昌炳偕來款讌數日得姪藩中式榜信而後去去七日長孫嗣崧後改士卓生卽是年九月也門人陳馨德亦於是年中式

甲午五十九歲七月將携子燦再赴省試飲於胡侯篠玉饒筵而瘡作不果行數日服教堂金雞納霜一劑而愈九月代理安居學記滴值皇太后六旬慶典奉府檄委散郵銅安孤貧是時門人張汝弼李樹煊中式萬縣門人

文化舒亦中式得報之前三月從子藩亦返自京師奉母由銅梁回任

乙未六十歲庠內諸生邀同邑紳多人釀金爲壽力辭不受唯於府試時稟請府憲改修試院號舍內長橙爲獨坐以免爭號諸弊府憲王卽以修試院後室餘資成之於是各棚首場無紛紛索號者矣

丙申六十一歲十一月科試預考拔場門人左榮輔入選

丁酉六十二歲縣試銅梁安居武場武童以學田局士有虧久而無成不肯騎射范侯

名德繼
字叔研

許以不填冊費並

簽拏秦秉鈞衆乃上馬是歲科場因病未赴程仁菴試歸來銅十日而別

戊戌六十三歲八月十二日大足民余蠻子棟臣因靈官會滋事團首蔣翰臣之子爲教堂所戕棟臣遂與衆擊毀教堂燒龍水鎮出至銅梁十五里之土橋場有衆六百擄榮昌縣荷包場之華司鐸以行無敢擊者使人函責縣官以焚教堂交司鐸等事局士乃遣八人出議和許以犒金五百不果交棟臣遂率衆抵城屯老關廟是夕人情洶洶同寅率士民守梁余亦坐鎮西城巡警達旦城中有內應者匪黨卒燒教堂取黃司鐸索賂金而後去黎明匪黨唐翠屏一股數十人據西郭壽隆寺聲言入城取司鐸亦與傳餐送食犒錢二十緡始行九月朔本府李奉如太尊來查教堂司鐸案適范縣請防之兵亦至人言本府來勦銅梁於是局紳且慮其摘縣印而紳士受禍也星夜調集鄉團數千人入城護守縣署幾成民變本府令余與隨員李鶴亭調停數日乃札隨員劉思慈暫行代理范縣仍同辦教案不交印稟於督藩指請李篠青接署初五日本府啟行余送之郊外三辭而後返篠青亦

於十月來銅梁是年八月十九日彭室携眷歸抵萬卽病養疴於仁菴家十日乃移寓澹園九月次孫嗣衡生余以十月下旬回萬歸季女於謝樹椿西漁太學詩敏銘齋仲子也

己亥六十四歲正月由澹園回水竹居留全眷守宅余獨回任以彭病猶未愈也七月赴省驗看兩至溫江十月彭室卒於故里

庚子六十五歲回籍治彭喪五月十六殯彭柩於五桐坪六月始葬予仍單車回銅梁道出曾家坪省墓與旭初

西漁在高梁祖餞而別七月長孫女嗣周生後改名瑩

辛丑六十六歲命翰標回籍修彭墓事畢而返

壬寅六十七歲携翰標仍赴省試八月十四日辰刻將入第三場忽傳紅燈教起四城閉門冒險入貢院場畢卽

與謝少甫詩杜戴用侯程仁菴謝蓉初樹階旭初黎青樹屏石生運麟及翰標九人倉皇登舟過眉州訪汪次峰

守城者局門不納遂至渝州宴別同舟於肇慶旅寓回銅梁未久卽得中式電信於是專差上省填親供贄房師

李少洲蘊華皆翰丞姪藩紀其事在銅梁宴客一日請咨會試留家眷住銅未歸

癸卯六十八歲正月次孫女嗣銅生後改名昭由銅梁起程回萬縣適姪藩新遭母喪僑居西城外熊宅不便宴會聊

拜親友卽同陳小倉王琨海容趁民船至宜昌易輪至漢口再雇馬車二日抵信陽復肩輿至確山隨帶馬車行

一日復肩輿行二日仍上馬車抵汴已上已矣三場畢返漢養疴及返銅梁乃瘳

甲辰六十九歲應白巖學堂聘由銅梁返萬來學者八十餘人任教習者王肇侯史韻甘封榮鄭希文及翰燦也
乙巳七十歲仍住白巖聞是年有鄉試生員來學者二十餘人欲童試者八十餘人後鄉試忽停童試獲售者八
人張龍驤春霖任瀛海運向士高南州朱勝義毅伯余楚翹黃倬馮春潭謝濂吉士是冬往銅梁交卸留眷於萬
重修族譜刊祠堂碑記

丙午七十一歲赴省驗有推升嘉定府學教授二月到官三孫女士昌生後改名琴福芝泉潤太尊留辦府中學三月
開工監督工程四月返萬覓劉乙青代辦白巖學堂仍返嘉十月福調潼川又返萬是年姪藩引見至江西盡室
以行

丁未七十二歲監督萬縣中學嘉定專差來聘二次皆不就是年學生百餘人各科教員皆備正月翰燦北上
是秋姪孫媳賴氏歿於漢口乃命佃者李大喜搬柩回籍葬焉

戊申七十三歲福府再聘長嘉學辭不赴九月始返携眷隨行至學署則山水林麓別有洞天日課諸孫讀不問
學校事是歲姪藩署宜黃縣冬月光緒皇帝慈禧皇太后升遐詔哭臨三日

宣統元年己酉七十四歲曹銘太尊委任復選所管理員復委查樂山縣視學湯蘇民案段榮嘉太尊委查夾江
縣視學彭贊堯案榮縣肅及貢井縣丞吳搗參案保送優拔生五十餘人赴考獲取四人是年五月姪藩歿於宜
黃縣任

翁經老人自述年譜

一四

庚戌七十五歲段太尊委查樂隄榮威升斗十二日而歲事姪藩樞歸於萬縣五月葬五桐坪製明倫堂楹聯於柱刻學廡題壁詩於堂側豎之碑

辛亥七十六歲三月告假回籍省墓以教授印上本府兼攝六月電催回任余料其以學務事相屬也稟請開缺遂不復返八月成都爭路事起而黎元洪反正一月之中各省響應者十餘起四川亦殺趙爾豐督立尹昌衡爲都督萬縣推巡防營統帶劉漢卿爲司令長城鄉皆豎白旗反正此十月初五日事也居人紛紛上砦次日余亦携眷寓冉家灣謝仙莊宅隨詣武聖砦築室三間以備不虞迨臘杪乃於二十二日返縣稍卽安焉

附榮哀錄

中華民國元年壬子七月畚經老人卒門人私諡曰文肅先生於時四方來弔輓辭可誦者多茲節錄如下

賴智侯 慧臻 輓

遜世有同心怕浩劫難逃易簣君徧先我死

訂交從總角痛知音已邈碎琴誰更比予悲

賴松舟 作楫 輓

致仕逾古稀解組歸來琴牀高臥憑松牖

感時悲浩劫箕騎遜去詩卷長留在草堂

謝蓉初 樹階 輓

蘇子瞻真古文大家數西蜀人材儘容此老稱名士

王陽明信理學嫡派看東瀛祖述敢薄先生是宋儒

程爐青 鴻藻 輓

民生於三事之如一憾我君親未報已辜厚恩又道先生歸去也

附榮哀錄

一

附榮哀錄

二

年不滿百憂常懷千際今禮教日隕愈思老輩敢云文不在茲乎

朱綏甫 鴻猷 輓

會經老人輓朱熙臺師聯語爲邑難初平共賴老成維士習不下若干年後綏甫又略易數字以輓舍經老人也原文見聯語中

先生繫風俗淳澆民國初基共籍老成維士習

此日是斯文絕續大雅不作誰從正學起吾衰

謝旭初 樹藩 輓

藝苑老英雄讀工部文章景仰泰山瞻北斗

草堂詩弟子求襄陽遺稿縱橫熱淚灑東牀

謝西漁 樹椿 輓

經橫絳帳庠侍青氈絕學仰伊川也許遺書傳顯道

翁羨冰清塔慚玉潤誅文成蘇子又揮私淚哭祁公

謝石生 運麒 輓

公是洛下耆英晚歲傳經鹿洞鵝湖存正學

我亦蜀中子弟他年讀史儒林文苑拜先賢

白巖書院諸生輓 向士高撰

善誘本循循憶昔授課白巖面命耳提有誰不倦如夫子
感情非泛泛卽今緬懷絳帳琴亡劍渺遺稿空教讀少陵

銅梁縣諸生輓 左榮輔撰輔字勳臣銅梁人

馬帳善傳經座擁春風澤遺巴蜀三千士

鴻文堪壽世悲深秋雨淚灑巫山十二峯

嗚呼先生之生於世七十有七年學爲人師行爲世範履蹈中和操修美善風儀與秋月齊明音徽與春霞等燦
組織仁義博通經傳華實茂榮古今淹貫講學則辨析精微屬文則藻思宏贍故士林仰爲楷模教法嬈於胡瑗
歷任廣文之官其訓誨之肫摯規律之端嚴實足開蔽蒙而式浮濫憶先生之秉鐸於銅邑歷年最久沐教之士
最多以古義相切劘以正學相磋磨況素擅詩古文辭摛藻若春華馳辨若濤波實淵源於震川望溪而規撫乎
少陵東坡加以博綜掌故之繁願訂正韻字之淆訛九流兼涉百家旁羅其學問之恢宏猶浩乎若江河豈但制
藝之純雅足爲互古而不磨繼前賢守先覺上闡程朱之妙理下供後學之觀摩登龍門者悉爲名士列馬帳者
多掇巍科至今追思教澤實同於巴水之淵深而巴嶽之嵯峨故宜享大壽綏晚福而上擬乎九如之歌慨自新
學之幟盛也舊學日以衰微歐美之文明灌輸者愈多而孔教尙形其阨危經典之諷誦旣廢聖道之信仰益稀
孰肯保存國粹而與舉世之風尙相違若先生以巨儒碩望在蜀之東實靈光巋然而崔嵬篤古守獨正抱扶持

附榮哀錄

四

名教之苦衷而爲學者所皈依何爲遺棄人間遽驂玉蜩而高飛豈厭舉世之混濁遊閬苑而不歸歎老成之徂謝能無扼腕而歎歔生等或執贊門下受益最深或與令嗣君赤仙聯文社相契尤摯粹聞訃音曷勝驚泣望巫山之雲兮黯淡聆川江之水兮嗚咽痛碩果之云亡何天之一老亦不憖遺際此秋風之蕭瑟秋氣之爽適義當匍匐往弔而瑣務羈牽不勝忸怩第緘辭千里以寓一哀而已矣素靈不昧尙鑒此景慕之微忱與悽愴之悲思

嘉定府各輓聯年久散失未及備錄

畚經館詩鈔一卷

畚經館詩鈔目錄

大竹道中酬謝矩堂從軍還滇之作一首

漫興二首

送李樹珊還里一首

送李又仙旋里二首

小寒後過程氏山莊一首

慶符行弔武明府來雨一首

輓蕭濬川方伯二首

春夜同棠村聽雨有懷紀三一首

送朱燕初還江陽二首

野鵲鳴一首

從軍行一首

兵軍行一首

畚經館詩鈔目錄

甯經館詩鈔目錄

題畫三首

題江村小景扇二首

題孤雁紅蘆畫扇一首

贈龔雲屏二首

喜李又仙至一首

閏中秋夜藉題竹影樓圖一首

白帝城懷古一首

癸亥正月五日喜李又仙再遇假齋一首

題李春榮小照一首

甫至南津高齋答舍弟唐俛見寄一首

奉謝劉一紀三作小印一首

送范雲吉比部之武昌兼應會節帥聘一首

贈黎秀山一首

題叔弟棠村寄園小景二首

之夔州留別棠俚一首

古雲安留別任華九蔡次賓楊慎齋兼贈阮曉岑之行一首

呈族叔峙三一首

輓范雲吉世丈二首

悼亡十首

暮歸一首

題司壽民丈瀾橋春思圖二首

王氏園中劉伯敬出尊翁畫扇屬題一首

劉敦丈新畫風雪運糧長幅一首

浣香齋同敦丈留宿因見李墨莊張亥白李香雪諸詩集一首

宕渠道中早發一首

奉步馮樹堂明府寄懷萬邑士紳三十韻

送劉紀三入都一首

謁杜公祠五十韻

禽經館詩鈔目錄

畚經館詩鈔目錄

萬里橋懷古一首

易母任孺人八十壽詩八首

題王澤山南游詩兼寄左逸仙比部一首

輓羅樹生丈一首

擬杜少陵古柏行一首

贈懶雲上人一首

浣香精室聞懶上人談鐵山之勝枕上次韻一首

和馮樹堂明府自壽詩六首

丙子伏日同中表王君鎮之式九左君翼丞遊鐵鳳山一首

己卯出都雜詠五十首

送范孝輿之官粵西一首

題尤綱堂二尹墓一首

題程賡唐姻丈生壙二首

題王保卿司馬榕村小隱圖一首

上已後三日由渝返銅道出安居黃紹瑛廣文邀游波崙寺一首

過簡州弔劉姻吉六四首

和馮協中少尉早梅原韻十首

次韻協中少尉魚樂亭落成適值九日梅開喜賦之作一首

和協中詠物詩十三首

和王葆卿詠物分賦四首

再題王葆卿榕村小隱圖四首

和韻亭夫人八十自壽詩四首

和王葆卿之官楚南留別銅安友人原韻四首

題廖益生明府歲寒集後兼送之任高州二首

和廖益生明府之任高州留別銅邑士民之作二首

和胡筱玉明府校試決科次韻陳清馨茂才獻詩卽送諸生試省之作四首

和李光甫廣文見寄原韻一首

和李郁堂文琴少府感事一首

渝郡同魏寶珊廣文登樓外樓一首

和李光甫五日同王練彝山長藍慶堂守戎泛舟瓊江觀渡原韻一首

和馮協中少尉卸任銅梁留別二首

做少陵七歌送協中少尉解任之渝州七首

乙未冬初協中往眉州省親遂入成都明年春由眉返銅挈眷隨資州任再以詩別依韻答之一首

詠古十首

詠銅梁八景八首

贈范儀甫廣文二十四韻

和李光甫寄懷原韻一首

程仁菴至自成都揭曉後送之旋里一首

南浦舟中留別程雨村舅弟暨仁菴旭初西漁三甥兼示嫖兒祿陔兩從子一首

和潼川倭郡伯來袞堂讌集原韻二首

和吳子修學使游招覺寺原韻二首

會垣驗看未竣久寓淨慈寺卽用前韻一首

龍泉驛道中一首

石礪渡一首

憫丐子一首

販牛歌一首

輿夫謠一首

讀王也樵大令聊園詩三十韻

賀王方伯新陟皖撫暨六十生辰四首

次韻盧芹臺香雪山館早梅感賦之作一首

奉酬謝仙莊農部重九後五日見壽之作四首

題李仲笏兵部焦巖仰止圖二首

題仲笏頤園幽谷自馨圖一首

題賴康平母夫人篝燈課子圖五解

節孝李母林夫人題辭一首

張式卿母夫人劉七十壽詩一首

題毛价人淵明歸隱圖畫扇一首

和夾江劉星南嘉州見贈原韻一首

張志和以前詩來和仍用原韻答之一首

登嘉定凌雲山追憶舊游用前制府惠瑤圃尙書讖集清音亭三十韻依次步之

張志和復和前韻再疊一首

羅印符孝廉依前韻見贈一首仍用其意

張子明廣文索和五疊前韻一首

蔭符再示和詩六疊前韻一首

印符詩請息戰七疊前韻一首

謝仙莊以詩稿乞政題詞奉答一首

九日陪福芝泉郡伯暨壽筓諸公子毛价人少尉尙雨村琴客登萬景亭一首

贈賈如虹一首

銅梁學署東齋用東坡韻一首

嘉州學廨題壁一首

和顏少眉同年留別都門八旗學堂四首原韻

六月十六日驟雨一首

題望眉草堂詩文集二首

少眉兩次和詩再疊前韻奉答二首

和胡性皆府佐見贈之作二首

顏少眉調達縣經徵詩以誌別卽和原韻六首

奎經館詩鈔目錄

畚經館詩鈔卷之一

萬縣杜煥章成軒著

大竹道中酬謝矩堂從軍還滇之作

回首東南介馬馳冥冥邊瘴 王師軍儲轉餉勞輸糴幕府持籌困度支
三載行營客有缺一官如水髮成絲
燧烽燹火滇池去不記隆中抱膝時

漫興

邊風吹羽檄浩蕩下渝州屠火成烈燄樓船擁上游瀘水聲嗚咽巴山雪成愁
南征問戎馬銅鼓泣荒邱
帶甲乾坤滿蒙恩將帥多六師奮神武百戰阻關河漢使新持節楚人夜聽歌
向來憂國淚不敢憶廉頗

送李樹珊還里

魚復浦南霜一夜錦官城外月三更可憐鮑子長爲別盼到魚泉又贈行
北館青燈挑積雪西山紅葉散冬菁
離筵曉撤鷄聲唱愁對天涯一雁征

送李又仙旋里

霜風昨夜下庭柯舊雨天涯奈別何水上夔門三百里馬蹄人影亂山多

白雲飛處望家山玉蕙金萱濕露斑萬斛愁懷不可說古旗亭上月如環

小寒後過程氏山莊

疲驢破曉出江鄉花徑風開引石梁別墅水從千澗落清明雪對一峯涼不堪狂客傾樽酒醉起清談話夕陽林下風光消受得梅花樹樹爲誰芳

慶符行弔武明府來雨

睢陽垂死一千載天青日白沉光彩浩氣英風不可以竟沒精靈幻身歷人海太原公子武聽濤意氣元龍湖海豪青袍換却黃金綬征騑萬里下晴臯鶴書一船作令蜀慶符山水如碧玉龐公屈志百里才傷心文翁但化俗高鞏西北敍瀘東枝峯蔓壑逼羗戎鞞鼓筠連震地起蹂躪桃花滿縣紅花紅百里無城郭蠻烟瘴雨驚風鶴皇穹不照我烝黎十萬生靈駭膽落簫蕭戎馬蕩三邦智者逃匿愚者降志士不籌和戎策公曷掛冠歸田宅不然退保敍州城七日泣援大帥兵義旗恢復西南傾豈復完爾疆宇全爾名而迺忘身殉難守爾土易子析骸民作堵事之不濟死以節嚴將軍頭常山舌但覺忠義泣鬼神焉知沙場埋熱血十月瀘水聲漸漸憔悴孤臣飲恨時家國萬里傳雙淚燐火千峯守一屍愛妾封夫人佳兒諸葛尙一門忠烈捧日心青山白骨同歸葬孤墳落日晝黃昏梅花樹樹瘞精魂真卿不屈李希烈契丹終留司馬門我聞厲鬼能殺賊數以精誠起魂魄竭來嘉敍觸烽塵蕩平氛殺豈死隔切膚啣血天庭乞師維皇降鑒下詔丹墀左授白旄右黃鉞日月照耀勤王旗草木爲兵兮

風雨如駛雷當天兮殷殷而來止虎張弓兮龍挾矢百物之精兮列如市月黑天陰陣雲似掃攬槍兮一彈指而

況陽虛馮總

戎桓侯張必

新戰死好共泉下忠魂淨雪中原恥嗚呼奈何死者長已矣徒令萬歲千秋配食雲舫

謝子

澄祀

輓蕭濬川方伯

不得膚功奏疆臣竟一棺六軍哭諸葛天意縱樓蘭楓葉吳江冷猿聲蜀道難好騎箕尾去楚水尙波瀾

應是蒼生厄將軍亦數窮大星落錦水征雁啼秋風虎旅奮餘烈龍章錫上公勳名成百戰青史幾人同

春夜同棠村聽雨有懷紀三

東風挾驟雨園樹落花飛芳草濕一徑淡雲愁四圍故人在遠道嗟余惜芳菲尙餘西窗約連牀肯暫違

送朱燕初還江陽

南天烽火達渝州故里雲山悵遠眸計日應聞歌奏凱受降城上月如鉤

君如吳季適新鄭我愧三生杜牧之縞紵因緣鴻爪印天涯車笠又何時

野鵲鳴

野鵲鳴辭故枝破巢安可留天涯去何之霜寒露冷塵沙苦劉義年曰脩尾蓬頭枯毛羽昨乞巢林一枝憐轉側

哀嗷石聲酸家山咫尺渺千里人去梁空室亦圯鬱鬱安能久居此野鵲鳴嗚聲促背人訴幽情但聽北風淒泣

天上續瞻烏爰止于誰之屋王孫可哀窮途歌哭且歌且哭未雨之詩掩卷不能讀

從軍行

金微山半雲頭黑玉門道上黑沙白戰士艱艱苦思歸匹馬還看走俠客銀鞍金絡少年場酒酣拔劍凌青蒼萬里驅車那復顧捐軀報國肝膽露幽燕鼙鼓震天來哀哉王孫哭歧路身命塗草莽心魂逐旌旆天驕南單于毒虐滯刀環峯雪河水歸不得蓮花幕靜雄心息鼓角連營腸斷聲大旗落日傷心色沙場自憐征戰苦何如高臥南山宅君不見班超歸去馬周歿幾人生具封侯骨

兵車行

去年戰鉞州城今年陣川北道滇黔烽火達涪施百里南疆障孰保黨惡肆兇殘王師疲征討下邑屠火薪人命三秋草昨聞狂寇披猖日馳二百里子夜角聲拍空起來咸劉貞曰來鳳咸豐施南屬縣塞兒晝逃亡犬羊俏襲空城裏邊吏飛軍帖里甲大徵兵鄉兵不滿萬對比心魂驚食毛踐土十千戶戎裝守險南山營戍卒初荷戈帷幃須長策譬如填黃河捧土末可塞重門旦夕兩扇開長江詎限天南北燕雀處堂古所譏時危我亦增歎歎城南兒童不知苦戲執戈鋌當歌舞

題畫

人影蕭齊秋欲曉暮蟬黃葉讀書聲小樓昨夜瀟瀟雨一枕清寒夢未成

楸枰落子壓蒼苔
雨案晴窗傍水開
斜照一林山色暝
更無車馬過橋來
我是淇園偕隱吏
塵勞風月度朝昏
何年買宅南山臥
萬壑千峯晝閉門

題江村小景畫扇

莓苔遮徑渺人跡
老樹陰濃忽有村
醉臥不知風日晚
一江烟水護柴門
板橋昨夜清溪漲
亂石橫流湧急湍
兩岸閒雲渾不渡
倒收蒼翠入晴巒

題孤鴈紅蘆畫扇

爲王會作之

自塞北來三萬里
入關南去千江水
天涯征影早秋聲
蘆荻蕭蕭西風起
故人散跡南陽廬
烽烟滿地音塵疎
紙上鴻泥忽感舊
君絨錦囊余繫書

贈龔雲屏二首

風颺塵海正波瀾
戰伐中原血未乾
千里雄心擊筑唱
幾人古調抱琴彈
知君酬世殊秦越
顧我論交托肺肝
尊酒何時明月夜
孟勞秋水醉中看
鴉薦鵬飛隔帝鄉
何如經術補歧黃
覲來踐蹙成癰患
亂後瘡痍乏肘方
捷徑終南應未得
買田陽羨可偕臧
桃源他日同歸隱
門外東風放海棠

喜李又仙至

喪亂遭劫火相見復悲秋貧病一身累別離千古愁挑燈話長夜涼月澹前洲樹立君勤勉塵勞易白頭

閏中秋夜藉題竹影樓圖

中秋望月江城東繁雲亘霄陰濛濛舉杯搔首啟後約以閏續節天爲功雲屏老友袖詩召黃昏連袂僧寮中評
文者茗契四座潛香齊燒長檠紅天半羽書走飛電新梁雷震喧與戎羣盜飄忽詎可玩發卒星馳別忽密室
借箸策有幾束手歎嗟聞鳴蟲我歸三漏人語寂軒楹洞徹水晶宮徘徊忽憶中山景誰與心目開青空竹樓今
夕托劉義年曰一作拓畫本涉筆寫影光玲瓏應憐城居寡怡曠日夕斥堠驚千烽未雨牖戶豈委棄良霄慙願拘樊籠
夜深吹篴意未遣排愁坐階來清風弟言玩月登峯好披圖啟予山情濃

白帝城懷古

三分鼎祚終炎漢異劉義年曰一作曠代空餘白帝城剩水殘山趨夏口翠華玉殿長冬菁劉義年曰一作菁公孫躍馬成抔土
蜀道啼鴉送晚晴却憶樓桑占瑞日童童車蓋爲誰傾

癸亥正月五日喜李又仙再過假齋

流光日夕走東海細雨春城却復遭生計蹒跚雙蓬髮天涯寥落一羽毛君昔挾瑟齊門鼓誰憐橐筆西山高和
壁牙琴謾終古爲爾一樽破愁牢

題李春榮小照

鬢眉服巾時不入神妙驚傳阿堵中洛陽市僧雜儔伍漢池寥寥青雙瞳自從漢陽事征戰有宅巴渝連興戎少陵七歌哀弟妹天涯那無雁南東十年托業書畫壁黃金散盡生終窮獨含姿態見胸臆對此徐徐來清風

甫至南津高齋答舍弟唐俛見寄

東坡與子由白髮老弟兄我少壯時寢饋同居行一朝爲人傳分道忽揚旌不嗟別離難術業期垂成願言學古人衡石歲月程所戒在溢滿欺世獨高濤譬若黃河源宏淵流不盈憐君寄園去巖磴莽蕪菁白雲夢魂到悠悠兩心情

奉謝劉一紀三家謨作小印

劉侯鐵篆古所許毫末鈎畫相澄鮮俗世玩物甯解此才人見藝轉須憐今予愁度臯比日時來同消梅雨天何緣遍羅金石古却從書字參幽元

送范雲吉泰亨比部之武昌兼應曾節帥聘

金鷄闕下傾聲久鱸雀堂階拜而遲海內幾人懸重望棘曹三載繫疇咨我聞江浙尙延倚公去荆湖當羽儀凋敝東南生命盡願留幄策濟時危

贈黎秀山

南下轂輪動大帥西來衫履獨伶俚傳隻身脫難一千里孤子中殤十二齡時勢艱難愁逆旅文章卑賤況零丁當

歸隱語逢君訴風雨清秋黯洞庭

題叔弟棠村寄園小景

昔君館偕丈今齋我判袂遙憐風雨夕獨臥寄園秋時有白雲到當門青竹幽南津輿馬地那弗憶前游
荷涼朝避暑桃灼夜尋春半歲兩談讌清期多故人情疎愛益至晤少別常親未遂買山志登樓悵遠頻

之夔州留別唐俔

自孩及丁出入俱二十年事憶猶昨自居訖行襍被分今年君我離羣數孤舟東下三百里憐君初病空山起天
邊風露苦侵人勿念遠行君重謝樹璧曰一作自珍

古雲安留別任華九蔡次賓楊慎齋兼贈阮曉岑之行

萬里客游千里歸幾時阮君黔陽去旬日交游旦日別南浦霜江余先路寒飈十月動瞿塘空林落葉原草荒浮
萍在水聚苦散車笠天涯春風長

呈族叔峙三鍾嶠

仲容少具竹林思安石先營別墅歸兩道情懷坡瓏隔十年書畫昔人非多才濟世愁神惡中隱託名比宦微聞
道新吟驢背起雪時來對玉珠揮

輓范雲吉世丈

才名艷

謝樹壁曰一作絕

世天能妬中道擢傷人所憐江表肅清遲旦暮劍門偉績歎孤騫

謂季升字

頗聞器識東南僅尙說

糧漕皖豫賢戎幕幾時索遺稿好憑十策靖三邊

萬川挂席三千里吳會參戎百二旬一病膏肓驚瘁憊迴思儀範令酸辛先生恨事遺知已大帥

謂曾麟生節相

有言哭

偉人去不多時歸正遠寒風孤雁渡江津

悼亡

茫茫情悶顛天閨無復名花冀返魂舉案白頭成絕事傷春不語對黃昏

髻年問字課清齋姆教師箴羨汝諧記得畫眉新伴讀書燈夜肅鳳雙釵

錦水狂瀾灑風半生書劍客西東深閨勞汝金錢卜一樹荆花惜落紅

前年烽火迫新開

新開田場距城南數十里

晚發寧車歸去來巾幗未譜戎馬變危城誓語上新臺

門前瓦土手新搗垣穰叢生池水寒昨夜茅簷雪影俏更無環佩倚闌干

重陽烟柳送歸寧溝水溪邊綠野亭飛折畫梁金翡翠東床獨坐一燈青

芸案生涯晝閉廬鹽醯葱蒜不關余茅容供饌勞司計更倚何人筦簿書

梅雨清寒愁病中瓊葩力弱不禁風年來肺損秋容瘦空散藥香滿繡櫺

湯餅初成酒尙溫十年熊夢慰淒魂東風不護猗蘭蕊愁聽鷓鴣聲向墓門

茵幃空存月滿梁寒衾幽夢墮鷺霜繭絲剝恨知多少逝水流雲不盡長

暮歸

櫛謝樹壁一聲動西寺春郊炊晚烟來徑歷紆折高下菜豆田潤土不似寸青黃風所旋羸羸力作夫勺米筐在肩太倉滯秋糴時策將安便

題司壽民丈灞橋春思圖

風月林中策蹇來千峯萬壑幾樓臺天涯如夢兵塵滿剩有王郎斫地哀

黔陽烽火室家遠消息秦川兄弟遲談劉義年曰一作關懷我亦冬劉義年曰一作多春恨空對綠楊千萬絲

王氏園中劉伯敬出尊翁畫扇屬題

乃翁作繪老愈健筆力遠過蕭江南咫尺千里法格到杼木唳石森甃甃竹樓秘本君能讀侍硯追摹有倉卒傳新却懷李昭道幾日鍼繡鴛鴦出

劉敦丈秉堃新畫風雪運糧長幅

崎嶇胸抱談不竭攬筆裁裁走風雪糧車如霧馬如雲先生畫意消氛冥我聞秦隴方用兵涇渭西北無完城湘軍十萬任收復日夕摧陷妖烽平蜀都廩粟輸未已輶軸彳亍勞千里如何招徠西營田雄國肥饒軍所天幄臣議宜諸賢力鄧禹南歸空潑然披圖重尋咸陽道可憐關棧無碧草

浣香齋同敦丈留宿因見李墨莊張亥白李香雪諸詩集

西園閉款東寮宿我與中山久別情樽酒十年有哀樂上人一榻相對清國初詩老起頽學諸子文章猶正聲落吟交羣聚偶未應詞筆遜前名

宕渠道中早發

五更曉月驚殘夢衣被侵寒十里晴平野星稀連曙火空林人語亂鴉聲前年走馬蓬州道荒店淒蛩渠水鳴鄉伴重尋豺虎跡清時麥黍饒西征

奉步馮樹堂卓懷明府寄懷萬邑士紳三十韻

河流去滔滔孔轅無息轍各抱餓溺心入世焉永訣林泉豈不逸歲月風花瞥長揖謝巢由道有瘡痍切先生古達人解符棲巖穴八年置理亂臥隱袁安雪濟時需偉材如製錦使綴胡不就徵車事抒蒼黎悅往者魚泉治民和政無缺潛驅薄俗淳桃李春風竊願非百里才棠陰留巷說頗聞郭節度幣聘昂爲裂粵東阻海濱千里涸流血兵燹大貴穀苴者殮松屑厥政首農桑幃帳深納結三顧不一出慮毋情決絕海內尙兵塵湘楚富時傑就中治芻絲幾人手剔抉自嗟樗櫟質百爲甘用拙秋闈四報罷一類萬想滅秋風雁影分椎腸難再熱前年効城防豺虎競吞齧非無澄清志顛木滯由藥所企數公出蔚文瞻豹別綜籌寰宇計箸陳燎掌決西北墜門戶東南騁邛僂搃搶勢除掃劫灰熄焚爇其時頌昇平詠歌能臚列語此盼洞庭遙持一樽凸中興輔相業莫待噉鴻咽

送劉紀三入都

卅年老友看君貴，藜閣傳經又累秋。此去燕臺誇駿足，幾人瀛海占龍頭。春前雪棧從西盡，馬首雲山向北牧。我愧中山行贈別，杏花時節一登樓。

謁杜公祠五十韻

崇祠千載後，錦里百花香。舍北看春水，橋西接草堂。松杉穿徑密，榆莢襯園荒。懷古傾幽幕，欽賢動遠望。自從風雅息，沉歎頌聲亡。變格趨詞賦，正音孰憲章。中間推屈宋，繼起雜齊梁。綺麗謎真色，紛綸騁勝場。杜陵稱傑出，太白共鏢揚。并力挽頽靡，羣愚枉謗傷。究其鴻鵠志，未可蚍蜉量。餘緒爲吟咏，私憂切廟廊。意猶期稷契，術欲致虞唐。嚮弼貞觀治，應隨魏鄭行。肫誠垂諫牘，勳業艷縹緗。此志嗟匏繫，浮生走電忙。身逢天寶日，官限拾遺郎。待制陳三賦，彈冠契上皇。雪誣劉義年曰一作誣雪高士董董廷蘭被誣劾藉公昭雪疏救相，臣房才美窮。猶達勢違蹟，且僂機槍纏隴右。鞏

鼓震漁陽行，在途揮涕北征仍。趣裝是時伊洛梗，勿禁史安猖。助順需回鶻，添兵慮虎狼。請勞諸將帥，深入効劬勩。銳蓄京能復，功成患不妨。乞師殊計左，廷議實公倡。碩畫惜如棄，嘉謀徒自良。直終嫌骨鯁，任弗使心強。再拜辭龍輦，前途渺鳳翔。鹿門人去隱，彭澤令還鄉。世亂披叢棘，馳戒肅霜流。離閩梓樵悴，下衡襄憶弟。雲分影思家，日斷腸。關山憐髮白，楓荻賸顏蒼。三載空皮骨，八哀阻澤梁。艱危辜甫憤，忠愛逐箕狂。臣有微言補，君無每飯忘。抒情瞻紫極，戀闕發清商。託諷聞非罪，長歌哭竟當。劉義年曰一作悲歌慨以慷乾坤幾男子，天地一詩囊。倦鳥飛原歇。

游魚潛更藏浣溪新板築茅屋舊瓊瑤主問元戎武貲攜錄事王林邊欣立馬竹裏樂烹羊歲晚烏皮慣居甯兔窟臧阿誰持白酒破夢絕黃梁父老悲前哲傳留記錦坊列楹端几席設像薦椒漿緬彼情文摯貽茲名氏芳

萬里橋懷古

蜀下揚州千折水萬里通吳行此始河橋餞使武鄉侯嘉名勝事傳無紀三分炎祚憾當時北伐中原誓出師密邇荆襄躡戎後不慮腹心慮腋肘尺書寸幣靖東南專兵西向仲達走侍中費禕攝行人張溫報聘來亦頻無端遠游奚足念唐皇巡幸空江濱頗聞李水開二渠灌源水利興有初蕭何基漢文翁守萬里岷江通夏口就中懷服誦孔明都人謳慕若爲情長星橋上聆江水千載悠悠送別聲

易母任孺人八十壽詩

金秋玉露煥晴輝宴敞瑤池日照微天上霓裳賡月姊人間霞幃繡星妃風姨度曲笙諧調電母含光錦合圍欲借霜毫祝耄耄煙雲尺幅繕芳徽

石臺磯上昉溪村門第師堅黻履存家有賜書承北里室歸華胄啟東屯井泉侍飲西鄰出江汜行歌南國溫聞道溜陽山水絕彥祥闈闔著邦媛

絲附蓬麻薦附松心如蘭蕙質芙蓉少君自易荆釵飾卻缺翻勞餉黍供種藥延齡蓮子意采蘋脩祀荔枝容桑榆莫悵菱花破晚節寒菊耐冬

竹馬迎庭記往年，荀龍薛鳳燦如仙。丸熊共識篝燈苦，封祚猶欽機杼賢。人道鴻毛輝雁序，我知烏哺起鸞翩。家駒更毓文孫秀，鳩杖他時間俸錢。

瓠器需豐食，共牢家人膳。醢手親操，蒙泉曉課陶奴汲。井臼宵分，鄭婢勞納履。無賓塵几席，觀頤有婦潔脂膏。料應豫泰年年頌，指畫坤維看塵毛。

土沃民勞子訓思，盤殮常道苦辛辭。丁簾晝撒纍珠佩，甲院經陳滄葛詩。守口如庚圭豈玷，藏身去乙玉無疵。午橋艷說香閨彥，不及寅階服練時。

革盡曠貪見素心，慈悲方寸碧天陰。道遺綠粥分牙惠，地布黃紗有臂金。生佛頗聞紅粉祝，活人無間白門吟。紫林證果同施捨，青到楊枝已作霖。

木落千村水始波，八徵介壽醉顏酡。仙瓊四應名公製，華祝三聲阿母多。九日茱萸吟杜客，一庭蕭管雜秦娥。廿年百歲人稱瑞，五色泥封下玉珂。

每首以八音字冠首中嵌天文地理草木鳥獸卦名支干顏色數目等字殊小家也

題王澤山南游詩兼寄左逸仙比部

船山作後吾衰起，風雅何如王阮亭。蜀士能兼山左習，澤山有此江南馨。河源到海天爲碧玉樹，交花葉半青寄謝龍崖。勞手集懺除綺語，定心銘。

鐵邱墳
故事

和馮樹堂明府自壽詩

時自長沙重遊南浦

十年不見馮夫子疇昔鬚眉今照人花縣重臨春未老棠陰遺愛古來真欣看羊酒馳三里

萬縣分
三里

爭詔魚軒介

六旬橫舍曉開晴霽色瓊筵玉管一時新

祝公純嘏晉公辭記得飛鳧蒞止時案牘不留銷雀鼠鄉團無警化鴟鴞政成夏日冬霜惠人載甘霖湛露思稂

莠自芟禾日殖百年善氣已潛基

厲壇旁舍草菁菁檢驗亭高舊錫名直爲羶民防累死至今體命戒輕生官似

謝樹壁曰
一作如

活佛人膜拜書列崇碑

政報成餘澤更霑枯骨遍年年青塚北山營

祝融肆虐陽侯酷下邑從來被患多烈烈焚門朝市警招招喚渡夕陽過一經曲突官薪徙更發輕裝客棹歌水

火無傷登衽席賢侯舊政石難磨

玉尺冰壺幾賞音玃來文院喜重尋邦人久築巒公社大老翻爲梁父吟誕日詩懷風雅頌浮雲宦味去來今稱

觥我晉長生祝看取梅花天地心

石室宏開几硯緣滿城桃李競春妍齋窗舊拓唐三舍楹楨新丹宋五賢拄笏談經衙累放增膏益畝俸胥

劉義
年曰

一作
捐鳴珂幾輩蜚聲去慙愧司勛守舊甍

丙子伏日同中表王君鎮之式九左君翼丞遊鐵鳳山

撐空傑閣引天梯九轉盤紆落照西江水遠從千澗出雲巒高壓萬山低何年鐵冢埋荒草此日神碑識舊題沈公

詩碑有巒書上額 樸被同君星漢上一聲清梵警招隄

己卯出都雜詠五十首

鳳閣崔嵬策蹇迺愁懷出結渺關河旗亭茗椀香逾酒難得高朋祖餞多夔館諸君子龍行齊化門外

雙橋按轡日輪西泥淖深深沒馬蹄夜度嚴城風不競樓臺燈火薊雲低由雙橋至通州時逾二鼓

秭秸東南達帝州千帆萬櫓此通流秋深唯見寒沙色一水迴環送客舟運河漕船以七月截止秋帆無阻榜人便之

蒲帆一夜戰風聲酒薄衾單夢不成迤邐津門三百里愁看曉雪下寒雲九月廿四夜行百里始抵天津

關門日射海天晴卉服氈冠謁帝京聞說相公仍駐節應知萬里恃長城天津為通商要地李爵相常以夏秋移節於此

夷馬西郊暗據鞍紅旂采帳萬人歡劇憐沃壤成馳道忍向圍闌醒眼看廿八日各國人士賽馬於天津租界橋

十程九折水東奔百里橫沙撼海門天塹當關人不識來帆夜夜候潮痕大沽河勢迴環有百里九十灣之謠海口橫互沙磧輪船候潮始入

輻輳人家巨浪中往年嘉會一平戎遙看相國中營處風定雲開夕照紅烟臺濱海前李相平日本朝鮮之難於此會盟

水色沉雲萬丈深蛟鼉百怪晝陰風濤滿眼無邊岸世路難忘涉險心黑水洋在大海中凡遇風浪此為最險

綠水空濛霧捲天東來曉色正蒼然金鰲背上頻翹首五采雲霞捧日邊綠水洋

掀天揭地浪花轟十丈濤頭雜葦蘆漂水搏泥如甕盎濁流終古混清渠黃水洋為黃河出口所經中

斗大燈球洋面開火輪三日到烟臺關門不鎖吳淞水一片檣帆夜度回吳淞口外船局於洋

玉市珠街錦繡場雲車風馬競飛揚分明界畫中朝水却被人呼作上洋海

繞郭烟巒列畫屏金山黃落焦山青分流據險成奇秀知摘天垣第二星金焦二山分峙鎮江門

雒城莽莽靖黃埃劇寇當年禍久胎百戰山河誰勝算至今人說雨花臺金陵曉發有懷曾文正公

塵昏雨暗水蒼茫急浪聲中過馬當憔悴天涯鄉夢遠更無風送到南昌馬當山距鄱陽湖口杳然天際

孤峭靈奇削不成海枯石爛證三生小姑未嫁彭郎去贏得江流萬古清小姑山去彭郎磯不啻百里

踰山跨嶺露城根蟹舍千家半掩門江上風波人不管柴桑栗里在前村彭澤縣

楓葉蘆花早雪天隔江漁火伴鷗眠今宵停泊潯陽路怕聽琵琶上客船九江府

武昌自昔談形勝扼要東南據上游蓮甃不忘多難日令人苦憶陶荊州武昌府

樓艦西來此大觀巍然九級鎮狂瀾仙人玉笛知何所江上梅花十月寒黃鶴樓在蛇山頭上

沙平岸仄草盈隄桑柘人家夕照低一樣黃陵磯上路悵無花落鷓鴣啼黃陵磯由襄河達沙市此為第一程

插棘編茅四五家迎寒放暖兩三花西風欲與劉義年曰增惆悵旗捲江關日又斜湖口舊置縣

迢迢野港恰通船夾岸魚罾劃晚烟料得劉義年曰沔陽豐樂處二分魚利一分田巴潭業漁者兩岸皆遍

黃鳳山根湧碧瀾夕陽紅樹釣魚竿窮鄉那有真王氣空說陳人朽骨寒

錫鎮迤北相傳有陳友諒墓

湖水微茫混遠空蓬窗四壁鏡當中憑誰努力先登岸捷艇飛橈第一功

洪湖六十里舟不

纔過湘關又柳關徵錢量到船中間憐憐胥吏操尋尺日盼江頭不放開

柳關例取船稅舟人謂木關稅

竟日風波乍解橈船頭拍浪警寒宵胥濤滿地隨時有墓道江陵恨不消

伍胥口為江陵縣界楚伍員墓在焉

黃金河上曉星孤鴉廟橋南蘆荻疎三唱鷄聲催打漿天低雲暗過長湖

湖長

恰喜湖平汗漫游軒然大浪起中流北風不與輕帆便村落荒寒雪滿舟

焦尼阻風與心奮月樓賞雪一醉

捍水作謝樹壁曰一作為堤歲歲新背臨湘漢面江濱魚游釜底叨天眷

謝樹壁曰一作微天幸

一愁爾蛟宮鼉窟人沙市以隄為衛每歲加築工隄

不贊

時城塔影峭三峯墮地蓮花又一重毓作文嵐終古秀宜都回首望葱龍

白楊阻風夜行十餘里湖聲猶落枕上

釀雪寒聲萬竅號飛沙入艇莽蕭蕭白楊例有悲風警悄枕昏燈一夜潮

白楊阻風夜行十餘里湖聲猶落枕上

逆流直上溯江源山障變巫作外藩此去火船飛不渡灘沙石瀨爭謝樹壁曰喧宜昌為益州門戶一作競

喧宜昌為益州門戶一作競

碧瓦丹牆祀禹功黃牛佐命語雷同荆人不識湘妃事社酒龕香蜡報崇

黃陵廟本劉表為舜妃建立廟祀牛神不知何據

濤聲砰湃戰蛟虬石齒磷磷巨亂流百尺長筴生力挽人間難事上灘舟

灘洞

石走灘鳴勢未降狂飈捲地入寒江屈溪瞬息征帆轉泊住東湖四十艘

空船俱泊岸

壁立峽門兩扇開石龍飛甲過江來橫流鐵限天然鎖勝築雄關拜將臺新灘橫截江流蜀楚設險此為要害

解衣登岸趁晴輝粉塔松陰蘿徑微正是江灘好風景黃牛背上一鴉飛小灘在新灘上五里許

羣峭摩空逗晚霞明妃祠宇嶺雲遮溪頭不少含香女砧杵年年自浣紗香溪有昭君廟在半山中

南屏山下櫓聲柔落日江天吊楚囚香草美人吟不得寒烟細雨泊歸州歸州南岸為屈原廟

陽生天氣小寒時曉過巴東睡起遲沉練一江山兩岸雷聲破夢雨催詩巴東縣

巨礮乘船遠備兵水師依柳帳為營深宵漏箭傳軍鼓併入寒流濕雨聲萬柳

峽壁千尋嶺萬重伏蹲如虎臥如龍陽臺那許瞻神女烟霧迷茫十二峯巫山十二峯陰鐘日望之不見

遙倚西峯望白鹽曉來積雪萬山半夔門忽開雙扉鑰抹煞秦關百二嚴夔門峽

奇骨靈根藉太湖天留砥柱鎮夔巫如馬劉義年曰一作如馬如象并如馬費盡詩人筆底摹灩澦石屹立江心為全川水口

隆冬歸泊小巫船風景雲安似昔年暮上新城以鹽積寒沙萬竈護炊烟奉節縣治東邑人煮水為利今八年矣

不見陶潛舊隱廬琵琶山雪晚晴初北來驛使翻憐我到處逢人為寄書雲陽陶奮劉曉淵吳溥生皆有京函廣奮乃翁康侯尤二十年

溫泉已付東流去熊夢恰謝樹璧曰一作方占渭水濱江水懷人感榮悴丹楓葉落早梅新溫九臯卒於都門熊準堂舉京兆試兩君居近小江扁舟

來過不勝升沉之感

故國雲山倦眼開巴陽卅里尚徘徊明朝快語酬知己道策六鷺海上來巴陽峽與雲接壤為萬縣界

送范孝輿運歸隆昌

吳江風露薊門烟辛苦仍歸萬里船
宦海茫茫無信汐名心耿耿未枯禪
孤帆細雨三巴路小閣離腸五月天
雲影在霄萍在水莫將消息費言詮

此去高梁徑百盤樓峯幾日解征鞍
故園榆柳經年別壯歲風塵行路難
預識東山陪劉義年曰一作起謝傳會須南部
訪袁安錦城月色勞君記玉露秋香轉眼看

送范孝輿之官粵西

正喜恩綸下大羅分阴霖雨濟天河
柳州易播緣何巧初選甘肅合水改選天河縣祖逖先劉幸已多
定有循聲馳象郡還看美服詠羊絀
廿年老友慙官冷空對南風發嘯歌

題尤綱堂二尹墓

艷說抽簪早翻憐大暮歸青山埋俊骨
彤管遺芳徹化洽桐鄉遠名分贊府微
原任桐鄉縣丞平生少遺憾惆悵祇春暉
破時兩親在堂高峯助磅礴遠水抱瀼靈
靈秀一朝聚風雲十里開有封榮吉壤
無地着氛埃共識堂坊裏芝蘭玉樹栽

題程賡唐姻丈生壙

富壽逢康吉前身闔苑仙藝林推老輩
貢樹發華年有子如扛鼎承家盡象賢
羨公居室意瓶水注淵淵絕學傳青鳥
堪輿俯察精卅年尋吉壤一穴占佳城
壙藉无生重銘留後日旌山靈應不昧
百歲鬱菁英

題王保鄉司馬榕村小隱圖

濁海橫流無中外，颺塵馳逐猶冠蓋。脫却樊籠游青冥，乃知身小乾坤大。榕村主人人中傑，陽春爲神秋爲節。豪情義概世所希，磊落腸中有熱血。自從捧檄江水西，鄱陽湖上口碑題。一官游陟朝天子，湖南芳草綠萋萋。衡嶽崔嵬湘水遙，冥冥灰劫未全消。寸柄尺柯兩無濟，經世長才風剪條。倏聞杜宇催歸去，朝別長沙玃夕灩澦集。柳空懷陟岵，悲樹護辛識。倚門處門前榕樹大，於輪隔絕人間車馬塵。十年不作出山想，戲綵堂前多青春。蕉窗竹屋可坐臥，日對林巒排清課。雅懷豈必忘世情，富貴浮雲早窺破。我閱此圖意傾倒，如憩十洲凌三島。五十服官良非策，誰知抽簪人更早。嘯月吟風且莫哀，東南多故尙劉義年曰一作亟需才瘡痍滿眼君知否，還望東山霖雨來。

上已後二日由渝返銅道出安居黃紹珽在元廣文邀游波崙寺 辛卯

春風百里渝州路，西入瓊江第一山。蔦徑陰森人跡少，蘚碑剝刻石頭頑。與君遍訪隋唐蹟，有佛高嵌崖壁間。直上孤磐淺絕頂，五年險夢破愁顏。初選銅梁夢登一石梁山，擠先到者一人墜山半大駭而覺。今殿後巨石屹立，攀蘿真上高而思危，恍惚五年前夢境也。

過簡州弔劉姻吉六

秉鐸繁邦未及瓜，靈旗去久向天涯。不堪江上重翹首，落日城頭噪暮鴉。

行年伯玉始知非，宦海名場願兩違。更有竹林不可說，阿兄泉路對秋歔。謂紀三解元

前年訪戴叙離情，瞥眼驚看太瘦生。我慟喪明君病肺，秋宵寒榻共淒清。

鱣堂猶記榜鬢宮門外青郊橘萬叢可惜水光山色好黃梁一枕太忽忽

和馮協中時懋少尉早梅原韻

正是黃花冒雨時偏教籬角綻南枝東皇有意翻秋令催起魚亭社裏詩

梅以九月望日即開

魚社主人一木支新詩絕不寄人籬吟成十幅天孫錦風信先從紙上知
未須活水洒楊枝自賞孤芳自護持索得同人齊唱和詠花爭似看花時
共說山城無此花芳懷詠事兩堪誇一時珠玉縹緗集秋水長天燦落霞
我愧達摩學面牆年來未識壽陽妝昨從錦里剛旋旆艷聽梅紅勝菊黃
少府門庭別徑開尋芳結伴喜偕來迎眸一笑花真個慰我應如止渴梅
歸來纔入羅浮夢三日書臨索和詩忙煞生花秃筆管文成釘餽笑駢枝
花下離迷着接籬青蓮雅興吾何知銅瓶紙帳修難到不爾從君借一枝
一樽遙賀綺窗前萬事從今合釀先不倩江城吹玉笛都知梅福是神仙
下里巴人唱竹枝休疑束皙補亡詩孤花對我應嘲笑數點芳心客未知

附原作 選十之五

傲骨嶙嶙瘦不支自甘冷落近疎籬無言獨倚蕭蕭竹香到寒梢鶴未知

自是春前第一花，冰肌玉骨不勝誇。如何偏趁丹楓色，點綴秋光燦晚霞。
素手亭亭對粉牆，美人新試漢宮妝。胭脂已抹春風臉，堪笑東籬菊未黃。
懶向百花頭上開，衝寒端爲餞秋來。回頭笑問閒桃李，何不銜霜學早梅。
初種我猶憐，瘦骨早開應是索新詩。且將一管春風筆，明月當窗畫幾枝。

次韻協中少尉魚樂亭落成適值九日梅開喜賦之作

雪嶺岷江放眼來，胸藏邱壑手剜苔。一園恰遠巴川永，九日如登戲馬臺。喜報花開延客賞，嗔聞吏到說租催。此亭欲識游魚樂，不問莊生問早梅。

和協中詠物詩十三首

玉蘭

玉貌蘭胎質性幽，迎春雅號自風流。小園奪得羣芳艷，不讓南湖烟雨樓。

金橘

世人交結黃金貴，餘潤先分到橘奴。囑咐園丁多種植，莫教嘉果計鎔銖。

瓦松

不依溪澗不塗泥，一握靈根萬瓦齊。莫惜棟梁難入選，琳宮梵宇綠萋萋。

石竹

渭川千畝不生花，羨爾臨風點絳霞。怪底美人衣上綉，香羅文綺鬥春華。

紅菊

霜露叢中錦繡團，姿嬌翻作醉顏看。似嫌老圃無人賞，聊學胭脂畫牡丹。

白菊

素質天然迥出塵，不須搗粉亦精神。秋花本是西來種，開到人間色相真。

晚菊

欲爲重陽冒雨開，北風無信暫徘徊。深防吐艷含香早，未歷冰霜苦況來。

燈影

黃昏人靜下簾鉤，一點寒光四壁收。安得蘭釭千萬灼，窮檐徧照讀書樓。

月影

姮娥自入廣寒去，玉宇瓊樓分外明。留得金輝來夜夜，山河萬里共澄清。

菊影

頽然一醉臥籬東，夜色依稀花萬叢。欲插滿頭歸去也，幾回攀折盡成空。

梅影

冰肌雪骨淨無倫
倪畫王詩未寫真
唯有銀蟾分影照
不傳玉貌只傳神

燈影

昏明不管階前月
顯晦都由爐上花
深恐晚來風散亂
有人垂幕掩窗紗

月影

收拾山河影不多
依然倒影入山河
白沙汀上看難辨
宜向深林暗谷過

和王葆卿詠物分賦四首

梅魂

來無迹象去成空
紙帳銅瓶有夢通
宋玉賦辭招不去
孤山只傍月朦朧

月魄

收盡水輪萬丈光
居然養晦在青蒼
渾璞金玉分明似
不用清輝是處揚

花神

小雨新晴色乍紅
含情無語對春風
等閒欲爲傳阿堵
知在如來一笑中

雪意

羣山料峭朔景哀漠漠寒空瘴不開戲玉天公纔醞釀疑雲疑雨費人猜

再題王葆卿榕村小隱圖

珠玉分題閱五年樹酒美蔭人華顛青山縱許成高隱中澤哀鴻望解懸

萱草堂前暮景收杯棬已畢稻梁謀隴頭會報徵書至再起衡山李鄴侯

聞說黃錦襖徧裁買田陽羨利源開怪他寒谷春回早被褐有人挾纊來

倡捐紜衣會
今譯業矣

韜光養晦與何心抱膝催殘梁父吟明日老榕分手去莫教綠葉早成陰

和韻卿夫人八十自壽詩

原韻

夫人姓趙氏一字悟蓮巴縣尉潘君廷灝之繼母也幼工詩與其姊佩芸友月爲蘭陵二秀壬辰八十

誕日寄其姊佩芸七律四章一時詞人代潘索和賦此

少府庭深愛日長靈萱飽閱幾星霜八旬壽母誇人瑞三秀才名擅勝場南國舊餘蕪菜思東川喜近枌榆鄉安
車就養從今始預祝期頤奉玉觴

新吟律細趣天然淡遠深微似輞川偶致逸情詩有畫可堪宦況夢如烟兒衣早贖慈親線旅館幾無坐客艱苦
盡甘回天眷願好憑祿養計圭田

錦江設帳值春殘介壽鴻文定飽看侑酒升歌工祝嘏隔紗罔字客騰歡頗聞家學肱三折漫說韶光指一彈檢

點寄雲詩卷在塗山東望好吟安夫人有寄雲詩抄藏本

拜母慙余未候門
璿閨儀範久思存
誦詩如飲瓊瑤露
步韻終嗤斧鑿痕
愧乏新詞揚聖善
權將俚句道寒溫
明年鳳闕重頒詔
又看慈幃沐湛恩

附原作

蘭陵悟蓮趙氏韻卿初草

壬辰清和下泮爲予八十誕日感事抒懷得詩四章錄寄佩芸姊並示蔭孫

歷盡艱辛歲月長
蓬鬆兩鬢已成霜
宦情早悟繁華夢
此事真如傀儡場
八十年來從健飯
七千里外望還鄉
誰知花樣從新換
又復開筵晉壽觴兒廷灝前授鹽茶大使因讒開缺令始另補巴尉

往事回思倍黯然
微官三世滯西川
銅梁舊跡都如夢
玉壘浮雲易化烟
德薄敢期膺紫誥
家貧猶幸守青毡
慈幃遺命今無負
喜見孤兒拜墓田格齋弟歿遺孤今幸成立現以按經歷來川候補

荆花早歲痛凋殘
斷墨零箋不忍看友月二姊早亡
差幸聯枝猶健在
可期握手得清歡
池中菡萏欣同賞
壁上瑤琴好共彈佩芸三姊年已八十有三赴渝九載今可重晤
宦海萍蹤今有定
鷓鴣權借一枝安

餘蔭猶堪庇德門
案頭手冊至今存太祖翁素精岐黃帶抄方書成冊
敢誇黃卷新頌詠
尚有青衫舊淚痕
春到名園花始放
陽生幽谷律回溫
膝前幸有孫枝茂
小草能沾雨露恩

和王葆卿之官楚南留別銅安友人原韻

誰道黃楊厄閏年，管甯一榻坐防穿。出山爲作蒼龍雨，命駕頻催白馬鞭。治譜循聲襲，召後文章舊價賂。盧前此
行莫憚風濤苦，歡喜來乘大願船。

記得抽簪久，賦間林泉十載別。君山望雲已遂，烏私養隱霧難藏。豹綵斑今日巨川須楫濟，幾時合浦致珠還。東
南多故君知否，好贊鏡歌入漢關。

一聲白雪唱陽春，餞酒離亭倍愴神。司馬分符同刺史，長沙自古重才人。岷江西下趨衡岳，漢水東流遶錯薪。難

弟若逢湘郢上，不教荆樹讓田真。君弟錫璽由湖南候補典史從軍閩粵十年無耗

交誼平生獨與當，仁風千里爲游揚。論文我自慙臣甫，囊飯君能重子桑。故里此時分縞帶，前程何處卜青囊。願
憑魚雁常通語，不隔伊人水一方。

題廖益生明府歲寒集後兼送之任高州

耐得冬寒始後凋，本來松柏著清標。卅年宦跡皇華重，千里邊屯噶爾遙。關外風沙迷戰壘，胸中碗礪託詩瓢。琳
琅一卷焚香誦，靜夜如聞紫玉簫。

萋菲潛消息，轉平心知大府締詩盟。鷓鴣蝸蝓工無比。劉義年曰一作敵香象羚羊譽有聲，老去吟懷誇律細。年來吏治

說水清巴川別去高州遠，又看兒童竹馬迎。

和廖益生明府之任高州留別銅邑士民之作

高軒屢顧坐氍寒葑菲無遺到冷官文字因緣叨誨久官師氣誼入時難每慙報玖頻投李敢冀披榛獨采蘭見說油車催上道寸心如水作冰團

頻年換縣豈無端枳棘終嫌屈鳳鸞擊士賢留羅漢證活人政視友邦寬民間借寇書何暮別後思郇寢詎安幾

人扁舟瀟水上必琴重聽伯牙彈管籌錢五百緡助生童膏火大足民敬搆難力救劉姓一家十三口

和胡筱明玉府校試決科次韻陳清馨茂才獻詩卽送諸生試省之作

試院掄才興未殘眼前屈宋盡銜官延賓座上求賢早決科次日選佛場中割愛難見說子昂詩作頌從知伯始

士騰歡羣材無負滋培力衣鉢泥金一例看明府丙戌進士

次韻瑤篇漱齒吟風流蘊藉息深深文章舊價紅綾餅樂府新聲綠綺琴未肯遺珠矜法眼轉從引玉見虛心藝

林流瀟由今始花縣當無惡木陰

一年撫字見心勞興起人文譽倍高瓊水巴川知蔭遠經生策士戒禪逃薛增兩書院課獎肆業生無荒嬉者為吟標錦催盧肇不

惜箋朱寫薛濤太學諸生應攔筆探驪疇敢說詩豪

自愧司勳運蹇何冊年阨遇孝廉科心丹枉自馳文藪髮白遑堪被禮羅此日宰官留法說他時吉士慶王多唯

虞白雪高難和一曲權分下里歌

和李光甫起榮廣文見寄原韻

凍雲寒雨送瑤章冷暑排愁引興長爆竹聲中春尚遠吟梅腔裏句先香君才十倍嫻風雅賓宴幾時賦雪堂莫
訂論文尊酒約今宵已累素枯腸

和李郁堂文琴少府感事一首

在試院監場作

自顧風雲壯志消請纓無路翽天朝談兵我有刀環議玩冠人偏瑟柱膠海國茫茫飛燹火戈船黯黯起春潮知
君夙負匡時略不取和戎一字褒

日本搆兵擾
近烟臺一帶

渝郡同魏寶珊廣登樓外樓

十萬鱗蕩落眼前危樓百尺瞰東川塗山秀出青雲表巴國分從赤水偏

合州古
赤水

大地關河形勝在清時卜筮使

君賢樓為黎菴齋
觀察所建

我來一展凌霄氣不詣三峯學閻仙

樓西有張
三峯遺蹟

和李光甫五日同王練彝山長藍慶堂守戎泛舟瓊江觀渡原韻

淵岳涵清輝雲物舒遐望浩蕩天宇闊俛仰得昭曠瓊江古涪水流從興谷暢清淪抱鼉鼉中有百靈賁燈火一
千家青簾紛白舫幾輩益州來對此傾葵向君是謫仙人檝作東川障隗市孰吟哦韓潮起溟漲五日龍艦飛豪
情增駭宕走邀王子猷藍尹老益壯風濤鼓棹行羣兒拍手唱謂是郭李舟蒞蘆畫依樣中流一容與丹青那能
狀作詩紀勝游字字雲臺將一紙懸國門疇敢分庭抗余生厭塵鞅逸情似种放山城苦臬牢羌無颿可上蒲觴
偶然醉祇益孤懷悵邇來觸戒心蛟鱷吹腥浪魍魎盡攫人閉之穹廬帳此患養成癰奚止身微恙況復霖澤稀

黃苗枯醞釀昕夕從禱祈膜拜佛無量職茲抱杞憂吟興拚君讓

和馮協中少尉卸任銅梁留別

千里驂騑不受羈鹽車轡糾苦非宜暫從養晦抽簪去莫爲逃嫌諷刺誰歸覲終償游子願臨行例有壯懷詩南
山此後豐毛羽何用酣歌悵別離

年來君我意相關茗椀吟箋興往還不管風波來宦海常留詠事在花間銅梁今日攜離酒玉壘浮雲話故山白
髮青袍各努力桑陰十畝詎閒閒

做少陵七歌送協中少尉解任之渝州

有客有客乍抽簪脫離樊籠卸塵襟上官飛符驅迴避喬梓不得同繁林朝來別我詩一閱吟情離叙潭水深吁
嗟一歌兮歌初起驪駒在門嘶不已

送君將赴大江西舊廬先墓望迷離昨聞天半下羽檄東南千里猶鼓鞶家山雖好阻鯨鯢武陵桃源無路躋吁
嗟二歌兮歌繼作鄱陽湖上風波惡

聞說遂甯有親串明日送君出西澗西人苦道泰山頽那得東牀坦腹慣涪江水落空復情長河無魚天無雁吁
嗟三歌兮歌正發梓潼山鎮泥滑滑

又欲送君返益州浣香溪畔讀書樓朝從青牛老子游暮隨杜陵看白鷗高屋大榭可忘憂風雲壯志何時酬吁

嗟四歌兮歌欲裂翹首錦江愁百結

萊衣在篋琴在御行將送君眉山去定省高堂藉承歡還與三蘇抗聲譽卻嫌州符近瓜期征途往還牽百慮吁
嗟五歌兮歌方壯有車難游紗縠行

人言魚亭梅開早送君不若留君好世情險巇焉可測昔日芳蘭今蕹草留此爭如甞坐鍼縱酒哦詩徒懊惱吁
嗟六歌兮歌未歇休約湖邊弄明月

我今送君將何適唯盼渝州天咫尺十八梯頭書畫壁暫借一枝安几席行行且度貪中驛一庭歡聚數晨夕吁
嗟七歌兮歌已終月山幾日來春風

乙未冬初協中往眉州省親遂入成都明年春由眉返銅挈眷隨資 州任再以詩別依韻答之

再從巴水問行人君有坡仙未了因匹馬眉山還錦里三冬足跡到殘春桃花舊縣開仍早楊柳新堤折更頻祖
帳不堪重進酒醉懷兀兀已清醇

詠古十首

伏生

齊魯諸儒未盡坑天留此老育經生壁藏幸賭焚餘簡篇缺猶傳劫後名勝國頭銜秦博士尙書口授漢公卿濟

南此日網謨誥衣鉢當年有主盟

賈誼

賢良詔下萃千官伏闕幾人策治安太傅長沙遷讀易洛陽才子古今難書陳痛哭福先薄賦繼離騷調未單同是屈平哀郢意無情湘水到今寒

董仲舒

兩漢儒林此首推天人策對嬖皋夔一官位重江都相三載園荒學士帷並駕公孫心早忌及門弟子面難窺著書豈禁談災異諷議招尤亦數奇

申公

治在力行不在言申公一語恰探源明堂建議徵耆舊天子紆尊迓錦軒可惜宮闈黃老癖不崇儒術趙綰王臧宛空餘詩教傳東魯夏寬孔安國周霸徐偃衍派繫

轅固

武湯受命議誰何苦與黃生辨論多應詔未宜誹老子蒙恩特許傳清河數千里宦腹腸冷九十年人鬢髮皤終是直名邀帝鑒不教城旦屈菁莪

司馬遷

蠶室淒涼一楚囚，千秋著述展窮愁。文章史筆開西漢，侍從詞臣紹左邱。華國有才臣罪減，傳家無恙父書留。李陵若遇歸來日，爲洗龍門白髮羞。

劉向

恭顯專橫許史驕，更生無力助周堦。蕭望之徒增寵秩官，宗正空上密書報漢朝。乙杖夜炊天祿火，庚經手校嬴秦燒。侍中七略他年訂，賴有傳薪慰寂寥。

何休

穀梁廢疾左膏盲，風議新奇月旦詳。豈有疏箋同鄭馬，偏留解詁註公羊。經生自富千秋業，學海終輸百谷王。莫怪操戈入室康，成旗陣本堂堂。

許慎

后蒼書契肇萌芽，孰爲形聲解謬差。叔重學能開訓詁，文字獨揭菁華五。經異義無雙品，兩漢通儒共幾家。本是西曹南閣選，不徒東觀侍臣誇。

鄭元

師事季常吾道東，黨人禍起隱嵩蓬。一從講舍傳高鄭，再立名鄉號鄭公。白首難忘箋注日，黃巾轉避老儒風。更餘雅意通都少，婢解詩篇作女紅。

詠銅梁八景

龍隄春躍 龍門堤在南城外明月湖西

長隄百尺亘龍門玉鮒銀鱗逐浪奔欲藉春風成畫鯉也從秋水躍靈鯤桃花二月紅添漲楊柳千條綠到村畫裏江城何處是蟾光初上釣磯痕

仙樓望遠

望仙樓在西城外今圯

虛空不信有神仙一望何從結妙緣幻想多因名士搆危橋高樹獨峯顛天邊旭影搖銀海眼底嵐光照玉泉幾輩西郊同覽勝倘逢黃鶴下翩翩

崆峒傳書

崆峒在縣東南二十里舊傳爲廣成子傳書處

不須隴右訪崆峒到處名山有妙宮在昔廣成傳鶴籙何年巴子閱蠶叢玲瓏怪石千花鏤曲折清溪一穴通牀榻分明人去渺長生寶訣亦空空

金鐘送曙

金鐘寺在舊縣山形若覆鐘一說古有神鐘飛入寺中因名

神鐘天半忽飛來古剎題名亦誕哉鯨擊一聲天下曉雞羣三唱日輪開峯前恍聽寒山寺飯後誰憐鎮將才莫向珠林頻側耳黃梁好夢怕驚回

爐峯殘雪

香爐石在巴嶽絕頂三冬晴雪不減西山

紫烟一縷上青霄，贏得香爐石號標。
殘雪晴開諸障霧，祥雲曉護百靈朝。
冬寒快覩瓊花燦，春近翻憐玉樹凋。
三十五峯高絕處，琉璃世界倩誰描。

木蓮呈瑞

巴嶽山之漱玉溪有木蓮一本高五六丈相傳張三丰所植冷大蒙舉京兆試花開七葉於是領鄉荐者六人因以爲驗

靈根乞向華山阿，記取花時報甲科。
七葉曾添京兆榜，三丰舊植玉溪河。
開同菡萏池中異，瑞比芙蓉鏡下多。
巴嶽從來饒異產，奇胎那羨樹婆羅。

聖燈夜照

聖燈山在縣西四十里巖間夜有祥先僧人於此建寺

禪關宵火雜螢流，古佛燃燈在上頭。
大地山河歸照鑒，滿天星斗共沉浮。
山僧未許焚膏繼，旅客常欣秉燭遊。
漫說金銀騰寶氣，人間原自有丹邱。

巖懸千佛

千佛巖在北郭外西泉山下

名經千佛笑酸寒，真像今從壁上觀。
證果幾人留粟影，懸空大坐破蒲團。
清池皓月禪心定，鬼斧神工變相看。
巴水東來參偈語，西泉山下問旃檀。

贈范儀甫廣文二十四韻

時任合州學正

夕陽下花塢，晚鴉噪林薄。
我有素心人，天半飛鳧落。
相見各驚喜，廿紀吁離索。
遍詢舊游侶，同舟賸李郭。
憶昔別鱣堂，識君坐東閣。
契交俱妙年，意氣雲霄託。
妖星亘梁萬樓峯，促歸棹。
珍木避金丸，去如摩天鶴。
遠睽遂十年，一

晤錦城樂再值公車返南浦征帆泊劉伶畫舫中劉敦翁書畫舫中藉對鷓鴣杓更闌話不休露冷江城柝分手天一涯

斗指參商若薊北逢孝與問訊君矍鑠惜彼僮才一官摧花萼繼此音益涉魚雁沉絕壑顧余樗櫟質冷齋甘

藜藿胡爲玉堂仙亦乘赤水鐸盛年期許事蕭蕭風掃籜良會不偶然終慰平生約釣魚古堅城璣璞有謀度坐

令蒙古軍十萬旋沙漠時勢令艱危壯心那無躍莫憐齒髮衰與君策七略

和李光甫寄懷原韻

時寄六十壽聯聯云詩史有名問周甲佳期待過重陽三日文章更老得長庚細論快添美酒一尊

天半朱霞至開聯愧弗禁一年分手意百里介眉心春寄江南使情移海上琴新詩勞遠賦咳唾有遺音

程仁菴至自成都揭曉後送之旋里

南宮舊族君應似泗水門墻我不如兩地親情同沆漚十年旅況隔屏諸纔欣聚首翻愁別爲動歸心轉覺疎蓉

院微名何介介匡時大策要能儲

南浦舟中留別程雨村先翁舅弟暨仁菴旭初西漁三甥兼示燦兒

祿陔兩從子

秋來春去身如雁戊戌十月回萬會少離多跡似萍外戚獨君俱髮白墻僚三子尙羶青贈行同酌巴江水垂老

已亥正月返銅羞題吏隱亭但最宗文戀親舊竹林好語一時聽祿陔無成就

和潼川倭郡伯來袞堂讌集原韻

三臺九曲漾霏微畫裏江城一覽歸亭起醉翁歐永叔詩題宣郡謝元暉登樓不盡鶯花賞聽苗還看魚藻依臣甫倘陪巖坐飲希將袞職補荷衣

十載巴川建樹微三鱣冷落苦思歸草堂未遂百花浣山郭徒瞻萬壽暉來衰堂後有萬壽山當道郵車橫已遍投林鳥羽倦何依梓州若庇千間厦鄰境歡顏望解衣

和吳子修學使游招覺寺原韻

原韻係步其先祖制府公暨邛州牧公韻

放衙偶拄笏橫腰攬勝言尋古剎寮太史輜軒新稅駕延陵遺墨舊同條謝詩述祖添紗壁蘇偈參禪贖酒瓢風雅三朝稀遇事曲高未許和聲囂

愧無金帶早圍腰游讖名山厠勝寮花雨寒林空萬樹木天秋意想千條年來患伏荆榛路方外間分茶竈瓢翹首海疆差報慰粵南聞已靖任囂

會垣驗看未竣久寓淨慈寺卽用前韻一首

時姪藩同寓

無端瘦減沈郎腰走馬蓉城憇佛寮時事日非猶考績侯門風靜不鳴條守株已過秋三伏食菴仍甘飲一瓢賴有阿咸慰朝暮曇花院月共囂囂

龍泉驛道中

遠山含霧白連天下界溟濛積雨懸潦水千潭淹馬跡郵程十里黯龍泉阮孚着屐游終阻墨子回車反又旋高

臥義皇人幾輩不知世路有連遭

石礪渡

石橋渡行何暮江水茫茫望焉却步舟子逍遙河上游行人踏踏齊登舟擔簞躡屨履滿屋舟子睨之心弗足落
日欲沒簡山西車馬不來望斷目倉皇移客過鄰船鄰船主人新叩舷容與中流三十里飛龍古寺更柝起沿溪
蘆葦白蕭蕭滿天星斗沉江底主人泊岸笑索錢爲言得錢飽餐眠我有室家待我哺今日櫓搖昨纜牽渠船恃
大能容衆未徵千錢潮不弄詎知流連五日期妻兒嗷嗷噎屢空吁嗟此語近諧謔貪廉勤惰胥自作人生知足
不偷閒那得饑寒轉徙溝壑間

憫丐子

簞枯豆絕厄不死泥塗尙眠兩丐子丐子一壯一少年垢面裸身空拳朝來不糴太倉米但丐父老杖頭錢得
錢急市罌粟漿頽然臥地相對床箠障瓦檠潦草具此身算入極樂鄉須臾輕烟分道出不乞播間已果腹席地
喃喃說風月弄掌掀眉意態足先時何衰今何旺兩丐子亦笑相向得食則生不則死罌粟稻梁無二理阿芙蓉
中至味存噉飯之人疇解此我憐丐子強解嘲青年絕粒命輕拋瞬息骨焦肝腦燼有人畚畝待荒郊

販牛歌

泥滑滑來蹋蹋誰謂爾無牛十里百里同倦遊朝發黃楊坂暮上青楓谷何處水草何處餐誰家茅場誰家宿風

颶颶兩淒淒屢一筐燈一提關河隨牛渡霜露伴牛棲黃犢已飯人未飯今日東頭明又西何來狂童不解事與牛爭路鞭牛背可憐日夕勤服役努力一鞭人心碎牛亦愁童亦頑不知買牛賴耕田白馬金鞍多富兒誰復稼穡問艱難牛兮牛兮辱筆楚那識販牛人更苦

輿夫謠

讓路讓路左盼右顧後有狹圩前無闊步兩車相值賤合遜貴兩貴相值後噤者退不噤即相凌握拳奮齒強梁氣增亦有牛人日常爭道樵牛以杵牛人嗔惱輿夫罔顧意概揚揚謂我辟易千人莫當昨者擔簦兀來犯我我揮之肱立仆道左某年月日我御某官某不我讓大飽我拳余謂輿夫汝無云爾子不讓人人就讓子兩讓則和兩爭則忿斃物償財斃人償命汝恃官符官不同惡但用汝力非助汝虐天道持平凶人弗宥汝不改轍天將汝覆汝視達官神怡氣下鎮日車中疇遭怒罵輿夫聞言愀然有思垂頭無語手弄竹枝

讀王也樵大令聊園詩三十韻

金石激洪鏗絲竹發清響天籟假之鳴性靈資學養自從風雅衰漢魏橫流澆建安迄元嘉滕薛疇爭長盛唐起頽波盪開陳梁漿少陵才匪奇律細古無兩譬彼王者師步法先究講又如國手棋着子懲鹵莽侈口競豪吟無法終莽盪吾蜀眉山坡瑰瑋特倣儻就中繩墨持輦服馭馴象餘子門戶紛瑣瑣吾安放王君經世才循名陋張敞秦中一報最高別仙人掌五年錦里歸泯滅出山想聊園數弓地蕭然絕塵鞅陶令菊籬開酒懷日增爽得醉

便吟哦錦囊句欣賞大集屢益寸髻蘇得髭仿中有放浪吟巨壑縱修鱗醇語正襟談神姦燭魍魎或秀如蛾眉
或潔如鶴氅逸若魚在淵超若鴻脫網感事樂府新罪言尤忠讜輜軒探者誰勿以詩案枉我今草堂游三接先
生杖言論丰采餘玉山行朗朗歸携一卷書心儀漢疏廣酣歌謝塵事高躅風吾黨今古幾傳人期君霄漢上

賀王方伯新陟皖撫暨六十生辰 代李篠青大令

喜承丹詔撫河汾先陟山西巡撫後改安徽旋報皖南簡命分帝念江淮需碩輔天生申甫贊元勳樓船西下雲開霽節鉞東

行塞靖氛潛水桐山遙拱衛尊周事業賴桓文

巡宣曩歲益州來電爍雷轟掃劫灰河朔未煩張叔定淮西終待晉公開大邑余壘議撫久無成功公至始降焉受降城上朝傳檄

籌筆驛邊夜舉杯檠戟纔臨烽燹滅螳螂奮臂笑鴛鴦

元惡歸誠蜀難平大邦屏翰卽長城蘇章按部聲威遠劉晏權財掌計精庫有積帑資廣濟吏無苛虎見澄清錦

江千里民康阜知是嚴公鎮撫成

生佛真稱百萬家九如歌頌餽皇華碧鷄坊進延年酒玉馬池呈益算花壽相幾人躋上齒福星一路擁高牙風

塵末吏同蓬首長祝三臺照海涯

次韻盧芹臺香雪山館早梅感賦之作

獨立蒼茫飛遠眺七國縱橫敗合約將帥幾人支危局頗牧齡衰甘羅少津門百里新瓌灰屍山血海羌誰料六

龍西幸走榛莽滹沱瀾翻五臺峭薄海臣民憤欲死啼哭不得那能笑玉川才子尙逸情新吟打破葫蘆窠言觀
香雪舊山館八月梅花神畢肖主人好客邀清賞要譜玉笛江城調當時我亦佐賓筵憂危竟忘花四照五日讀
詩乍解愁化機剝復關元妙雨露無私物有情得氣先者由二曜旁人艷說觀國光我知巢父頭必掉好花開早
家之肥何與囊弓刀入鞘但說邊隅景氣佳戰場勿促李文弔各慎封守固皇輿東京會讀中興詔相臣調鼎軍
解渴此花光遠他或耀寒時再放兩三枝管領春風南北要

奉酬謝仙莊農部重九後五日見壽之作 卽依原韻贈別

蒲柳遭秋已換形冷齋兀坐一甌青移山氣力成朝露逝水年華感歲星鄭舍傳經空養晦陶籬載酒枉延齡新
詩爲我增憾景慙愧黃花晚不馨

昔年盛氣望三台賈策劉封唾手裁不信蟾蜍終晦影偏令騏驎呈才盧生夢早邯鄲醒楊震官徒教授來忽
忽華顛成白首誰憐顏駟竟樗材

欲掃勾奴不顧身馮唐歲老合韜真螳螂奮臂嗆當道豺虎磨牙憤比鄰世亂足無桴浮海時危心似幕巢人眼
前馬齒頻加長愁看間庭骨肉親

君是工書王獻之妙年清秩最堪思韓賓職僅郎官選高構才猶民部師聞說公車星夙駕竭來周道日倭遲驛
驢此去前程遠珍重司農補漏卮

題李仲笏兵部焦巖仰止圖

萬事天空不偶然觀瀾閣上緝真緣卅年契語禪僧證道破鄴侯是散仙仲笏少時隨雨亭尚書至焦山訪彭書琴彭因屬對以羣流波靡四字笏答曰

萬事天空彭大擊賞後三十年再至焦山山僧六靜曰此即觀瀾閣中與彭剛直屬對之李公子也

鎮江門戶峙金焦閫帥當年障節謂剛直駐節焦山河嶽不殊風景異知君神往海天遙

題仲笏頤園幽谷自馨圖

混濁乾坤滿幽園矯獨清東山零雨望香草美人情風雅幾儕輩行藏有重輕北來問邊事信否未增兵

題賴康平母夫人篝燈課子圖

燈熒熒夜冥冥紡聲書聲和一庭聽階前風雨寒漏東丁解一

手中線身上衣兒不輟讀母不下機夜深燼落掩雙扉莫問人間是非解二

兒名成母心慰兒不官母心豫問母何所豫宦海風波征途遠慮不如兒不去所宵完聚解三

繪圖伊何篝燈寫狀徵題伊何慈幃供養看繞屋扶疎百年無恙執經來前有白髮儻然堂上解四

忽忽十年滄海桑田母蓋厭塵世兒者恨終天風景不殊時事遷旁人展卷亦潛然誰讀蓼莪賦貿然終篇解五

節孝李母林人題辭 仲笏嫂氏

奇節不訓後至道本庸德家有淑女賢婉婉璇規則自從正氣衰士夫習反側坤貞獨抱一陶范行超特近代庸

未希所難在弱克惟柔幽閒質詩禮心先得上承舅姑志聽瞻泥形色中與所天矢寸誠金石勒其下撫雛孤養駒空冀北婆幃三善備完人已不忒況乃家政殷齊之如治國綜理相內外持籌勤日昃金張許史廬甥務紛莫測自非治劇才那勿病偃仄餘力作施濟沾被平豐嗇貧家婦難爲貴盛亦增慙鄉里月旦評幾人免稽劾緬懷林下風蘭幽難默默

張式卿聲楷母夫人劉七十壽詩

熊丸食仲郢艱苦成名儒不艷嗣子賢心欽母氏劬末俗名節輕慮澹遺孤雛況復嚴懿教百里一媛無執綉習身逸窶兒迫口餬畫荻人不作浪子吟都嚮父書一萬卷疇與迪童鳥世亂學益微逸材相遇疎阿母識慮精斷機有遺模訓子孝廉舉驪驅騁前途奮思曠代名挾策陋張蘇盤鼎爭著作駸駸古爲徒異時文苑中顯揚非細圖持茲觴母壽旌節猶未膚南山松柏辭未許濫觴摹

題毛价人維藩淵明歸隱圖畫扇

丙午四月由嘉定請假回萬福芝泉郡伯期以必來毛价人少尉亦持畫扇要之閏四月返嘉轉贈价人便面价人復作圖跋有挂冠歸栗里之語予因戲題卷末而价人頗覺芥蒂也亟洩張子明廣文

附詩爲解且更絹改繪易其挂冠二語於是羅蔭符香綬孝廉楊仲泉國衡茂才均繫以詩一時傳爲佳話

我贈毛君齊紈素毛君設色仍惠我芭蕉葉大葦蘆肥菊黃如金紅如火行人一路燦花香中有老翁笑頤朶挂

杖拈髭踏踏來靖節先生省識果招邀約度板橋西秋水一泓山一抹指點柴桑舊隱廬芝草闌干垂鐵鎖彭澤風景一何頭雲泥轉瞬眞相左毛君此圖殊有思諷我早歸故園可我今歸去復歸來爲踐前言重一諾人生知遇良獨難感激馳驅非瑣瑣明年且看鶴高翔雲樹千山松萬顆

和夾江劉星南光閣嘉州見贈原韻 時監督中學堂工程所

年來月落已雲停鴻雪無端得典刑高帝子孫原謹厚漢嘉山水自清靈少陵寓蜀頭先白阮籍逢俗眼更青讀罷瑤篇神契遠會須問字子雲亭時充本縣學堂校長

張志和鴻祥子明三子以前詩來和仍用原韻答之

落紙揮毫手弗停知君草聖有前型仙才自是三峯裔妙句還分萬景靈可惜劉蕢歸帳絳徒令杜牧坐氈青不然一唱徵雙和題遍烏尤爾雅亭

登嘉定凌雲山追憶舊游用前制府惠瑤圃尙書讌集清音亭二十

韻依次步之

憶昔歲戊午白舫出益州時維秋九朔蕭蕭蘆荻洲翹首仰凌雲同人壺榼游坡坨四五盤苔潤梯如油漢豐張

李生開縣張儀雲李海樓皆與芒鞋引繩兜劉子紀三撒手行陳文繼堂法道修我乃攀蘿壁失足去復收力挽予季棠村登道逢數

緇流相邀陟絕頂古跡徧收求更上樓一層俯視紅塵浮中有泥像兩東坡侶子由髻齡讀書處於此契深幽瞻

拜肅起敬前型在遐陬徘徊日將暝碑碣未全搜倉忙下歸船纜渡水悠悠夏秋水漲兩岸率纜而渡橫流壓巨舶坻拒衆力
休陳丈橋舌言此險勝危橋忽忽五十年同人盡山邱嗣余舟七過風利無淹留今春秉郡鐸訪舊乘扁舟肩輿
憩佛寺苦茗當珍饈出寮舍車行徑仄腰脚愁佛巖聽水鳴音響發微謳遙望漢嘉城如覘海屋籌一路摩崖石
珍瓏豎蛟虬再瞻二蘇儀愴然觸前憂公仍花萼輝我偏折翼羞兼以七十翁缺齒昏雙眸微官抱清冷那無迫
督郵會別山靈去歸風御石尤

張志和復和前韻再疊一首

和詩寫就管初停忽報三郎再示型甘井有源君不竭黃楊陀我閨無靈自知老景駒光白不似英才爐火青珍
重盛年勤遠到休矜物表已亭亭

羅印符孝廉依前韻見贈一首仍用其意

見誰中朝科舉停普天興學構模型嘉州亦藉先生甫橫舍來胎試院靈中學堂以考棚改作難得諸公嫺土木
同事有張子明廣文藍敬庵古威侯楊仲泉茂才張鏡湖司馬惟唐淵如竟歸道山毛价人少尉君今且庇千間厦莫黎長亭較短亭

張子明廣文索和五疊前韻

相當旗鼓競無停斫陣飛來老將型直易文場作戰壘何期妙語燦仙靈幾人鬪捷室生白一笑開門山對青詠
事工程兩忙煞此間大是勞勞亭

蔭符再示和詩六疊前韻

原作擬入都考職情見於詩

太學皇都詔未停一朝規制萬方型神仙何必定三島麟鳳終須效四靈過海風潮浮大白盤根松柏要長青書生不識吾宗教踢倒東坡載酒亭

印符詩請息戰七疊前韻

詠事昨宵戰已停兩詩忽又示儀型特君入斗才無竭累我七旬竅不靈門韻難搆高手白匡時合遜狀頭青從今息戰着鞭去勸駕來催畫壁亭

謝仙莊以詩稿乞政題詞奉答

三十年前京華旅乃翁示我詩百帙一千里外漢嘉還仙郎郵詩來薊北風騷濟美信逸才宦情鄉思海天開嗟予老觸興衰感吟望津門浩淼哀

九日陪福芝泉郡伯潤暨壽筠諸公子毛少尉尙雨村琴客登萬景

亭

翹我足者振衣來陟千仞岡縱我目者借鏡來收千里橋岷江滾滾滙涪水揭眉鳥尤羅列几案旁南樓庾公興不淺公子聯翩盡妙選招邀賓從此登臨放懷今古寥天遠座中忽動伯牙琴高山流水有知音太華峯頭無此

趣撐開眼界放平心

郡伯出千里鏡望遠雨村撫弦五操傍晚始歸

贈賈如虹 文聚江蘇南漕人理化專門

賈君意氣真如虹，下窮地圓上天空。覃思冥想五洲外，萬理億化蟠心胸。游藝申江十二載，五年荆漢發痴癡。挾策有時走關外，匹馬衝寒塵北風。吉林開化歸燕薊，劉熊史易鄉人逢。吾家小阮采聲譽，輪船禮聘來蜀東。入門握手見如故，時間讜論驚豪雄。微物纖微辨至理，日擁皋比讀元宗。安得置身九霄上，君握管窺蒼穹。

銅梁學署東齋用東坡韻

春風噓淑氣，草色碧逾藍。佳蔬間籬落，種植高下堪。老圃兩三家，炊爨情未慙。晨興浙精米，入水去其泔。婦孺汲古井，汪汪清潭細。徑達曲巷遙，對東山南中凹四圍凸。居人同海涵，有土各盡力。所求遂不貪，嗷嗷哺數口。遑希旨與甘，彼市廛中逐。欲日耽耽我，來五載餘。此景常縱探，曉延朝爽入。短竹綠簦簦，傾視危樓下。石罅見螺蚶，條柔纒盈握。那足飼春蠶，小孫頗好弄。采采不盈籃，時防倚巖壁。板屋未能戡，頗聞前主人置檻收煙嵐。走道通外垣，垂柳拂毳毳。榻來半傾圯，削弱等毛疇。惟餘榕樹陰，朝暮噪鶉鷄。我生不喜事，營造非所矧。金石土木工，厥官休問鄰。但有二椽屋，講舍足包含。況復游覽地，寓目日常詣。佳客偶傾座，開軒縱清談。興盡各言反，安步無停驂。倦時此靜憩，尚可禪悅參。譬陟苑委山，金泥發石函。化機不在遠，俯拾徑三三。何以鼓詩腸，黃鳥鳴聲鱗。

嘉州學解題壁

東坡願爲漢嘉守，凌雲山頭時載酒。今我來監郡學官，一堂恰對峯巒九。榜山橫列几案前，堂高垣低窮林藪。俯

瞰重城一萬家海棠荔枝雜榆柳隔江塔影悄飛來烟嵐雲氣塞虛牖鳥尤近在南山偏神龍藏尾獨見首巖前

大佛掉臂行不向北郭開笑口府治在岷江之北日撼沫青三河流沫江青衣江岷江三水匯於大佛巖壁浪捶濤驅東走青蒼遙

指二千蘇亭載讀書人不朽曩年結伴一登樓仰瞻遺像欽尙友凌雲山讀書樓中有二蘇少像憑欄曾縱千里目大裁小峨如

岫墮置身恍疑九霄上手捧日月捫星斗陳迹忽忽五十秋大地浮雲變蒼狗朝來對宇憶疇昔前賢咫尺緣非

偶欲向青山談世事大雅不作吾衰久且復謝客書閉門嘯月吟風偕鄰叟回頭更望高幃山萬景樓臺在肩肘

高幃山爲學署主山上有萬景樓俯瞰三河匯流

和顏少眉照奎同年留別都門八旗學堂四首原韻時領嘉定府貨釐局

乍逢萍水交忘年石上三生有妙緣縞帶新從裁浦緜詩筒舊自薊門傳當時教澤成雙契此日流風化十愆忽

忽韶光逾五載驂騶道上祖鞭先

燕趙北來劍閣西名橋又見長卿題一官蜀國盤根器百里侯封障水隄大尹秩原金簡重中書銜本玉堂齊頗

聞帥府需殷久不借推賢客滑稽

漢嘉山水釐關雄檢校商船征比同剔弊無私如朗月原情有術卽仁風何須司馬彈新法自異宏羊飭屢豐考

績明年應報最知君不艷計臣功

我慚冷署景清涼人老官閒去日長手縮銅章仍放棄才叨玉尺枉評量徒看卓茂成循吏大笑蘇湖是舊章讀

罷高吟難和郢下風甘拜索枯腸

六月十六日驟雨

十九爲觀音誕辰前二日
必有雨驗川省俗傳皆然

雷聲隱隱作龍吼霹靂破空金蛇走赤日常空忽蔽遮濃雲如墨塞天口狂風捲地花草折十丈紅塵橫吹垢傾
盆雨勢漫山來急撒如珠掃如帚路人奔避踉蹌行皇皇畏尾復畏首河魚陡落淵水深鳥飛獸散匿林藪土人
浪說觀音暴滂沱應期十八九須臾霧捲烟復收雲亦到山藏高阜涼颼徐徐解鬱蒸炎景消歸無何有起視白
衣古仙人靜夜蓮臺對星斗

題望眉草堂詩文集

顏少眉尊人義宣廣西郡守

先生政事文章美大集聯翩錦繡羅學擅百家唐吏部才宏一代宋東坡公庭布化循聲遠案牘餘閒逸興多
獨秀峯頭時載筆潘江陸海壯湘河

新詩十卷重南金紙貴洛陽盡賞音得句每從桃李夜擅場最是梓喬吟龍尾詞連鳳尾續望眉人古少眉今讀
遍義山甲乙集羨公兩代作甘霖

少眉兩次和詩再疊前韻奉答

瑤篇盥誦剛心醉又見雲章下大羅友贈實難酬玉佩君才真可直金坡筆無停趣浮烟少案有清詞暇日多汨
汨滔滔遏不得崑源千里赴黃河

交情如玉式如金文字爲緣繙爾音但得蘇黃留俊賞不嫌元白鬪新吟天心何日清寰海世態浮雲變古今我是桑榆年已暮看君歲旱作祥霖

和胡性皆丙南府佐見贈之作性皆湖北安陸副貢

寅僚一晤定真知難得虛心竹是師別駕頭銜原寵異郢中齒錄况瑰奇陳蕃就職何嫌掾蘇軾留杭例有詩君本達人輕宦味淵懷久化貪嗔癡

髻年我亦負時名腰束曾期玉帶橫日月梭忙催八口風雲路遠昧雙睛祇今教授慙胡瑗空說武城重滅明白髮難從參佐後聊將巴曲當歌賡

顏少眉調達縣經徵詩以誌別卽和原韻六首

延年雅詠屢先施迫煞榆間杜牧之和草剛憑鴻雁影新詩又綴鳳凰枝錫來六律聲諸呂聽取八音竹並絲留別旗亭應畫壁黃河高唱幾人知

劉晏征商未及年餘三餘一早空前新章那許釐毫重舊冊偏能鍼孔穿聞說嘉關無怨滯可知惠政有經權方今賈舶愁胥吏難得仁人解倒懸

釐金例達廣儲司報最先邀大府知一自羨餘膺上考竟從優異捷秋期達州在昔稱膏壤委檄新來賀玉卮可惜安鄉之地主暮雲欲贈不堪持

詩來告別素心人東下扁舟景物親
白傅江州祠尚在武侯瀘水渡原真
巴江聽雨連三峽蜀道觀風當八珍
直向魚泉戒行李郵花驛樹問前因

經徵一局賴人存萬井民田不藉屯
隱稅疇能干憲典緩征自可適琴樽
政無苛虎官如願吏有貪狼客斷魂
果拙催科天亦眷輸時踴躍到公門

秋風瑟瑟雁南征載酒嘉陽一贈行
半載知音聯庾鮑同年偶語類蘇程
相逢萍水聚還散別後雪泥印更生
珍重蜀民勞撫字未須折柳繫離情

畚經館文鈔三卷

畚經館文鈔全卷目錄

杜峙三觀察五十壽序

王公應開墓誌銘

冉母劉孺人墓誌銘

祭岳母程孺人文

左公映奎壽言

賀卓齋封翁墓誌銘

蒯子範郡伯六十壽序

熊公壽序

王會之明經墓誌銘

桂宮碑記

誅王升甫孝廉文

張公天貴傳

畚經館文鈔全卷目錄

甯經館文鈔全卷目錄

本宗族譜序

魏氏族譜序

陳緝菴先生七秩壽序

族兄令德七十壽序

重修鎮江閣碑序

賴湘波詩序

假齋文存例言

游德菴司馬五十壽序

陳緝菴先生家傳

王母夏孺人墓誌銘

文遵先傳

劉敦山先生樗北詩存叙

樗北詩存序

永濟橋記

王保卿司馬榕莊詩集序

李章甫大令墓表

李雨三明府五十雙壽序

劉青舫蕭齋詩錄序

封員王公墓誌銘

明貴州思南府知府程公事略

明四川北兵備道程公行狀

雲南永北廳同知程公墓誌銘

二程處士傳

程氏族譜弁言

楊碩甫明府壽序

廖節婦事略

補葺大成殿記

自新所記 以上卷一

畚經館文鈔全卷目錄

畬經館文鈔全卷目錄

白巖書院記

王樓山先生詩集序

楊母余太夫人八十壽序

堂伯母陶太孺人八十壽序

廖母蕭太恭人八十壽序

蕭績山七十壽序

謝芾堂中書六十壽序

謝偉堂司李家傳

重修成慶門外武廟碑記

吳厚甫明經感應篇時文序

綵虹橋記

上黎蕤齋觀察書

李善卿學博七十壽序

李光甫廣文讀書臺記

崇善閣記

書馬孝廉昌暨女弟鳳琳傳後

黎菴齋觀察六十壽序

李太孺人事略

成慶門外武廟落成記

致陳子臧明府書

馮協中繪事筆目議

春秋大夫賜諡說

杜母張太淑人六十有六壽序

劉青舫傳

送桂篤生明府之任忠州序

范叔柎明府德政序

杜廣文傳

劉先生傳

畚經館文鈔全卷目錄

畚經館文鈔全卷目錄

劉孝廉傳

李曉嵐墓誌銘

李春芳墓誌銘

周母張孺人六秩壽序

陳眉生封君家傳

致范叔柎明府書

送范叔柎明府卸任銅梁序

李筱青明府德政序 以上卷二

又

彭母熊太宜人七秩壽序

重刻幼學歌序

重刻韻字鑑序

溱鳳五文集序

曾修誠傳

劉公六十壽序

謝母賀孺人六十壽序

李觀察傳

從伯父熙亭夫子墓誌銘

本宗祠堂記

歐陽佩玉都戎六秩雙壽序

朱孺人墓誌銘

王宜人墓誌銘

奉政府君墓表

奉政棠村君墓誌銘

彭安人墓誌銘

賴劍亭先生讀史贅言序

方和齋郡伯五秩晉四壽序

鍾受白明府迴天集覽序

畚經館文鈔全卷目錄

甯經館文鈔全卷目錄

三節母傳

代本府福芝泉郡伯致屬縣諸令書

羅母雷太宜人七十壽序

新建嘉定府中學堂記

賈徵君墓誌銘

則梅山房叢書叙

補修分水大道記

何母秦太恭人墓表

州同銜左聘三暨德配六十壽序

方炳南種菊軒畫譜序

開縣鄢宗顯墓誌銘

鍾餘慶六十壽言

致左逸仙刑部書 以上卷三

畚經館文鈔卷之一

萬縣杜煥章成軒著

杜峙三觀察五十壽序

客有問於余曰邑乘士女志中何以編累世積善也予曰前人行之後人踵之孝子順孫相觀而起所以風世厲俗也客曰何以唯蔣氏杜氏也曰盛名易實行難春秋之法無濫予焉然則叙杜氏何以獨詳其於峙三觀察也浮之三四言而止不亦諛乎余應之曰若猶以爲略也子獨不見工師營材乎其鉅焉者必節稅而棗棟之遺其雕鏤文飾以待百氏之補苴也夫道人之善者惜齒牙之餘紀人之美者厭文字之繁是猶工師度木而百氏不盡其用也今子疑邑乘諛峙三公是誠未知峙三公也間嘗取邑乘讀之有曰道光初捐修佛寺舖沓水二橋矣而八年後捐辦平糶全活萬人之事尙從略也有曰治東郭創建試院三年落成計輸錢萬六千餘緡矣而年四十時以千金散族人并囊資陰給貧戶歲暮以爲常邑人因之爲濟蠟局者尙無聞也有日小西門外連被回祿西山觀側災成豐初城堡數次火前後賑給錢千餘緡矣而咸豐庚申大水同治庚午大水兩設拯溺首先捐助之舉亦不及載也至軍餉有輸籌防有費賓興全貞有助皆據邑人所共知倡捐鉅數者言之其他篤戚舊濟急危矜孤寡救災患陰行之善實有難更僕數者今夫國家多事之秋其民亦皇皇焉以貧之爲慮天時乖之人

事違之奮其飢寒困苦之身以與富室爭飽煖倉卒嘯聚千百爲羣常有岌岌不可終日者有周其急者則亦舍哺鼓腹相安無事而不復意外之虞然則利人濟物之事正所以培國脉而靖民心而時三公之汲汲於此者誠見乎其大誠慮乎其遠也區區樂善好施之行慷慨者類能之公豈藉此以博名高哉公天資卓越而性閒靜喜讀書經史詩文字書圖畫占相醫方之學靡不研求與邑明經胡靜甫友善三十餘年不廢學以故舉事識大體民義所當爲者貧者憚於力富者吝於財公獨毅然爲之而人卒效其後良由質地過人而詩書之氣多也嘗侍庶母疾藥餌診視必躬親之兩月餘無倦容先是公少失怙恃每以未盡孝養爲戚故事庶祖母庶母維謹生平不言人過不以富貴矜侮人虛已接物見人善輒自愧弗及也以建試院捐軍餉功累職至觀察使而無意仕進燕居林下惟以筆墨怡情暇日則賦詩作畫習篆隸書而已由是觀之邑志所載三百四言有諛詞乎客曰諾吾固知時三公必有異也聞公嘗艱於嗣今長君舉茂才次亦風標俊出者殆天所以報善人歟公年今五十有三子知且悉盍書其言爲壽孔子曰五十以學易可以無大過矣如公者其庶幾乎

王公應開墓誌銘

公諱應開字某邑之龍山人也少讀書穎達逾恆士塾師咸器許之由從九銜貢人成均而性簡淡不求仕進隱於龍山之麓朝督耕暮歸讀有用書或山而樵或水而漁減食損用以相勤苦居無何積累鉅萬治田千百頃有奇猗頓氏之治生不是過也世嘗謂勸業難於守成余竊違之誠以創業者艱苦備嘗少能振拔卽不至於貧窶

若夫紈袴子弟履厚席豐耳習之而成聲目安之而爲色求其棄華歸樸去奢從儉得保先人餘業蓋亦難矣而又較盛之豈不百中一二哉而公以故家子觀光揚烈篤先裕後所謂以守成爲創業者不其偉歟咸豐季年公三築碉寨避賊其後卒免於難殆明哲保身人也以同治戊辰季冬歿於寢享壽五十有二其明年葬於居室之北越三年而墓治嗣男一統成國子監學次一緒次一經次一綸先後入武庠最少者一綱也五人者皆偉然有丈夫氣他日席公之業而創守之則王氏之興其可限量也歟銘曰龍寶之山江水遠溯鸞飛鳳舞增其式廓篤生哲人迅發祥祉菁英之洩鄉邦之美一莖獨秀五桂聯芬流光積厚不忝前人公有名閭里覃之公有世德奕禩繇之於此焉宅於此焉穴河帶山礪永茲輿脈

冉母劉孺人墓誌銘

孺人姓劉氏太學冉公天慶次配也冉公長無嗣擇邑女之淑者而測其室故孺人得歸公有嫡孺人在室孺人事之維謹飲食衣服出入起居之節無鉅細皆下之於是鄉里咸知孺人之賢而益歎孺人之守禮爲不可及也歸逾年生子其瑄其瓚其瑜其璠四人者各蕃育其子孫厥衍瓜繇稱極盛焉夫樛木之詩以妃嬪承順嫡后而不自僭越遂使繼詠螽斯有誥誥振振之慶厥後麟趾徵祥罔后妃之德隆亦衆媵之能讓也而後世每以此爲諱豈知母以子貴爲春秋所專美哉世之躡合者或不能成子姓能成子姓者或不能要其終而孺人以嗣以續成始成終然則古之賢媛不過是也生於嘉慶乙亥某月卒於咸豐己未某月享年四十五歲葬於某山之麓

以子其瑄其瓚貴例得贈孺人於是表之於墓亦以見孺人之賢而有後也銘曰孺人宅兆於茲既成孔安俾宜其孫子

祭岳母程孺人文

維同治十有二年二月晦日我程府岳母劉太孺人出葬於梅花之嶺其前夕孝子將設祖餞割牲以祭於是子壻某藉張几筵奠於靈而哭之嗚呼某少孤猥厠坦席蒙愛逾恆垂三十年世居城邑旬而來覲溪梁往還無間風雨壯歲多故晤少別親內子不年中道解襦閱我捐偶破涕爲藉乃昏繼室視儔所育誕有子女月日存問不幸離徙候省良艱載瞻衡宇雲峯層隔惟餘慈照初終弗渝相期異時追侍前歡親情倏盡不圖此厄去夏云病式經秋冬我四來謁盡日晤語謂天相吉厄盡當瘳臘日浴佛而乃證果我有諸母爲母伯姊去母一月繼作陳人煢煢在殯昨哭荒丘揮涕素帷又膺斯痛人生代謝回首奚堪明日山岳仰瞻無極

左公映奎壽言 代王舅作

左公映奎內兄以同治戊辰九月誕期觴賓於天城山之別舍是年六十有三矣嗣君翼丞舉爵進席屬余爲言余維公少孤依母氏成立伯仲三析筭後皆淚家人業配陳氏性淑且慧故其時內助之力爲多陳沒公不復娶人競謂公之篤於情也且夫夫婦之道參配陰陽婦執節夫守義立教雖殊風世則一當世仕宦勳閥以逮輿臺僕隸時有節婦貞媛一二族鄉曲無賢與不肖皆欽誦之朝廷亦寵其名實而旌之而部議所釐定若於義夫爲

略豈不以其事爲人所難著之爲令恐迂曲下士希冀其寵榮不復避無後之議若夫有子而以義自守則雖例未分疏其表章自當與節婦等賢司牧無請其事於朝者是可歎也公覺居十餘年晨昏左右唯翼承是依翼承能順意承志以是益安焉今夏六月患風疾轉側不能仁翼承據榻上侍藥挽衷拂鬚啟齒牙導口涎出唇唾浪浪流肘臂間夜則理枕簟舉扇揚風倦極則依寐時許聞聲息卽驚起燭視者彌月如常此謂唯義夫能得孝子也或曰俾翼承慎終於始公益優游頤養以期永年或曰公心如止水若松柏之耐歲寒當益壽二說也予固信之

賀卓齋封翁墓誌銘

公諱代賢字卓齋其先由湖南徙蜀至南川公有蓄德起家於萬萬遂著賀氏是爲公嫡親祖公爲贈中憲大夫盛文公仲子同母兄弟四幼敦敏以弱質善病不卒學而器識宏渾淵默儉樸無末世統袴習故人稱長者善治生以居積益致厚實盛文公沒公弟昆競爽奮揚先烈至今推巨族焉邑有創義舉者無鉅細必挽公公謀諸昆常如人意以去或猝不及謀輒陰行之往往有利人而人不省者初公之病目也夢冠帶人授以批導之術瞳遂明能療人眸子疾顧無藥餌不解方但視病者目爲語一一悔過遷善事疾輒已於是請謁如市處所愈常十百人有改行者公乃益藥爲之雖日供飲饌不惜也夫人有隱微之不善未經摘發私幸足以自匿而伏也無形其愆咎遂莫敢訶果目視而手指之雖大懲元凶亦不顯爲不肖故神道設教之事實能補王政所不及而公之假

醫目以醫世者又救時之一助也公平生多善舉里之人咸稱道之其義行探諸省志無溢美焉以同治十三年七月六日卒壽六十一歲越月來葬於茲子男三人長湘帆次湘芸湘濤湘芸以同知晉級誥封公朝議大夫孫男四曾孫子一皆赫然見頭角能繼家聲者銘曰有待而遺之無營而獲之惟吉人卜吉於斯其誰相之

簡潔駁駁入古人之室集中高品也

黎庶昌曰序事

蒯子範郡伯六十壽序 代陳緝菴師作

夔州為全川門戶重山阻隘急湍束流上負劍閣之險巴渝之固以為聲勢有事則提邊據要控制東南承平之日商舶販艘乘風濤以上下者日百千計朝廷設關稽之禁禦奸民而斥鹵之區亦復煮水為利與鄰邑離戶相爭射下護其弊上困其法故非有威信廉明識大體可畏愛者守之則一郡弗治國家經制常檢京員來任宣聖德而抒黎情焉其外僚無幸膺簡命者甚重職也郡伯蒯公以同治壬申蒞是邦至之日愛士恤民刑輕政舉甫期年而化成城故圮於水經歲不復自公來今如堅壁也商人抵關下無停舶逾時晷輒張馭去陸行負擔者相率取道於江濱江有磧曰臭鹽以雲陽鹽井故封弗浚公曰此吾民長養也若煎吾為若售諸鄰境於是奉民之飢寒無藉者以活熙常登城晚眺萬竈炊烟下涵江霧長天一色中隱隱檣帆出沒烟波之際回顧城堞高起蜿蜒如游龍秋宵月朗更柝寂然蓋商民相安者久矣夫天下之禍亂常起於有所忽而成於無所防有亂之萌無亂之迹是謂將亂以奉民數萬戶貧無聊賴者率仰鹽積為生久奪所利而禁阻之人失其業勢不至嘯聚披猖

不已而雲陽一廠與之角俾假名首難煽動旁邑內憂既作外患莫禦瞿塘雖險烏能恃哉今夫厝火公曲而突之遠而徙其薪焉弭亂之策無以尙此而吾郡六邑之陰蒙其福安耕鑿聚鄉族無烽燧之驚者曰唯公賜初公之宰長洲也常施澤於長民矣民德公爲築蒯公亭於澣墅關持數十里香花寵公行大倉州南園臺光閣故置曾文正公李相國長生位州人以政績叙祀公而三夫二州邑者敷治不逾數紀而令民若是是以合肥相國薦稱循吏召對之日帝隱眷之遂有是命當是時外員守夔天恩逾格中外以爲譁而賢士大夫則謂皇上錄賢相國知人蒯公稱職也不誠然哉不誠然哉相國出曾公門下時論以曾不失人公於相國毋乃似之自今始夔無遠近男女靡不以望相國者望公也豈唯蘇人熙託宇下有日矣比承命以經籍導郡弟子竊見此邦人士競習爲節廉齒讓之行其爲文蔚然可觀其學以六經爲根柢而旁及史漢橫舍書聲琅琅如出金石以此知學校突過前日皆公之獎掖後進課稽經古有以致之無可疑者甲戌九月爲公六秩誕辰郡諸生攜藻揚華稱祝以獻僉曰公以義行仁以學問爲經濟化始於南而行於西無有紀極唯康濟我小民又曰天文家言歲星躔翼軫分野其國恆福其人恆壽夔當翼軫之次其應在公乎於是熙與座客起瞻南極之有耀也謹奉祝詞爲公進一觴焉

黎庶昌曰起段健拔是學韓有有得者

熊公壽序

葉蘭坡孝廉少從余游好爲詩古文詞以見志其平居喜揚人善有所識輒推獎之然常無諛詞不以虛譽長浮

華也丙子春謁予於水竹之居備述其戚姻熊公事甚悉且介余一言爲公壽蘭坡之言曰熊公少孤鞠於母氏母氏有諸子皆長公事之逾恒以故大得母氏歡太孺人慮家儲之中落也命公棄儒壯歲時挾貲游湘漢間震駭風濤蒙犯霜露凡以計旨甘而已厥後家益饒太孺人亦見背哀思之情歲時之薦至老不輟蓋依依孺慕者數十年於茲又曰荆楚故多逆旅其歿無歸者往往而在公之同買某亦在歿中以其無親也鄉人將終殯之公曰是吾責也吾不歸若吾無以見若地下乃旅櫬而還之籍由是楚人皆義公一時作客子者亦願得依公爲幸又曰范希文有言不爲良相當爲良醫醫之爲術必其心有不忍於斯人而後假吾業以行吾濟時之願則不得以小道目之公挾此志久常以經商餘閒博通難素歲常以此生活人有餉之金帛者卻弗愛曰吾非以賈利也吾盡吾心焉耳貧不能治者藥之踵門叩謁者無虛日所居西界沱東鄉爲楚蜀衝要塗圯弗治行者苦之公倡募若干金昕夕經營道遂孔今之過鄉地者僉曰此某公力也公所爲大率類是其鄉里無餓莩者戚族姻婭中無乞貸不遂者其自奉則約而厚於所施是以爲難蘭坡之言如此里人慕公盛德將製錦稱觴而祝之余曰是可以祝公矣今夫家庭骨肉相聚處賓朋里黨相娛樂自謂事權不屬功德莫立日徜徉於光天化日無由發其仁義之性以與斯世周旋而門內之行又率視爲固然無復介意曾幾何時而草木同腐矣然則公之德器其養之純用之周者蓋亦自葆其天而藉以篤其祐也洪範五福之徵曰富壽康甯其要歸曰攸好德公乃兼之其杖於鄉也固宜聞公黃孺人有闔德允爲公配令嗣二人亦振一有聲者殆公之積厚致然哉余與公昧平生特以

信蘭坡者信公固知公長者惟不文不能顯公令德蘭坡躋堂之日幸爲我侑一觴焉以祝君子偕老可乎

王會之明經墓誌銘

公諱輔字會之其先湖南茶陵人祖諱正相贈登仕郎考諱大絨以子熙貴晉贈承德郎卽黼庭公也兩世蓄德致殷富遂有聲公生而簡重與人周旋能終日不一語盛暑幽居未嘗赤體跣足而性仁厚貧急者輒利濟之年廿四舉茂才兩應鄉試不第以湖南助餉功議叙成均貢士當是時王氏七世獨公以文學顯族人榮之而卒艱於遇嗚呼豈其志哉公既泊仕進乃與仲弟熙卞築萬佛山麓於是黼庭公具慶在堂矣賓戚往來燕樂無虛日風晨雨夕則則伯仲在焉挈榼布席引杯滌箸一庭歡笑熙熙如也時人謂天倫樂事無逾輞川主人者惜乎其不獲永享也配杜氏生子紀勳繼室駱生子一贊勳女三長適蔣天祐孫克寬克讓皆紀勳出也以同治九年卒壽四十一歲既葬閱十有一日而脩墓焉銘曰會之之室於茲三世相依以厚其鬱發

桂宮碑記

代張鶴儕明府作

余治萬之又明年春值甲子科帶補辛酉鄉試始與學博范君謀舉賓興特禮於署門之內筮簣酒醴主賓歡洽士林豔之其九月報秋捷者三人是歲應科舉者裁百二十焉國朝二百餘年唯康熙三十五年稱是嗚呼盛矣古者人材之盛衰視乎官師之扶植前此令斯邑者亦旣隆學校蔚人文矣而賓興之典蓋闕卽余與范君斯舉亦第率成之無復能久後之日或者其罔有定處以廢禮文而鄉舉之踴躍科名之騰達或弗盛於今日邦之人

蓋拳拳乎此也於是越年而桂宮成宮故爲文昌廟隙地常作行臺館傾圯不治余與邦人士相度之用復其地而作宮以祔於廟建屋宇三進四周爲間十有五積壹萬六千五百工費錢三千緡緡募自邑人輸題名如左其良材堅壁凡六萬四千七百以同治甲子起脩歷九閱月竣事宮有廳軒楹有峭亭飛樓迴廊洞壁有賓客之位有讀書游息之所山影江光之出沒瑞鳥祥魚之飛躍與夫四時花木爭媚物華者胥於是乎在植桂樹十百本蔭翳其中若曰是械樸菁莪之遺意也若曰是鹿鳴之所以誌菁萃也故名之曰桂宮夫此未爲宮時瀆逆竄萬郊堡烽燧相屬所在深堂邃宇焦於賊炬者往往而是而是宮敗舍頽垣亦兵人所屯聚其不入於瓦礫灰燼禾黍荆棘非天幸耶故予之汲汲爲此者特感於清時興作爲偃武修文所不廢而諸君子亦樂成余志無孰懈以中止亦以見邑人之趨公赴義猶維持文治於不衰幸余他日去萬俾後之賢者定爲賓興賢良之地於比年隆舉其禮其墻宇無頽於霜露其人物相與興起而栽培庶幾典禮勿廢以赴聖朝作育人材之意或曰桂文本也文物繁則世道昌其中興之望歟

誄王升甫孝廉文

維皇上御極之四月贈文林郎咸安宮教習王君升甫以差滿引見卒於京師越八月叔弟彤甫孝廉自都門扶輿歸里其明年正月將殯於治西之沙河坪於是遣奠有日矣契友某謹薦藻蘋漿酒爲文以祭嗚呼君之不算也天生君以如許材畧豐之以境遇翁若弟皆強有爲無內顧憂而又盛年騰達榮膺青紫使稍假之年奮其精

力猷爲以博取人間位祿雖卿相可立致豈直一官一邑已哉天不永祚僅以舉人授教習終可哀也已吾鄉自甲子以來科名藉盛論者謂偉材輩出他年必有銘鐘鼎垂竹帛爲鄉曲光寵者而君中道捐棄諸公宜爲神沮遑問後來耶雖然今日何日泰山頽矣梁木摧矣以梗峯首輔之忠勤而死於相矣以滌生揆帥之賢勞而死於將矣君卽躬膺民社爲朝廷建尺寸功當亦無補矧世途之險禍變之忽誠不知其屈抑於上牽制於下否也然則君幸而沒於今日無官守言責以蓄其憤懣鬱結之氣猶爲可辭苟得所藉手而不能罄志俾行所欲爲則長逝者魂魄私憾何窮也古者生男懸弧卽有四方之志若老死牖下其於勳名事業毫無弋獲不唯無以顯親卽父母所責望於人子者恐不如是固知君之遠遊皆爲人生分內事其不克歸養而賣志以歿天也非人也煦嫗者爲君惜之不誠過哉僕與君爲道義交所期許於君者甚遠且大不圖今日竟於君訣今日之哭爲國家惜人材爲閩里悲文運不僅爲君家阿翁傷孝子令人也君弟彤甫近從予游捷於順天鄉試君之靈實默相之君如不死更爲乃郎一佑啟焉王氏昌大庸有艾焉耶

張公天貴傳

公諱天貴字星五其先湖北麻城人逮某公遷蜀之萬縣治南以農業起家傳三世誕於甫七紀而孤無脩脯就外傳遂輟吟誦爲牧旣八稔會從賈人習計然策以信厚見倚賈人者後裕於貲息其業爲富人公有力焉公旣習於闖闖見吸淡巴菰者曰利在是矣於是販崇寧息大倍後從其伯兄某意析居伯兄不耐賈日以身代久而

益相愛敬居仍合用此篤得其母歎母故早孀慈不苟子職公承事維謹無毫忽馳厥慕有女兒適陳者娶居不能立曰此吾母所隱痛也奉之家溫飽終其老宗親若干輩時爲謀生人業乏者繼之曰是先人一脈也戚里之相待以生死者歲常數計邑中濟臘恤孤諸義舉往往不吝竭囊他善稱是初公之販崇甯也蜀北千有餘里枝峯蔓壑中攀援濘淖大不順行人好義者歲有平易故公時出行橐以佐司里者而西來商旅至今猶津津誦某梁某道紀名碑數十碣不置子男二太學生地現地元皆得之晚年者蓋公以年三十始娶云

杜子曰太史公列貨殖書多不詳其內行豈秉筆從畧歟日中爲市營營於嗜欲攻取之場葆其天性者寡也夫詩書所載常以孝友並稱孝之道大友之義博善推其所爲而已張公生長農賈獨舉士林所難爲者而優爲之豈不可風也歟常與其長君初見於中山樗舍固清俊而文者嗚呼殆天之所以酬善人哉

本宗族譜序

記曰尊祖故敬宗敬宗故收族所以明有親也後世宗法不明彝倫乖舛遠祖近宗數典輒忘其於同姓又相視若路人者豈民俗善偷與生當晚進文獻無徵無以作其孝友睦婣之志而所謂順子慈孫者僅涕零於春霜秋露惕然見先澤之無從是可慨矣夫人猶木也無本不枝猶水也無源不流夫本能爲枝源能爲流人知之矣而羣枝之宗於一本衆流之統於一源雖在中智常瞽若迷夫不諳物理者不足得人情不明宗派者不足啟孝思然則族譜之作乃尊尊親親之至意而先王緣情制禮正倫厚俗所以上治祖禰下治子孫旁治昆弟者胥於是

乎在吾家自襄陽宦蜀丁明季之亂譜帙盡失始遷祖而上靡獲所考五世支下絕讀者二焉流離遷徙間有遺亡其於上治旁治之典蓋闕已今且見十二世也祖德遠蔭子姓益繁失此不理後世子孫必有忘其所自出者而及身之不能下治又足論與八世祖養雲府君創爲初本篤齋吉人兩公因之至九世恪菴公誌之畧詳而猶若未備九世以後更無聞焉庚戌春仲章奉母諱家居慨然追念先德搜採諮詢彙爲一編將割劘而弗果越癸酉族人迫責前議始出繕本加釐訂焉章告族人曰我始祖簪笏起家積仁累義游庠食餼無代無之惟詩書之澤長式克至於今日我族食舊德服先疇其母墜我先人業其保有家聲爲忠爲孝俾父慈子順兄弟恭夫義婦從以宜於而家睦於而室其母忤母傲母驕奢淫佚母爲游民母廢業母奸狡壞心術極於下流其守我先人懿訓其以賢導愚以長教幼罔有間隔唯義之安方今景運昌明奮發振興競嚮時之美吾於族人是望無若百川之流每況而愈下也其爲山之增高乎吾宗類多賢者能繼志焉尊祖敬宗之事獨無有大於是者耶語曰莫爲之前雖美弗彰是譜也成其光族之嚆矢矣

魏氏族譜序

魏自畢萬肇封至魏斯分晉爲諸侯而族始大漢唐以降代多賢哲元成弱敬其著也顧競誇門閥君子病之人苟不自黷其宗柏蘖松苞其奚由替吾鄉魏氏土著不下千家所聞知者半以服書力穡爲務何世德之醇與其源流弗深考遞青甫公至自湖省而子姓日昌裔孫虛堂慨然追念先澤勸建祠宇於是族譜適成是譜也蒐

索編輯吾友陽三之力爲多陽三友教四方窮年無暇不意其襄盛舉如此二君可謂能知本哉昔歐陽文忠璧爲家乘大蘇繼之後世叙譜牒者率奉兩書爲程余謂班傳馬遷諸年表實啟其例不唯宋本足法也陽三工於文是必可誦獨念魏氏南北散處一朝而收之他日椒殿綿衍有榮其宗者當爲虛堂陽三高置一席

陳緝菴先生七秩壽序 代其族人作

人咸言吾宗宜盛大有世德焉道光中鉅宜公以孝弟忠義顯名鄉里邑人請諸朝得旌如例由是吾宗數十百人雖樵魯咸識禮教無狂悖者而公之嗣子親炙懿訓尤遵循而漸摩之且繼述之如雲巖揚之兩先生皆負士林宿望其倍著者則今世所稱緝菴先生其人也先生敏達和易敦品績學善事親處兄弟無纖芥嫌族無尊幼靡不厚遇者然數奇屈中癸卯副舉後以圍防功保知縣職非其志也同治紀元詔舉府州縣孝廉方正先生與焉邑同舉者爲朱先生熙臺其實德碩行與先生伯仲吾族常心賞之不意發之於范宗山廣文也當時以范爲知人而孝廉方正之名亦惟兩先生當之不愧先生以虛聲無裨實行也不欲苟仕進唯是友教四方與都人談忠說孝澆消薄俗每歸覲必召族人殷誨之族人中秀而文者喬而野者執一業一藝以謀生者咸傾奉其教有嫌難輒就之解語未移時往往釋憾平爭以去報以病必親診之無有遠邇親疎甚者餉之藥曰吾所謂盡心者貧不能婚者待其嫁資其娶孤貧寡弱者時輒存恤歲所獲脩脯常因族人耗半之而先生怡如也吾族竊比之范文正公云先生名日益重當代賢士大夫若駱顓門吳仲宣嚴渭春三帥彭曉航蒯子範二太守皆尊禮之而

歷任賢侯亦時有所諮詢藉資政理是以官紳合志延主鳳山萬川蓮峯文峯諸書院者二十餘年教澤之涵濡文風之變易士類之騰達皆不具論獨念吾族居去縣治百二十里善頑雜集猶能逸居安業眠食無恙則先生維持庇蔭之力爲多族之有祠也猶國之有宗廟也魯躋僖公君子病之故議祀不可以味禮吾族建祠有年而名位多弗順修儀舉典俾昭穆秩然不紊者曰唯先生祠向無宗帙經揚之先生手成一書條約綦備族今且繁嬖續倍疇昔相待以踵其事者曰唯先生今先生年七十矣德行益篤若海焉納百川之流而未有盈極也亦泰山不讓土壤彌以增其高乎族人類多質者不敢以諛詞爲先生壽唯冀永綏福祿俾族人於式奉法相勉爲孝子爲順孫爲端人正士爲良善民以綿我鉅宜公聲無墮我先生望先生當開顏盡一觴焉

族兄令德七十壽序

萬州人烟輻輳商賈雲集縉紳仕宦之家綴科名珥貂袋者迹不絕踵而俗厚民龐其安本業者則猶以力學服田爲務蓋先民之風至今未盡改也吾家聚族於茲歷世十二大都儒服儒行良以始遷之代簪笏起家故弦誦流傳雖積弱既久亦不敢偶墜先業惟六世以下友分派別丁口日增間有力於穡事而繁昌其後者如我令德族兄其尤也兄昆季三少承父祖業皆力農往往終歲勞苦不少休息以故得弗窶而公之子孫曾男既庶且多從無遊於田逸於室者非勤儉之教有素與兄雖不解讀書而忠厚素樸能安本業此固吾族所樂與者今年冬爲兄七十誕辰其嫡室譚亦同年生吾族同輩中以兄齒爲長而四代同堂與室偕老尤稱難得豈山林僻處獨

得敦龐渾固之氣耶抑務本業者無嗜欲攻取以感其心而勞其形耶兄近得頤養術足不履城市者有年每望杏瞻蒲推晴驗雨日與孫曾輩說種植故事所謂田家自有樂者族人以此壽公益有卜大年之未有艾也

重脩鎮江閣碑序

自岷江東下千里迅流排山驅壑赴夔門而東走者滔滔乎有不可屈遏之勢雖離堆挽其後灑瀆阻其前而百川匯流之區沙磧平曠無迴峯峻峽以鎮之則土脈有所不萃川源有所不蓄或無以生聚而蕃富故夙號通都者必資人力彌其缺然後挽疾於徐振陷於升以其所興作者爲一邑壯此吾邑鎮江閣之建宜汲汲也閣去治東三里山勢崑然俯臨江渚巴水之東匯以出峽者於此迴瀾因顏曰鎮江始建於康熙季年迄咸豐庚申漕諸水同治乙丑再建之越庚午復爲陽侯所虐蓋傾圮於今者十年矣己卯春邦人議舉其廢輸錢百六億歲三熟而落成閣凡三上其基磴以鱗石石之空爲圓橋橋覆以臺臺如榭式演劇者在焉梯臺而上爲檻檻有牖空迴無際南望翠屏東眎象鼻西眺羊耳諸峯隱隱見苔點晴之朝月霽之夕颿牆上下城郭宛然更上而飛簷接雲表矣閣之輔有廊廊之翼有園繚然而窅然邃者有室洞室而豁然開者有軒附軒有亭偶亭有廡有賓客之位花木之陰有獻酬吟詠之所與閣相對者爲殿殿前後祀神像如儀當殿之楹爲樓樓重以檐檐額匾以宸翰昭其敬也是役也游君德菴實終始之而諸首事者力襄其成用能卒覩鉅觀以增羊渠勝境豈非幸哉今夫廢興成敗相更迭災害變故相乘除自洪荒逮今日所在城郭宮室亭臺廬舍遭澤洞而沈淪者四千年來不知凡

幾而地力所限天時所摧至欲以人事匡扶其際則非有大力者鼓其氣於不衰不可得然或遲之久而復遲之又久而始復似亦有數焉以定之而斯閣也一圮於故蹟再圮於新脩天地之阨也云至矣獨不能使踴躍之心一蹶不振夫安知非地運轉移有默爲相之者以萃我土脈蓄我川源俾生聚蕃富之不置也乎故由今視昔其堅敦者數倍亦鞏衛我國家億萬年靈長之基也事既竣郡人士屬誌緣起登斯閣者無徒把酒凌虛博爲遊觀地也噫

賴湘波詩序

余儼居水竹十稔矣總角舊游星流雲散往日逐酒彈詩如又仙會之定臣紀三暨叔弟棠村輩今無一存其存者不復亟見而唯賴君志侯爲尤遠志侯負侷儻才工詩畫往往豪遊叙瀟以孫吳之學參營伍邇在松潘戎幕中嘯月歌風輿概如曩日丙子秋再晤於成都要之歸漫以迂道內江爲辭內江者仲嗣湘波客游地也余意志侯以湘波髫齡不欲終廢學或携與東還耳歲杪不得志侯耗厥後稍聞湘波以病歸未幾劇不起余旣爲志侯悲湘波然豈識湘波之尙能詩耶今年夏乃兄鏡波以序其遺草爲囑蓋愴然者久之夫湘波以英妙之才使就傳卒業其成就必有可觀不則依倚母兄株守敝廬亦無離別窮愁之苦以促其年算迺至童年作客遠道思親不獲已託諸吟咏賫志以沒余讀其詩亦竊悲湘波之不遇已湘波詩筆逸秀頗類阿翁少時客中諸作漸有秋氣惜乎其年之不遐也余嘗與志侯論詩謂英年把筆當令如春日芙蓉爭韶競艷無喜作懊惱衰颯語志侯以

爲然終不意於乃郎見之今湘波往矣鏡波固精於選學者其河漢斯言否耶

假齋文存例言

嗚呼此非吾亡弟苦辛耶吾與弟少失怙均秉母教成人長就外傳又互相切劘各匡其所不逮故吾兩人者性情心術操行學業靡不一致其微異焉者弟以柔弱之軀汲汲於經世之務忘寢廢食不肯稍自息養日程星象輿地水利農田禮制兵法諸書欲剋歲而畢之併日而攻之曾不數年而精氣告竭此所以學盈而養歉志有餘

而算不足也

黎庶昌曰體格完善不蔓不支頗於太史公書有得

曩令善保年壽優游涵養以究斯文之緒俟斯道之大適其所成就必有

躋泰山凌滄海者而區區以文詞膚末取重當時是亦可悲已生平喜誦法左國於遷固之書尤手摹而力追焉故其文多詰曲聳牙之語不屑以卑弱同流俗論者謂於昌黎爲近著古體文如干首自汰其未安而存其差強者嘗得十之六焉以寒素故不能手付劖劖予己卯遊都下日與文士談接慨然念吾弟遺著不可散失也歸而次其稿第爲二卷士不通經不足致用春秋者孔氏之全書也編讀春秋知人必先論世前代之昏明賢否後人之法戒因之次論史傳信莫如傳致詳莫如序紀實莫如記次傳次序記纂言者不遺其要揚美者不厭其繁所以重人而述其行也次事畧事狀有贈答必錄次書有疑義必解次說有闡發必暢次書後其宜於議著於論跋語銘詞可備箴儆者咸附於篇當代有作者倘垂盼而繩削之則亡弟所啣感而不獨亡弟感之也

黎庶昌曰以史法行之效

其著作識見甚高

游德菴司馬五十壽序

都歷摩層霄而上秀出雲表蜿蜒至北山石城烟起霞落南奔大江昂昂然若修蟒之赴巨壑也縣治跨其脊形如張罟環脊而肘之腋之襟之帶之者於右爲輪巖爲蒲溪天城峙其西獅山尾其北複巒沓障曠如屹如其明秀有足觀者而舉無如附城一脈爲最厚附城者附北山之腋龍跳虎臥而疊爲重岡者也繞郭百千戶棟宇台沓高下其勢西爽朝迎則煽巍顯翼拱白巖而睨南屏焉秋潮晚落則曠遠綿渺俯仙橋而挹沓瀑焉然而宅斯土者非實有開拓之胸俊曠之致雖高枕山郭亦與鬱居闔閭等游君德菴幼讀書不屑科舉學而性豪爽與其兄眉生稱友愛常挾賞習計然術大獲遂宏施焉有遠名近亦暢情於園林風月間所謂開拓俊曠非耶築附城之廬爲別墅堂亭軒檻花木屬焉朱扉乍啟綠野初晴燈火懸城笙歌繞市高瞻遠矚之間類能傾耳而成聲觸目而成色人以爲謝傅東山不是過也今夫凡物廢敗之故莫不有戕賊者兆於其先至其後拉巧摧枯雖賢且智者亦聽其適然之遭委棄弗顧而其復興也則往往巧爲作合藉有力者以成之茲宅當同治初元邑氛不靖其東偏以附城之故則毀之爲邱墟者也環宅而屯聚之又兵人所炊爨傷其薪木者也向所謂都歷之秀北山之雄皆迷茫於旌旗燹火中無由暢其懷而豁其抱而室主人亦輕去其廬曾不一過而問焉故寂寞者二十年以爲北山之靈旣歇也德菴乃舉其廢而興之俾煥然更新者獨有以據山靈之勝而大發其輝光豈非相待相需以至今日可以人力成不可以人力謀者耶今年夏爲德菴五秩令誕值新構慶成賀者塞門巷衆於是舉酌

而祝曰願德菴撫有斯室不摧不崩不及於災害以此爲百年基也北山旣固且厚靈秀所毓必有篤生奇尤者德菴厚自植行將峻發其子孫也他日純嘏綿懋而耆而耄而期頤則登斯室也應與採岑洞之芝傾流杯之酒醉君以三萬六千觴

陳緝菴先生家傳

先生諱光熙字緝菴其先南閩人也考贈文林郎從祀忠義孝弟諱大方妣李氏贈孺人旌表上壽五世同堂贈公生子五長光照邑明經進士次光烈道光丁酉科舉人四光黨國子生員其五光照早卒三卽先生家於萬治西北百二十里之袁家礪自贈公有義行諸子以文學顯故於邑爲著族先生生而穎異弱冠以縣試第一人入府庠逾年食餼從鍾寶峯學師卒業師大器許謂當作金華殿中人然六膺鄉試不售癸卯始爲副孝廉人以是歎數之奇也先生旣不得志於有司逡友教四方汲汲以作育英才爲務邑故有鳳山書院橫舍常虛王曉村明府議聘先生始有負笈來者不終歲而開門屢滿焉其移硯萬川書院也課士如在鳳山時講授之切稽察督課之勤前此率無其偶遊其門者又復歲常百人忠梁雲奉新開之學者多歸之是以主院二十年而科名鼎盛往往甲於他邑則先生之教澤與學師范公之培植不可沒也先是宗山范公秉鐸是邦廬士習未端時有以訓飭之歲設季考獎捐募元卷資興爲諸生勸而先生主鳳山適相值又得長沙馮公樹堂領縣事官紳耆皆名宿獎勸誘掖嘉其賢而迪其不肖於是學校如林彬彬嚮化矣馮公秩滿去先生復與范公暨熙臺朱先生踵成邑中

義舉如增廣學額節孝總坊育才全貞育嬰諸會平糶濟臙救火籌防諸局皆有實濟而籌防一局則尤係一民之安危者蜀氛不靖之日駱文忠公以湘撫督川知先生之名諮訪時務因檄與范公會辦團練嘗是時承平日久細民不習兵革石逆達開前鋒已竄咸來鶴游坪巨股潰圍東下新梁大震潼順叙瀘之屬無時不聞警報萬之人日脩塞堡備以慄先生謂范公曰事急矣不集民則無兵不練兵則無守無守則萬人爲魚也乃馳赴三里檢閱團操得甲勇數千人既成軍矣遠戍者有難色先生曰劃江以均南北之勞給餉以寬資斧之備可乎難者色霽而籌防之局起焉籌防者內募糧捐以籌費外調甲勇以防隘部署甫定而兩藍逆先後薄近郊屢爲團勇所阨最後周逆紹湧擾我北隘隨殲於開之後坪壩其統領王刀刀者亦不克逞志於我擒而降之論者以爲會辦團練之力明年蜀難平縣上其事於大府保先生部選知縣得旨俞允時范公知先生最深并舉孝廉方正辭不赴無何范公就養鳳陽方伯劉霞仙諷先生仕嚴渭春中丞亦招之皆以母老辭自榜其廬曰衡泌風清蓋自是無出山意矣初吳仲宣制府入蜀訪先生萬川書院傾談竟日贈宋五子書數種而別用是益淡仕進與門人講求實學郡伯蒞公欽其品聘主蓮峯文峯兩書院越三年教成卽辭歸曰吾不能棄桑梓也先生性至孝贈公棄養時寢苦廬墓哀動里鄰事李孺人能得歡心李沒與諸昆弟益相敬愛光煦公之嗣以子明恩入繼不受產人以是尤賢之修葺先塋若干塚捐祭產義田若干畝倡與本甲利人利物若干事晚益精軒岐業歲所活人無算然皆先生緒餘也子男四人明景庠生次明瓚明覺次明恩庠生卽出繼光煦公者孫五世紀廩生以光緒

十年十月卒於家逾月葬於某山之陽其門人故舊不期而會者車馬駢闐焉學者擬私諡曰康靖先生

王母夏孺人墓誌銘

芒谿西澗之塵有篤行君子者曰王君凝齋其妣孺人沒十三年矣常耿耿於起家之寒素欲令後世子孫識先業所由來於是勒石墓所囑其甥蔣君海舫來索誌既不獲辭且以善王君之意足爲後來訓也謹按孺人姓夏氏年二十于歸希聖公爲配公幼空之日市櫻橘蔗梨爲生及長託趙岐餅餌業閒以棗糕孺人入門時卽着犢鼻褌共操作晚炊黃梁飯鷄鳴立起旋磨踐碓相與勤劬後以米鹽積貲不數年置負郭田築受塵之室薪之蒸之家大饒裕而孺人從事紡績飼豕鋤畦不倦曰吾不忘微時也今夫深閨燕處之中不識艱難徒仰食於所天以自給卽少知內助亦唯共目前之勞苦藉慰飢寒幸能創業則漸染紛華不復追憶曩日求一好勞惡逸防其不材而慕其嚮義者敬姜以外無聞焉乃孺人能居安思危如是以自惜福祿而流澤於後裔曷有極也可謂不賢乎其生平多順德事舅姑能得歡心晚益持齋禮佛好施濟事里之人至今稱之以乾隆辛亥十月生歿於同治壬申五月壽八十二歲越 月來葬於茲子一光福卽凝齋太學生也孫曾 人多達材少者皆彬彬文秀他日必有顯揚其先者銘曰有積而累之無斲而喪之使嗣人而有念於斯天必福之

文遵先傳

遵先諱之法姓文氏世爲邑最著族生年十二兩親先後違養相距僅六十六日當是時諸父八人皆析地居伯

兄亦成童無祿榮榮子立影與形弔日從塾師受童子學足不逾庭戶書策几席之前往往廢蓼莪而歎撫杯棬而泣與人相接喞喞然不出諸口有過之者頷其容止丰儀而已寢長讀李二曲先生集歎曰此道學真傳也由是棄舉子業博集宋儒所著通書太極圖正蒙西銘易本義啟蒙小學近思錄諸編目涉神領洞見本原窮古人所以然之理一一措諸行事事求務實不隱合聖賢之道弗止居鄉里動遵禮法不受變於俗爲人排難必以聖賢義理評曲直人皆佩之邑有端人正士不惜析節以事或需殷遇疎輒慨然心儀其爲人故士林中無長少無不樂交遵先者家故饒裕不欲厚自封殖歲所贏餘咸輸爲利濟事所居石馬山實爲五甲孔道村民環聚常輻湊焉飢無食寒無衣歿無棺殮者一唯遵先是依貧病不能藥老弱不能自存者仰給於遵先而遵先弗辭嘗出百萬錢修水礮灘橋補修宗祠者費半之其置祠田則又倍是義學爲五甲倡歲費亦三之一也邑中諸義舉有告募者靡不罄囊以助曰吾以是行吾願也故邑人無遠近無不樂道遵先者以光緒乙酉某月卒將卒之夕猶朗誦性理書數百言以望道未見爲憾遺命其子曰吾少失怙恃未有所成今爲女延人師宜從下學幾上達以竟吾志吾生平無纂述且無功德於人所施棉衣臘米藥局木棺不可廢也杜子聞之喟然曰此非眞道學中人耶鄒魯之傳漢儒得之訓詁而宋儒體諸躬行故道學與儒林別而爲二其實言與人異漢學之箋注不如宋學之實踐也實踐之事以窮理致知爲始以仁民愛物爲歸遵先天質粹美少無父兄之訓長乏友朋之助而所學乃刻意砥行若是是豈僅百中一二者耶雖無著述發明聖學其亦體諸躬行者矣余因視遵先疾始與遵先談

竟夜心識其爲恂恂君子使天假之年其深造正未易量且必有匡我以不逮者惜乎一見而永訣也悠悠斯世樂善好施之類尙堪指屈而居敬存恕謹言慎行以少壯之年卽究心聖學如遵先者幾人哉孔子曰朝聞道夕死可矣遵先雖賚志以歿而能蚤歲聞道其去顏氏子幾何余受友堂周君之囑亦樂爲傳之以風吾徒之學濂洛關閩者

劉敦山先生榜北詩存叙

乙酉秋余落京兆試鬱鬱歸里訪先生於三十六陂秋水山莊時先生方繕榜北詩刪次未竟越明年手賫繕本囑余一言於是置几案者十閱月矣風瀟雨晦書燈燐燐輒取其詩讀之未嘗不追念芳華怦然於今昔之感也初余世居城南與先生同里閉重以世姻之誼尊幼忘年昕夕過從縱談天下事論議所及時或見之於詩而羅丈樹生劉君紀三暨吾弟棠村一時俱稱莫逆人謂羅丈之高先生之傑紀三棠村之文秀使皆得志皆不止爲詩社中人第云詩社而歲晚務閒佛子懶雲嘗治桑落釀雅集澆香精室酒後耳熱攀銅瓶梅花雜置水仙覆盃饜節鼓傳觴引鐵笛橫吹高唱大江東去樂何如也蜀氣不靖先生卜築中山羅丈走香爐深谷余與紀三棠村均有城防之役而騷壇寂矣不數年棠村無祿羅丈紀三相繼歸道山余亦盡室徙居水竹中間雖有范君孝與合道同志復以前年卒自都門去懶雲禪寂逾一暑回首二十年前銜杯分韻倚檻抽思都成夢幻同社諸君子存者唯先生與余而先生已近古稀余年亦始衰矣十載授徒嘯咏方稀以視先生鉅著鴻編且欣且覩蓋先生

之耽此也垂四十年於茲此四十年中與羅丈唱和最早與棠村切劘最深與懶雲酬答者最多且久是以全詩境地亦有二焉辛酉以前香山之吟也癸酉甲子後韓蘇壯作也庚午至今則放翁後集矣先生之年益耄而其詩益老且成後此吟風嘯月駸駸有百年不輟之勢惜乎故交零落求如曩日浣香之一聚不可得而羅丈雙梧軒集未知存否懶雲之詩不盡可傳紀三所存者率多片玉零枝漫不收拾獨先生猶以此自雄於耄期而徵言於神交心契可不謂幸與雖然先生亦不第以詩見也其精力尤健其志概猶能有爲其言論丰采猶足動王公而取卿相縱不獲已託於繪事岷江以下洞庭以上已有傾動一時者他日藏之名山傳之其人與篆隸書當同不朽豈沾沾焉詩卷長留已哉先生不僅以詩見而詩之可傳尙如是則身後之名固有攸歸又不必以良曾難再感念於浣香齋中秋夜聽銅盤錢聲催詩成時也

孝與分韻賦詩繫錢香上香爐錢墮而詩不成者卽如令

樗北詩存序 代蒯子範郡伯作

余既守夔之明年郡人士絃誦詩書蒸蒸嚮化遂置蓮峯文峯書院課今古文詞之學延南浦劉君紀三主之紀三風雅士與論經世才竊少許可獨稱其同里宗長敦山不置敦山有書畫名尤工山水雖隨意皴染皆有法度可觀嘗爲余作八尺橫幅余寶而藏之猶未知其工詩也歲壬申紀三乃益出其樗北詩存丐序於余余讀其詩未嘗不想見其爲人人不必以詩傳敦山之詩亦有足傳其人者篇中答嚴渭春中丞招赴黔中辭不就其品概之高殆非流俗可同日語矣余方與築郡城昕夕從事欲禮致敦山於幕而不獲南浦去夔三百里復不能造廬

見之時用自歎紀三行且歸爲誌數言以弁簡首幸余他日過萬訪敦山於樗北老屋因抵掌談天下事焉則是詩者又作合之嚆矢也

永濟橋記

橋在銅梁縣尹家市二里許

泝漆水灘而上陀石梗渡飛瀑旋流駭浪驚湍之勢七道競出故俗亦名七水灘灘水上達永川下趨合州來源修阻其流不可抑遏春夏暴漲百澗合入瞬息之間增濤尋丈舊有平梁一徑是時胥沒於水往來行旅束手望洋間有褰裳而渡者輒復隨波逐浪葬之魚腹見者惻然而不能一援手救也邑人陳生朝慶獨發宏願捐建石梁於灘之上游曰永濟橋橋平如砥下偃半月者五上繚石欄旁翼以岸共費錢六千餘緡甃石若干丈用人夫千百有差未期年落成於是漆水上下無過涉滅頂災矣前邑侯趙公親履其地錫橋名爲毓麟謂陳君功德之必有後也且爲請諸大府以其事聞於朝得旨議叙按經歷銜如例八年以來行者便焉無何岸石稍圯朝慶復捐鉅款堅工築之豎石坊四柱挽張君炳星白予誌其緣起戊子季夏予役尹家市道出漆灘因得親覩漆水之奔流永濟橋之堅實完固並與朝慶晤談於橋南至移尺晷乃知朝慶以求嗣之故而任此艱鉅雖有意爲善亦可謂不惜財與力者使由是利人濟物凡有類於斯橋者皆勉爲之則毓麟之慶或亦遇諸旦暮如趙公所期許而食報於已也又豈僅以橋濟人乎哉

王保卿司馬榕莊詩集序

風與水相遭而聲出焉其細者蕩漾潏洑悠然成韻偶有感觸則奔騰澎湃發而爲洪鏗激而爲鉅響及至亂石橫流驚灘阻渡狂飈駭浪洶湧飛鳴於是聲大而遠人寂宵深之候如虎嘯深谷龍號巨川憾林木而震山澤也如疾雷百里墜崖千尋折天柱而傾地維也其所觸者愈肆其所激者亦愈烈而其聲愈一發不可遏不盡洩所蓄不止詩之爲道何獨不然詩聲律也古之傷心人有所鬱結不克徑情直遂而其聲又不能秘故往往託之於詩適情遣興者無論已若夫關心家國蒿目時艱或感事沉吟或懷人諷諭歡悲離合情狀萬殊而其甚者遂不惜大聲疾呼如泣如訴如哭如歌以稍抒夙昔憤懣不平之氣所謂言者無罪聞者足戒也保卿王君性風雅有經世才自富游歸里復肆其力於詩其爲詩規撫中唐多沉雄俊爽之作就中稱傑出者尤莫如子規啼擬古樂府諸篇殆亦風與水相遭觸者愈肆而激者愈烈耶然以保卿之才之識歷江右楚南不竟其用而年力盛富徒以吟咏消磨其歲月雖奉親自娛亦必有歉然於中者保卿豈不欲祿養其親而甘自杜門謝客吟嘯以終老耶抑康濟時艱非閒秩散曹能勝其任特假音律以自託耶故余序保卿之詩竊歎當代偉人不獲已而以詩名者何可勝道而保卿適際其遇是天之位置斯人者抑恪且刻使其推薦有人能再出而濟世焉則又不僅此文人餘緒爭千秋後之才名已也

黎庶昌曰譬喻之法於文家爲一妙境馬之所以橫絕古今者此其所長也後世漸趨板實文境日拘正爲此故是篇善於布置從空立論使王司馬既在詩中又在

詩外感慨橫溢之致
不儘爲司馬說法也

李章甫大令墓表

甯經館文鈔卷之一

己丑春予乞假省先人墓自念九齡孤子不獲違事屢親麥飯一盂長林豐草間歲增涕淚祭而豐不如養之薄也時從子藩教習旗童京師以月書來候狀且言曰漢豐齊年友李君松甫今篤行君子也伯兄章甫三尋父骸於安徽太平徽人欽其事揚諸道路有歎歔泣下者松甫不忍歿其兄白束書畧請表章而誌諸墓予既痛吾先人不能自己而事關教孝復懼章甫之遺佚無傳以重違松甫意遂不敢以不文辭謹按公諱本端字章甫開之東城人生有至性以孝稱鄉里考諱希庚爲原任兩江制府雨亭公從兄咸豐紀元隨亭公之太平縣任病歿官齋明年粵匪陷皖江太平戒嚴雨亭公手書木主倉皇瘞柩北郭外公聞耗號泣辟踊白大母請赴太平收父骨旣不獲命而是時沿皖上下旌旗蔽野太平亦爲賊巢於是掘齷以居者四十二甲子九年雨亭公襄辦安慶營務亟往詢之逾年竄身石矢不得達又明年安省肅清太平爲墟隴間關馳至荒塚纍纍不識精魂之何依也大慟而返又五年故僕以葬所告發驗封土木主宛然始得負骨歸窆蓋自是己歷咸同十有三年矣嗚呼人子孝思之極每以艱虞險阻而見世之逆志違顏不顧父母養者無論已其或敬其子職事生哀死盡家庭存歿之常而客斃他鄉不得歸骨於里者則往往置之弗念念之矣而不能踪跡以至或一至而卽已焉亦愴懷於無如何而公以一念精誠忍十三年刻苦犯風濤攫虎狼三捐頂踵萬死弗顧尋亡親於戈矛燹火之餘卒能收合遺骸歸正邱首豈非至誠感格得彼蒼矜眷俾爲仁人孝子者必遂所求而百世以下且可聞風而興起也哉顏泉明求父臬卿尸於東京未希異也方公赴太平時歸徑賊舟欲害之其賊目曰此千里尋親李孝子也卒免於難由

是皖省大府爭識公隨以軍功交章保知縣後官鄂以懇直不侔於時遂謝病去曰吾長廬亡親墓足矣以某年月日卒於里門壽五十一歲葬於某山之陽孺人吳氏生子一早殤以弟本筠子大訓嗣本筠卽松甫也松甫由拔萃登賢書皆稟公教故篤行如此其書畧曰亡兄性嚴介不苟取常贊雨亭公督兩江有以數千金求解秦淮妓船禁者兄不爲動噫是亦可以觀矣

黎庶昌曰有此人子孝思一段發軍俾李大令精神益見且使讀者鼓舞激昂慨然興起眞有益風化之文也

李雨三明府五十雙壽序

屠維赤奮若之歲今皇帝春秋鼎盛親總萬幾諏元辰受朝賀其正月皇后亦正位中宮乾符旣握坤珍斯闡薄海內外熙如洽如樞密侍從之臣遠及封疆大吏羣僚百執司靡不敬共乃位黼黻隆平川蜀雖僻處邊遠吏治難齊而躬膺民社者類能行慶施惠宣布朝廷恩德與吾民相安於無事而民亦樂得獻猗稱兕躋堂介眉以祈黃耆以爲四方和會之休如我賢侯李公其尤可頌者也公爲關隴右族昆季四小僊前山西甯武縣巡檢翰卿湖南候補通判蓮舫歸部選用縣丞封翁仙洲公以明進士宰山西洪洞歷署五寨榮河定襄榆社洪崖諸邑洊陟郡守皆有治績可稱道邑乘所書弗殫述矣公食飭甯羌夙諳經世之學同治癸酉以令長來川卽爲大府所契其權篆西充也首建武肅親王祠國初時王誠流寇張獻忠於縣屬金山舖而蜀難平顧二百年來闔如也公謂能捍大患則祀之籲請上臺聞於朝用得祠祭如例邑故多桑土民不知蠶期年教之樹畜沃隰高原爲至今利於是大府以公爲不負民梁塾當東川孔道舊無洋藥局三憲方議征釐慮司事操切非善招徠不能與商民

更始而宜賓南溪鹽卡又叢弊不可收拾習而玩之其蠹於政爲尤烈故創新局宜優容剔積弊宜振作理勢然也公三董其役發收操縱悉協機宜上裕而下亦弗病於是大府以公爲不擾民公之蒞銅梁也愛士卹民刑清政簡歷四稔如一日始設安居鄉斗釐爲保甲費有餘則益增育嬰之額安居大水鄉不爲沼者三之一公捐廉賑之並請於大府發五百金爲卹尤慎刑名有疑獄必從末減株連拔誣者置弗問定遠縣民某以冤獄論抵上臺檄公移訊力爲平反卒得白於是大府以公爲不虐民方今世趨俗下有牧民之責者非以法律爲治實不足整齊愚頑而仁人君子終弗過示嚴威卽良莠非一知法不知恩亦必以露浥風煦之心淪浹肌髓迨漸摩旣久暴戾恣睢之俗一聽其潛移而默化此其行慶施惠與吾民相安於無事者而賢侯優爲之宜乎百姓頌禱之不已也當仙洲封翁宰洪洞時亦以仁愛爲治邑中諸父老至今猶頌德政不衰以此見封翁遺澤孔長而公之嘉惠士民本家學以爲治法者其來有自今年冬值公五秩攬揆邑人士製錦爲壽囑草一言章於公餘晤對見其詞氣之和性情之厚臨民蒞事之仁且慈固知德爲福基及通觀政績益信其遐齡未有艾量也德配濮宜人恭儉明惠有賢聲女時嘗割股療祖母疾此亦閨閣所僅見者君子之得淑女豈偶然哉行見稱觴之日琴瑟鐘鼓之樂與笙簧酒醴之歡必有舞蹈一時以流鬯皇風者章不敏亦聊以覩縷成文當九如之頌可乎

劉青舫蕭齋詩錄序

詩三百篇大抵勸善懲惡之所爲作也十五國風比興過半而其可以直陳者亦不惜質實言之興趣所至常託

諸閩言巷語率意謳吟俾聆其詞者入耳警心得緣此以爲法戒故庸常淺近之詞刪詩者猶有取焉爲其任天而動也魏晉以來競爲綺靡漱雅頌之餘瀝往往意爲詞掩迄香山樹幟獨開長慶一派其後學者多宗之雖抒寫性靈不盡研究律法而苟可風世勵俗亦不失溫柔敦厚之旨蓋詩無所謂工工於性與情而已安居劉君青舫少習舉子業不得志於有司晚乃益耽吟詠足不履城市而嘯傲林泉以自適古所謂高尚其志非與己丑冬偶過銅城與余晤於王保卿司馬坐上談讌逾時其落落孤標如野鶴閒雲蕭然物外輒心儀者久之越數日以蕭齋詩錄三卷介保卿問序於余余讀其詩竊想其德性之定操守之廉而處事接物之和且平也其爲詩無所規撫亦不沾沾以煨煉爲工偶有感觸卽成韻語發乎情率乎性其任天而動者不自知其滔滔汨汨也篇中多箴銘語於詩人勸善懲惡之意若合符節故評青舫詩不必於體格氣韻間求之求諸性情之正焉已矣瓊江故多詞人如王中安之樓山詩集賈雲浦之風塵稿黃鶴峯之鶴峯詩鈔皆歷久無傳而蕭齋錄乃戛然成集如是其信今傳後何疑耶或曰青舫性孝友品學皆爲士林重重其人自不得獨傳其詩夫唐宋而後人以詩傳者多矣然則青舫他日卽謂詩以人傳也亦宜

封員王公墓誌銘

銅梁分岷峨之支下繚甌越瓊江巴水襟帶其間自聖燈山而東化龍飛鳳諸峯磅礴而鬱結桐柏檜松梓漆之屬不能獨當也於是名賢巨儒與夫侷儻俊邁之人誕焉以洩其靈秀而安居王氏又自國朝以來如樓山及

兩哲嗣皆卓卓有聲其他焜耀邑書者亦不乏翹材峻望與前賢相頡頏以予今日所見則保卿司馬其傑出者司馬昔官江右尋改湖南上游皆器重之所謂個儻俊邁非與以父憂歸奉母不復出既畢養將持舊笏之衡湘行有日矣竊慮馳驅皇路不獲旦晚歸廬邱隴榮榮無片石以壽其先人爲他年憾乃追述封公軼事畧細舉大屬章誌墓而表彰之章讀其狀輒心儀封公盛德所以庇蔭於司馬者甚厚而司馬之天姿卓越能翹然於什伯庸衆者其篤生亦有自來也謹按公諱登庸字績亭姓王氏邑之安居人考諱化樞馳贈奉直大夫公生而伉爽性孝友能文章屢應童子試不售道光癸卯以國子員試於鄉出同考官某公房下由是士林益重公喜藏書時刊先正格言多種行世與人無城府所交游皆知名士尤崇師儒延教子讀者禮敬有加平日不妄費一錢而族戚之貧逆旅之無歸者皆唯公是賴邑中有病不能藥歿不能瘞殮不能塚旅行不能枉梁者無不仰給於公而公亦竭力爲之無稍吝本支故無廟祀遺命立祠置祭歸已產爲祭田人以爲有范文正之風始居銅邑東市咸豐初移家治西十里外爲安居屬壤卽今所謂榕村者村擅林麓之勝閉門課子日涉書史考鑿古今治忽有過從者輒與縱談時務常誡士人築砦練團捍衛鄉里不數年滇匪竄銅梁里民卒恃砦得免論者咸服其有先見云公負經世才以蹶於鄉科遂仕進厥後修德行仁耄老不衰歿之日謂其子曰吾平昔無敗行若輩他日必有昌大者其勉爲之今世士大夫負才望立勳名顯赫當時垂聲於竹帛者所在多有而溯其家世靡不由祖若父之積累有以厚其蓄而鍾之靈而或閔世而始洩或易世而卽洩之有識者未嘗不歸功於其先以進覘河嶽

之秀然則公之潛德幽光如蘊玉懷珠輝媚不可掩宜乎爲之嗣者有以紹繼前徽而奮揚先烈也公生於嘉慶丙子年正月廿一日歿於光緒丙子年九月廿二日壽六十一歲以子錫極貴封文林郎晉封奉直大夫配宜人周與公齊年生後十三年卒別葬於榕村宅右子二長錫極湖南候補通判卽保卿司馬也次錫堃湖南候補典史孫二安絨安縉曾孫二邦德邦佶女二長適工部主事山東候補同知知府用吳鴻慈次適候選從九丁逢勳以某年月日來葬茲土越十五年乃伐貞珉述其行銘曰有蓄而發之無遏而達之揭靈奇於岷峨之支其孰察之

明貴州思南府知府程公事畧

公諱希孔字文翁江南休甯人也萬歷時守貴州思南郡時黔郡人多新附苗夷雜處與漢民相交涉好則人怒則獸登高呼嘯千百爲羣往往執械操戈劫掠村寨官軍搜捕則據險不出伺軍退而驛騷之幸而捕戮亦不能痛深創鉅以斷厥根株止於殲渠馘魁而已故非有廉明威信者開誠布公鎮以靜而安撫之則一郡弗治公知苗民之可以德綏也至之日卹民愛士清獄慎刑日布朝廷威德與閭閻相安於無事其遇苗民一如遇漢民無畸重畸輕之習有弗率者輒勸諭而申儆之是以終公之世而夷漢以平旁近州邑亦欣然想望風采矣無何甯夏用兵國用大匱衛千戶仲春言開礦之利朝廷乃遣中官監礦稅首畿輔蔓延遍天下重以店租餘鹽市舶石木魚葦等稅使分道四出括及甕盎甚或招集亡命劫奪擅殺有司稍忤意輒劾其阻撓逮錦衣獄於是民不聊

生變亂蠶起而公以邊郡下臣不能參議朝政中使往來勢亦莫敢誰何方欲白上官解印綬去會丁父憂即日請吏自代奉喪出東郭門卜銅仁之銅木塞窆焉初公守思南時迎父汝馨公來就養汝馨公素崇朴簡厭南省侈靡之俗而善黔之風厚民淳以爲可以啟宇也故歿而葬於銅仁銅仁巉巖峻嶺窮谷深溪一夫當關足抗外侮公知天下多故江南財賦之遺爲倡亂者所必爭黔中邊僻險遠中原有事無過而問之者而銅仁一府且能閉關自固遂絕意南歸立室家以奉先墓服闋後大府交章起公公竟不出惟閉戶讀書以經術課其孫正典崇禎時爲四川北兵備道至國朝子姓益繁昌其隸籍四川者一祀鄉賢五列賢書一登進士第而銅仁之顯達不與焉然無不以銅仁爲發跡始固知達人輩出由於先有明德也鄉賢公以下諸人具見於家乘茲不贅書

明四川北兵備道程公行狀

明莊烈嗣統之年陝西飢流賊大起撫軍不能制蔓延至山西河南湖廣以及四川四川東接楚豫北連山陝賊由山陝入者成保當其衝由楚豫入者變巫承其阨京師去川五千餘里鞭長莫及雖有三邊總制五省經畧大臣第堵其蹂躪中原內犯畿輔實無暇注意邊防矧賊踪靡定疾捷如風往往朝聞警報夕見俘掠故搖黃掃籙於其先闡獻捲塵於其繼皆如入無人之境惟賴守是土者竭力防禦完守備繕城郭不令創鉅痛深而已至於大勢已去不惟一郡一邑束手無策卽封疆大吏擁兵據險力能抗禦一朝革命亦付諸無如何此明哲保身者所爲識時勢於機先也中憲程公以崇禎癸酉舉人作令大昌嗣爲涪州牧擢守夔州涪涉川北兵備道當是時

搖黃自河北渡河歷荆襄破宜都由歸州入蜀陷巫山夔州大昌大甯諸邑而羅汝才亦相繼犯夔與張獻忠合獻忠擾蜀久先後犯夔府劍州十年之間全川震動保順重夔幾爲流賊出沒之區而公以一縣令驟至觀察知秦良玉敗汝才於夔州鄭崇儉敗獻忠於柯家坪公亦必與有力且隨時恢復而論功行賞以至此者繼知其事不可爲乃挂冠歸隱遁跡於南浦以待天下之清殆所謂明哲保身者與國朝定鼎杜門謝客惟以詩書教其子弟卒令子爲俊選弟爲循良數傳而後猶以科第世其家蓋公之貽謀善也惜乎兵燹屢經家乘弗詳其生平不可概見父老所傳聞又不能採自輜軒播諸青史故其可誌者亦第大略如是是亦多歉已雖然國家喪亂之日其忠臣烈士碩德達人名湮沒而不彰者何可勝道而公以勝國孤臣能蕃育其嗣人沐浴於新朝之化可不謂幸與公諱正典字虞若貴州銅仁縣人生萬歷二十七年至順治十六年卒葬雲萬接壤之九堆子墓題曰原任巡撫川北等處地方都察院右僉都御史仍明制也子言邑庠生觀廩生賁賁生劍州訓導弟正性雲南永北直隸廳同知崇祀鄉賢女一適汪之鵬爲縣令有政聲人以爲似其外舅云

雲南永北廳同知程公墓誌銘

公諱正性字存存四川萬縣人其先伊川旁裔明初隸江南休甯萬歷時諱希孔者守貴州思南郡有惠政與黔人洽遂宅銅仁卽公之嫡祖也考諱耀賁生以長子正典四川川北兵備道誥封中憲大夫公生而岐嶷成童時敦行篤學崇禎季年隨兄兵備任戎馬倥傯未嘗一日輟讀國朝定鼎校試勝國遺才補公縣弟子員是爲萬縣

程氏之始順治十六年以恩貢生考授直隸大名府開州州判判駐呂邱與州分治人服其教民樂其業秩滿膺異等陞河南睢州知州再遷雲南永北廳同知內陞兵部職方司郎中黎庶昌曰此段敘事動宕可喜方公之牧睢州也兵燹頻年民樂戰鬥無禮樂詩書之氣孝友睦婣任卹之風其原隰荒蕪失治終歲所獲不足備凶歉心竊憫之下車伊始親履田畝勸農民力穡宅桑以蠶男耕婦織作息嬉嬉於是州無曠土擇地創建學宮立書院課貧士讀而以家俸爲膏廩膏義塾於鄉使鄉子弟皆入學孝子悌弟相觀而起於是州無頑民在職十年士民懷服卒之日睢人涉數千里來奠歸顛豫撫代請諸朝得旨崇祀睢州名宦入萬縣鄉賢祠以康熙癸亥葬於茲土子五鼎壬子舉人雲南趙州知州內陞禮部江西司員外郎升恩貢生西充縣訓導豫甲子舉人福建甯德縣知縣晉丁卯副貢生叙州府教授謙歲貢生蒲江縣訓導孫元喆蘇州府督糧同知元珏恩貢生江西玉山縣知縣元驥乙酉舉人山東禹城縣知縣元楫壬午舉人陝西隴西縣知縣元樸癸巳舉人山西石樓縣知縣曾孫嶧戊辰進士雅州府教授銘曰銅仁石笏毓鍾賢哲奮迹胸臆維俊斯傑經術道源宏敷吏治是訓是育迪彝撫字十年茂績馨香不朽睢人懷之召公杜母天語榮褒欽崇祀典鼎俎繁蘋式彰令顯身備碩德代育達人陟明升秀炳炳麟麟高梁百盤分絡結障鬱茲佳沃窅然昭曠膏蘭孕澤琮璧蓄輝英奇發育世演前徽

一 程處士傳

二程處士者古胸臆人也太高祖諱正性由睢州牧崇祀鄉賢高祖諱晉叙州府教授曾祖諱元樸山西石樓縣

知縣掇科筮仕代有特達祖岬夔州府增廣生員父兆鳳隱居不仕以嘉德淑行見推鄉里二處士生而友愛事親竭力門閨以內怡怡如也顧家甚貧窘年二十無主中饋者嘉慶己未教匪竄新梁邑境戒嚴二處士奉父母渡南河避賊棚積以居無何賊大至焚其德堡所居室縣北爲墟事平踉蹌歸惟餘瓦礫場中窖鏹三十緡而已自念堂上衰老菽水不能給乃廢讀力作以來牟爲率育資伯推仲挽磨旋達旦行之八年旨甘浸備而胼手胝足如故也會父歿兩人者益刻苦省約不稍豐飾人諷之則曰吾兄弟不能溫飽先人敢自溫飽乎由是蓄積愈厚積田至千畝嘗有強鄰奪堰水溉田二處士曰天久不雨我盈彼涸何無情也禮而讓之田主某貨田十年久而侵地鄉人皆不直二處士割而贈之謂諸子曰吾何難與若理爭然爲是區區者涉訟非保家之道所失多矣其治家皆有成法一絲一粟無濫費焉惟施濟則不稍吝邑中諸善舉亦能稱情以輸族故無宗祠爲割田房二區倡其事後卒成之家去南津市數武朝出暮歸兄弟必相偕天或陰雨人見兩垂白者笠屐隨行卽知爲二處士也二處士家居壁間常書忍讓字惟讓故和惟忍故久是以同居合志歷七十年如一日歿之日六子十四孫雖俊偉明達無不奉遺教於處士者處士一諱聯字步雲一諱鵬字起飛

杜子曰太史公曰織畫筋力治生之正道也而富者必用奇勝販脂辱處也而雍伯千金賣漿小業也而張氏千萬此非以奇勝與然吾觀二程用來牟起非有殊謀異算與市賈競一日之能跡其生平不過墮虎調協式好無尤用能相與有成耳以視操奇何讓焉世之鬪墻者或不能全友愛能全友愛者或不能要其終宜乎其困乏以

老也聞處士之風可少愧矣或謂二處士能忍嗜欲耐勞苦故居積致富於戲彼其所以致富者顧沾沾焉僅居積乎哉

程氏族譜弁言

光緒丁亥春程子仁菴仍受學於畚經館舍一日衣冠晉謁手一編請曰此吾家族譜也自先代可知者逮今凡十三世未有宗帙四世以前由休甯而銅仁者事實不及詳四世以後由銅仁而萬縣者遷徙無所定世本相傳記其崖略而已而言之無文體例未悉恐不足信今而傳後唯先生修之余曰唯唯否否不然家之有乘猶國之有史南史董狐而外唯宣聖麟經照耀千古下此則馬班猶滋聚訟況餘子乎甚矣作書之難也何敢言修修之爲義繁者刪之使簡雜者剔之使純一有弗備不足當作者之林今士庶之家譜帙多失考求一斷簡殘篇如獲拱璧豈復議其雜且繁乎以爲雜也而剔之則更無純焉者矣以爲繁也而刪之則更無簡焉者矣無簡無純則將無譜無譜則將無氏族必有數典而忘其祖者又將可乎甚矣序譜之尤難也何必言修雖然不修亦不足爲譜家藏之本彼此舛錯互相參考以正其訛則宜修口授之事傳聞失實悉心體貼以歸於是則宜修隨筆著述未盡諸適略加點竄以求其當則宜修至於事實不詳者闕之遷徙無定者俟之因其已存而存之蒐其未備而備之以是爲修則仍非修也編之而已矣今是書大段已具特散而未集故不能釐然各正秩然有章耳請爲吾子編次之兆鳳公原叙乃是書所原始許廣文新序乃是書所觀成書例以序文爲之冠爰編爲卷首貴族五代

悉承天寵首載綸音尊朝廷也編卷一氏族必有由始故誌宗派源流有源流然後有宗祖故銅仁墓圖附焉有宗祖必有手澤故列祖詩文附焉有手澤乃有遺行故事略行狀表傳又附焉續之以五服圖者展孝思也編卷二孝思不匱當溯其源始祖來自休甯爲設休甯遠祖一位休甯以後則無世次世次之下則譜傳分焉譜傳五世一提首起元孫爲高祖也五世以後書某公支某公派劃界限以清脈絡也父子相承通用直線兄弟相並通用橫線史記年表例也傳內書履歷生娶次書子女次書歿葬徹始以徹終也已故者書考妣爲有子女者言之無則書配某氏現存者年長亦書配十一世皆書娶示區別也子女低格女雖長不以先子側室低格亦不與繼室等重宗祧而嫌匹敵也嫡生之子附嫡後繼庶生者附繼庶後入繼者互注於本生出繼者附詳於所後皆溯其所自出也娶妻詳其父家嫁女載其婿名重家聲也歿殤者不削其名遷徙者必誌其地存一脈也五世九世有系則提無系則否提者皆不書公唯始祖一人書公統於所尊也有所統則十三世以下相續不絕矣編卷三氏族統於譜昭穆統於廟廟以妥先靈則祭禮不可闕廟以垂久遠則條約不可無附載春秋祭儀一篇祠堂事略十九條所以尊祖敬宗而收族也故編之以卷四終焉編既成告仁菴曰貴族入萬之始當以正典正性爲斷然二公皆銅仁生也銅仁始於汝馨希孔二公故世次自二公始今欲不忘所自仍題其簽曰銅仁程氏族譜

楊碩甫明府壽序

朝廷簡牧民之官督撫而下常重其職於州縣州縣治則督撫亦拱手受成不勞自理而獄訟繁興宵小竊發之

日又唯州縣爲難爲幅員孔長者或再倍古公侯國卽狹亦視伯男過之旣地太物博秀良不一類尋常小忿至身陷囹圄弗惜其狡焉思逞者復遁入他教萃藪負隅與官府相抗使非明允練達宥罪於不覺消息於無形則四封弗靖銅梁於前屬合州國朝康熙季年始置縣雍正初增入安居廢縣輿圖尤擴愚民之多犯法亦固其所而北接遂甯南界璧山西連永川大足鄰境多故往往煽惑鄉愚訛謠蠶起故夙號難治邑侯楊公以選貢朝考第八人來攝茲土甫下車卽捐廉俸延巴瓊兩書院院長籌增育嬰堂歲餼斂養所急日蒸蒸焉每坐堂皇聽事旣得情逾日或自平反曰今所成乃信讞也兩造大服道路揄揚弗殫述矣惟念公始錄因見頂擊踵摩瓊瑤幾滿罪人斯得復不能縱之法外乃審情答稍輕者創築自新所管束之令其悔過遷善而囚日以減大足民教搆覺境內洵洵首逮一人懲創之搖惑者咸鼠伏以去此真不動聲色而措四境於磐石之安者所謂明允練達非與方今仕途競進有經世才者理繁治劇談笑應之而有餘而民瘼攸關免不秦越相視卽矯其弊爲慈祥不稍失煦煦子子之意迨艱鉅猝投則又束手無策甚或釀爲隱患以增重時艱取彼例此孰優孰細不可同日語矣今秋七月爲公揆攬令辰邑人以時和歲稔訟獄寢衰宵小潛伏爲公德化所致相與製錦壽公囑余一言余維祝嘏之詞以民頌其上者爲真至情意肫摯猶莫如七月一什今者食齋及奠烹葵及菽請誦其四章曰爲此春酒以介眉壽未已也南山之詩曰樂只君子民之父母樂只君子德音不已夫能爲民父母民未有不思其德音他日與都人士別上下相感之情必有與去思懷遺愛於不忘者則及今稱觴上壽何可緩哉前月此日恭值皇

上二旬慶節詔書甫至銅之人香花夾道鼓舞軒輦以爲昇平懿事今冠裳輻湊不期而躋公堂稱兕觥者又奔走僭來焉書曰元首起哉百工熙哉於戲何其盛與

廖節母事畧

節婦姓黃氏成都籍現任安居鄉訓導紹珽君長女也紹珽君以優行貢於朝授捷爲訓導丁內艱再銓今職所至以明倫爲教故節婦幼識大義以孝聞及長適同郡孝廉方正廖君春珊子瓊章善修婦職大得舅姑歡一庭之內怡怡如也先是廖君性質義能濟友朋急既廷試弗遇旅困京師家遂落妻子宅成都者饔飧恒不給瓊章母謂節婦曰汝翁阨宦歸無日汝夫習童子試業不解治生產汝兩弟一女俱幼弱吾與汝又婦人嗷嗷者將安賴也汝父有鐸俸篤戚誼多食汝三人無傷且可課吾子讀如寸進圖報期異日盍往就之吾僅鞠兩弱子或望活不則皆窮餓死耳節婦涕泣受命出簪珥治行隨瓊章携女之安居任瓊章故文秀士夙稟家學復從紹珽君遊所業愈精進而節婦篝燈伴讀味爽卽代母氏督井臼不自卽安瓊章乃益刺心刻苦冀獲伸展萬一不覺其神之億也已丑冬猝遭時疾將弗起與節婦訣曰措大緣盡矣壯志不遂不能以汝與女復累阿翁我死請更適富貴者當是時節婦瘁心力竭藥餌禱神禳祇目日夜不交睫焦灼惶惑無人狀聞瓊章訣別益萬載攢膺腹視屬纊畢齊衰麻經撫棺大慟昏絕一時許入室則尋利刃刺喉見血矣突爲故所善婢奪救得不死婢慰之曰若何自苦若始及斧門闕甚盛卽恩義未忘祥禪後何虞委禽者不若爭也若何自苦爲節婦泣然流涕曰吾所以

欲身殉者懼此耳夫家不忍歸歸必以母女累吾姑與弟有奪吾志者則求死不得矣然大歸又誰爲吾夫繼嗣者且二女本廖氏子長依黃氏可乎哉已乃請於父母願傾嫁時物立瓊章後俟積資則奉瓊章返葬養姑以終廖氏父母哀其志而允之會夫弟某聞耗以母命來告曰吾困極不能歸吾子喪吾習知若當留業爲若繼某子爲汝子他日資稍積卽偕以來吾姑媳相見未晚也杜子聞之瞿然曰苦哉廖氏可謂有婦矣女生詩書族者既失所天無慮弗以節義自持慮習於豐逸子身有託不遑恤其夫家螟蛉蜾蠃之謀病非已出遂有置之弗念者而節婦首議嗣續俾死不斬其祀零丁孤苦中至欲以未亡餘生積資返喪以養姑而延後雖其事不易成而其志良可悲已或曰節婦立志如此此其可風者也盍厚卹以爲巾幗勸或曰瓊章喪未歸節婦日急旅櫬資不果行世有仁人君子傾囊資助宜尤節婦所泥首鏤肝者也於是好義者采摭予言書之牘以爲募東焉

補葺大成殿記

己丑冬禾稼不納自七月恒雨至於是月月常十數浙瀝民居室之乾土甚則成績潦業蹙者日勞勞入人家升屋而張笠瓴之頰之不及待日之霽也大成殿向稱堅實至是檐滴逆出板屋不掩溜竊嘗戚之數與李侯商所以蒼治者而邦人以歲歉故有難色孝廉冷君春濤獨慨然出十二萬錢領重檐復廟而聖之且責工人以十年之固事旣集邑之好義者復繼輦錢四萬餘爲佐董事白君嘉綬楊君俊麟何君炳勳李君嗣膺集與謀曰賁有羸矣殿西序外無屋往者春秋祀日趨踰者輒雨立將事不足致虔若爲游廊以庇雪霜震電之不時不愈於露

處乎乃糶廠租若干石爲錢四萬有奇續前工而落成焉既逾年請誌崖略垂諸久章喜諸君見義勇爲其有關學宮事宜者不遺餘力以共濟也於是乎書

自新所記 代楊碩甫明府作

余法銅之明年夏驕雄亢厲炎景鬱蒸附郭二千家時疫間作日坐堂皇聽獄微颺不至班立者衣汗成滴適錄囚至次監次監者錮盜所也室屋幽隘琅璫絡聯疫癘穢汚相雜而有熱者惱煩者瀕病者呻吟狼藉屬集胥救死扶傷不暇欲求自新其道奚由余旣惻然閔之而未敢釋歸也慮鼠竊狗偷之如故也然而長繫則庾斃立見矣竊思得一所焉有日月可以鑒明有風露可以迎涼有通室曠宇可以避疫疾局鑄禁錮之中稍寬其耳目手足以冀能悔過而遷善自新之方莫切於此會追比債訟新舊管押者聞均爲押役所苦而戶婚田土隨時押候之人亦所在被其苛堂訊詰之又無一敢指訐者業知署役爲厲創鉅痛深乃至長官廢之不可革之不能盡法處之且無由明目張膽以聲其罪欲除積弊計惟於自新所中兼置待質所而已於是謀於士紳籌資度土民人楊明新倡捐署前屋址一區富紳歐陽濟等相繼助錢七百緡有奇工竣爲室十有幾間別待質者爲若干間爐竈床榻悉具餘若干間卽以處竊犯之待釋者其屋高闊爽朗瞭以磚石兩所共爲一門置二役司啟閉而統額其門曰自新所所旣設守法者安焉嚮之管押候質爲役卒所苦者亦於是無累今夫爲民父母不能使民絕訟獄尋常告訐之故徒以兩造未備管守需時致令稱貸鬻業被蠹役無窮之苦卽宵小偷竊身罹法網非陷於愚昧必爲饑凍所迫而罪不底死竟以幽閉疾疫置

諸喪亡父母斯民之心皆有愀然難安者然則自新待質二所之設其有關民瘼豈細務哉抑更有進者銅之俗猶謹樸也銅之民未盡無良也與其待質孰若無質與其犯法而始新孰若不待新而不犯法今與吾民約未入者戒其來已入者勉其去其君子相習於禮讓其小人重廉恥而務本業盜竊不作雀鼠勿爭則謂自今以往自新所闕其無人如囹圄之一空也尤有司之厚幸也夫

畚經館文鈔卷之二

萬縣杜煥章成軒著

白巖書院記

古者興賢育才之制學校而已無所爲書院也書院自唐開元始當是時俊選入國學者疊舍不能容別置麗正書院聚文學之士撰講義勅有司優給典至渥也元明時京省皆立書院國朝因之嗣府州縣亦增設如直省凡以興起人材輔學校所不逮雍正季年有一省置兩書院者端溪粵秀若廣東嶽麓城南若湖南秀峯宣城若廣西今川省亦兩書院也曰錦江曰尊經夔州亦兩書院也曰蓮峯曰文峯降至與萬接壤之開縣亦兩書院曰盛山曰開陽其他郡邑率類是蓋文教愈昌人才愈盛通都大邑間多士麇集往往人浮於舍吾邑自鳳山改置萬川而來游日衆歲更數十百人咸同以來掇巍科躋膺仕者又輩出焉於是當事者亦有置兩書院之議功繁費鉅久而寂然乙酉春文君翰丞始與游君德菴謀於萬壽古剎暫延主講募好義者資俸之訓五年矣而脩脯膏火不給游君慨然曰事觀望則無成人省嗇則鮮濟吾先人中憲公嘗有志於斯矣曩以寒素之故繼述未遑遺訓在耳時用追悼乃度西山之麓秀巒北倚麗江前橫遙跋萬川隱然若衡宇相望地當太白讀書巖下因擬其額曰白巖書院越明年請於邑侯彭公集工構材獨肩斯舉自光緒庚寅仲春經始迄辛卯四月落成計用錢八

百餘萬餘地可收歲稞萬八千錢者咸附於院爲歲修資院凡五進縱三十餘丈橫壹百五十八尺有奇中爲講堂堂下爲起鳳亭亭之東爲花廳一爲學舍十有二迤南爲學舍三亭西學舍亦十有五與花廳對立者爲藏書樓附廳樓後爲東西厨中樓與廳而南向者有儀門儀門外東西相向者爲園正門在焉外則照牆轅門畢具講堂西北爲桂軒東北爲杏樞其後爲室七中室祀唐賢李太白於位配以蘇黃陸魯室之後繚以周垣垣內爲山長別院隙地則種荔枝三百本與桂軒杏樞相輝映亦誦讀者適情之一助也工旣竣德菴郵寄崖畧囑爲之記予唯樂善好施必務其大者遠者津梁塗徑周貧濟乏之舉慈惠者類能之若夫變易風俗革正人心非從誦詩讀書不足爲正本清源之務而愚不肖者不及知賢智者不及行即行矣或借資於衆才或勉成於公論求其獨任艱鉅厚竭貲財以育人材而興教化者恒百不得一矧功弗自居名弗自顯坦然怡然能以大善歸美於前人者哉觀游君之志彼驕且吝者可少愧矣游君素好施予與伯兄眉生以善名甲一邑是舉也士林猶欽景之來簡謂更捐錢若干緡歲給諸生膏火吾知聞風興起者奔走僭來人人爭自濯磨相勉爲才俊爲賢良以共儲國家之用他日學成名立必不忘栽培所自且藉以識中憲公之遺惠也中憲公諱道桂存時喜利人濟物以子建揚貴誥授中憲大夫建揚卽司馬游君德菴也

王樓山先生詩集序

古之所謂立公德言爲三不朽者豈偶然哉盛德豐功千秋無幾言雖詞章末務然上之布政宣化建一議而國

計民生蒙其福下之著書立說或羽翼經傳闡發聖賢宗旨以幾古作者之林此皆非名臣碩輔老師宿儒不易能卽至詩古文詞屬學人之緒餘亦非質性所近學力所造與夫識見閱歷所增益既至既足必不能出而問世矧以讀書暇晷報政餘閒本忠孝仁義之思寄情於山川景物而發爲吟咏增輝簡策者以古況今殆不多觀若樓山先生詩母亦有功德而立言者與先生舉康熙辛丑進士由庶常改銓曹出任監司陟開府所至藉藉有聲嗣以閩撫左遷浙藩卒於任浙民至今禱祠不絕而皖粵人所稱道省郡邑志所紀載其功德可傳述雖年代遼遠猶能髣髴大畧獨所著樓山詩集六卷世或不傳其傳者唯黃唐堂沈學子兩序而已辛卯夏王保卿司馬訪於其族孫某得舊繕本三百餘篇都爲一集馳手書來問序余讀其詩竊想其性情胸次藹然儒者其爲言中正和平不失風人溫柔敦厚之旨若玉焉不雕不琢而抱璞自完其真也且譬之如花不爲穠桃豔李爭妍競秀而爲幽蘭芳也今世士大夫宦成名立以吟咏相誇耀者多矣而浮色虛聲徒以炫當時而愚後世究之其人其詩未盡可傳會幾何時湮沒無聞者往往而是而先生詩自適己意歷升沈顯晦會無喜愠之色見於行間當時亦不以詩名卒二十餘年學子始以其藏本丐唐堂序又百二十年保卿復欲募貲壽諸梓以是知公好在人作者不必求名而發潛德之幽光者百世下皆有同心也先生德行在鄉里功業在閩浙詩之傳不傳復何加損第未觀其遺集則終相與忘之故重其人必傳其所作夫奚疑余既幸先生之詩可與宦績俱垂不朽而保卿蒐采佚遺必欲令先生作傳人者不又爲先生百年後之知己哉先生子汝嘉汝璧皆工詩汝璧撫安徽轉少司寇有循

名著作尤富其盛行於世者曰銅梁山人詩

楊母余太夫人八十壽序

皇帝親政之四年寰海又安民物康阜頤和園新建落成車駕時至南海問皇太后起居壽宮宴間懿養多暇千
惟萬慶暢豫無極於是內外大小臣工望風景慕凡高年在堂者無遐無邇靡不各遂烏私迎養承事於弗遑時
郡伯楊公子廣守潼川亦奉其母太夫人安車之任至之日郡人香花竹馬夾道縱觀肩摩轂擊中指板輿而嘖
嘖稱羨者聲相接語相聞也潼川去銅梁二百里郡伯之賢嘗耳熟焉銅又郡伯舊治邑人被其澤思其遺愛者
至於今不衰而王通守保卿尤佩服郡伯甚深欽仰太夫人亦甚至一日語章曰太夫人氏余廣西中丞慶伯公
嫡配也子五長卽子廣郡伯其四皆以秀孝作宰黔魯徽粵中門列棨戟家有賜書富貴顯榮輿誦備矣獨憶中
丞公以侍御出守順慶值滇逆披倡四郊多壘公日謀守禦命郡伯率師以從太夫人勗之曰父爲軍帥子當前
鋒吾執桴鼓於城頭助戰勿衰竭也行矣勉之既而賊果大創解圍去嗣中丞公陟臬藩祿入益厚乃作慶裕堂
於原籍太夫人識其意遂并素所蓄積者悉歸之堂舉全族所急需事咸取給焉今自江右來者僉謂慶裕堂之
貽謀深遠而順慶諸父老亦數道賢太守保城殺賊事赫赫若前日是中丞公之立功於國樹德於家皆太夫人
有以贊成之也郡伯既隨宦來蜀卽以知縣發四川其權他邑也不盡知其蒞銅梁也自流井饒商感舊恩來謁
因奉千金爲壽郡伯峻却之曰毋以厚遺累楊伯起也饒商固請則稱母命申謝卒不納邑故多善舉義學養濟

敬節育嬰諸局廢者舉之滅者興之會大旱鄉民告飢禱雨輒應而瘡痍未絕於塗乃籌平糶賑濟曰此太夫人之意由是全活數千家後解任銅安人扶老携幼不遠百里遮馬首而留之有流涕者是郡伯之恪守官箴勤郵民隱皆太夫人有以訓迪之也太夫人之相失如彼其教子也如此此史策所僅見而當代所希聞今年某月適爲八秩誕辰惟吾子纂言壽之章維內助之賢各隨其境遇亨屯而見獨慈母教子父在則忽不經心以爲地道無成也矧子長且賢與執綽殊檄蒞官之日又身爲民上詎能如童子時唯唯從命者而太夫人並不慮其如是必欲教吾子爲循吏爲名臣郡伯亦自以循吏名臣勵也無一事不奉母教以承母歡不必顯然訓誡卽無形無聲常以爲母意固如此者此天倫樂事未可多得而北堂愛日遂隱致其休和以綿延無窮之算然則太夫人受郡伯奉養其福壽豈有極哉吾聞郡伯慈惠公忠日常以天下憂樂爲念中丞公之前轍知其繼武無疑者他日開府建節入覲天顏皇太后皇上垂問太夫人康齡必欽錫上方珍物以增世臣光寵章雖不文猶能重申禱祝賡魯侯壽母之詞令樂人升歌也

堂伯母陶太孺人八十壽序

古者百年曰上壽八十曰中壽中之云者姑次以遜百歲者也其精氣所凝性質所近要皆有敦龐純固之蘊以養其保和太和之天雖歷歲稍差其得天篤厚則一近世風會日漓人受天地之中以生秉氣已薄益以嗜欲攻取內感其心外勞其形求如所謂下壽者不可多得况中壽乎或謂乾元主動坤貞主靜動焉者不如靜焉者之

有常故者壽之徵往往緇於男而盈於女其動靜殊也雖然吾亦見當世女壽之崇者矣有黃髮兒齒者焉而登其堂則子姓缺如也有孫曾纒膝者焉而窺其室則炊爨蕭然也有溫飽終身者焉而候其起居則偃僂呻吟龍鍾不堪也如是而獲壽壽亦奚足樂者然則必如何始足樂洪範之言曰九五福曰富又曰身其康強子孫其逢吉夫富則無累康強則無苦子孫逢吉則無憂三者既備而後優游歲月以娛暮景此不獨熙朝之人瑞抑亦鄉族之休嘉也章今者竊於我伯母陶太孺人見之太孺人生而習勤并日之外日手一鍼布帛襪裯之狼藉於前者程爲常課今雖八十許人猶見其短坐橫榻裁之縫之熨之貼之明而動晦而休無時以怠問之則曰吾以是消暇日也且曰吾有嗽疾畏晝眠將以此却病也夫人勞則興與則精神出精神出則百脈和暢而起居食息不倦不衰矣太孺人之宜壽一也其歸我伯夫子也始則安貧以勗學繼則殖貨以興家十年之間少有富有田宅服御既安且適咸同以後席厚實而無飢寒之患者垂四十年於茲今夫甘脆肥臙腐腸之藥也羅綺狐貉毀體之資也然而五十非帛不煖七十非肉不飽養生之術昔人所珍苟調攝不失其常則益算延釐無逾於此太孺人之宜壽二也人莫不以嗣續爲大而不生不育則巾幗之病甚於丈夫太孺人有子三皆能繼起先業雖伯子不祿而諸孫林立已如芝蘭玉樹森於庭階每當膝下承歡諸女之歸寧者復各攜其子女來覲而女孫與女外孫更以所育嬰孩啼笑於其前所攜僕婢叫喚於其後一庭之上喧然闐然遂覺鼓舞歡欣不知人世間有抑鬱無聊境也太孺人之宜壽三也有三者之宜壽又能蓄其敦龐純固之氣養其保合太和之天是以歷六秩七秩

而容止如故也歷今八秩而仍如故也由此而九十而期頤所謂上壽百年者何不可拭目俟哉吾家諸母行中二十三人境豐者算或促年高者遇不順而太孺人兼之斯誠合族之休嘉也已章遠隔巴川不獲親承色笑聊誌家常絮語叩祝百福使吾弟少衝動臺讀之卽以佐萊衣之舞也太孺人亦聞而歡笑否耶

廖母蕭太恭人八十壽序

大足民教之搆覺也冰炭不相能尋仇殆無虛日而一二凶孽假借名勢據荒谷僻筭之地附以蚊蚋蟻蟲乘機逐利間出掠焚脅累無辜聚則匪散則民隱搜顯緝則肆其跳梁之習與官府相抗一時場集村堡盡爲愚惑無助而捕者焉偶一蠢動鄰境騷然而銅梁適承其衝縱之廢法急之生變非老成鎮靜握算於幃幄設機於邊險必不能靜民心全民命聲色弗作而措吾民於磐石之安邑侯廖公夙富文武才嘗幫辦西秀軍務春初由廣安移篆銅邑下車百餘日適當大足作難人心震懼公曰此與曩昔安岳一轍耳何驚爲乃率役卒至要隘密授各場正方畧敗竄餘孽卒不敢逾鴻溝一步而橫被脅惑者亦陰予以保全於是羣情安堵如平日初公權大足篆聞安岳教匪陷城大民恆怯時太恭人方就養諭公曰勤以探之靜以鎮之勿啟戎心爲民患所獲逃逸男女七十餘人曰此被脅難民也毋拘繫官軍行復城池矣已而果然人皆服其遠見今吾銅內安外靜毋亦太恭人區畫致然與然聞公任雙流時值大邑蒲江相繼陷賊其鎮定謀慮一如大足則亦稟承有素者鄰氛旣靖秋成咸告大熟銅士民私相慶慰謂我公初政卽與民相安於無事旣而禦侮復使民有事如無事吾民獲享無事之福

公庇之也公之克庇吾民太恭人啟之也吾儕小人在幘幘覆幘中而不稱觥介壽焉可乎太恭人誕辰爲三月朔今歲熟民樂補而祝之亦禮以義起者敢詣公請辭曰餘孽猶在憂未歇也吾母方爲吾民謀久安其肯遽受吾民賀會廣安士紳來稱慶期於九月六日銅民乃攜酒牽羊并囑章爲文以壽章謂吾蜀多故宵小時發賢司牧未事而防臨事而靖吾民旣隱受其福相與銘功戴德奉觴上壽亦固其宜而賢侯謙讓弗居使民無以伸其意躊躇輾轉乃爲是善則歸親之詞以推美於太恭人而又因鄰邑士紳之來始據下悃其稱壽更無可辭者且吾聞太恭人之侍封翁往往贊其成功而匡其不逮當調辦峨邊夷務時函購麻袋誘敵咄嗟立辨其隨任松潘也火宵作携銅符梯垣以出得不燬在青神日巨盜謀越獄亦有匿印防變事眉州任內失遺要文不獲太恭人曰此承發誤也查之如所言其他明敏精詳率類是是以封翁歷任納谿彭山安岳秀山樂山南充江津什邡江北等十三廳州縣賢侯歷任遂寧射洪合州新津犍爲達縣等十州縣兩代循聲垂五十年弗失墜者謂非內助之功母教之力不及此又烏可以不壽太恭人育子男四唯侯爲長次葆常廣東羅定州直隸州判次葆槐四川候補鹽場大使次循南雲南緬甯府緬甸通判孫八曾孫五其二孫已奉檄爲吏餘孫曾業儒者半皆隨宦來銅銅民羨侯亦慶週甲一堂四代洩洩融融戲綵騰歡此算曷極則謂壽太恭人卽以壽吾賢侯亦奚不可抑章猶有望者銅民荷太恭人之福承賢侯安民戢兵之澤幸大足一二餘孽與夫蚊蚋蟻蟲捕者就遣者散咸瓦解而冰消焉行見躋堂稱觥之衆歸而買牛犢熄燧罷守望高枕酣臥無西顧憂我侯我太恭人眞能納吾民同

躋壽字也豈不懿與

蕭績山七十壽序

以文爲壽非古也序壽自明宋歸始然因人致敬率皆友朋交際爲質辭以篤不忘至人子欲壽其親則必其親實有是善與己之德行道義足重鄉里而後乞言於碩德重望以紀實一二語爲堂構寵光斯稱之者無溢美當之者無愧色否則泛矣諛矣錫侯蕭生績山先生令嗣也以博士弟子常相過從其言規行矩志和氣平竊心契焉一日詣余曰家君性朴素幼業儒屢試童軍不售始以計然策養親兄弟析居時輒取瘠田敝屋以悅親意平生無疾言厲色而排難解紛不遺餘力故人稱長者咸豐間藍逆犯境城守團防之事與有力焉子四孫曾以十數胥日課耕讀無舍業以嬉者今年冬仲爲七秩誕辰乞先生一言爲壽余唯人子事親苟有可以顯揚者罔不極意形容而錫侯之稱親乃僅如其分而止吾不必盡悉事實觀錫侯之忠信篤實而其親之盛德亦大畧可想矣吾聞績山年四十餘失偶更不娶世所稱義夫非與雖然亦其天懷淡定寡嗜欲然也夫天下能寡嗜欲之人其獲壽又烏可量哉

謝芾棠詩 召 中書六十壽序

高梁山之脈由分水嶺折而東趨蜿蜒磅礴阻縣治六十里突湧巍巒敦龐而貞固者曰北斗山山之名不知所起土人以爲高凌霄漢上依北斗理或然與史記天官書北斗七星註第六曰危木謂歲星也歲星所在其國恒

福其人恆壽斗魁戴匡六星曰文昌主其多文學之士星經云北方元武七宿斗居首斗北二星曰杓爲天府主壽命此殆名北斗山者所由倣山曼衍可數十里居人常多大年而氏族之盛以謝氏稱最謝自道咸以來人文峻起碩德耆艾尤傑出焉倘所謂歲星斗魁同臨照耶抑申伯之封陳留會稽之望有由來也芾棠姻家安鄉名宿也爲奉直朗峯公仲嗣早歲與伯兄兩亭部郎叔弟紹唐司馬皆有聲黌序間旣膺鄉荐不售乃助餉爲中書局戶謝客以讀書自娛暇則持竿戴笠尋溪澗陂池臨流把釣或手卷閒吟終日忘返問之則曰吾知魚之樂耳不在釣也吾以釣自適耳不在魚也莊子意中有濠上吾意中並無莊子此之謂養生晚年乃益習軒岐學秦越長沙之傳靡不悉心研究然有求診者輒弗應曰非所業也吾以此衛生耳平生無急言遽色侍奉直公秉鐸綏郡以賢孝聞昆弟同母者三從父者六一以和厚處之其居鄉無爭無忤與人酬對使人之意也消識者曰此壽相也哲嗣三長蓉切舉茂才異等次堯階次旭初皆稟承家學世所稱芝蘭玉樹者富壽多男其信然與今年九月爲君六秩令辰祝嘏之文邦人豔矣奚待予言獨憶去夏旋里訪君於北斗山莊初陟山半遙望峯頭縹渺采雲秀出及晤君見其清穆之神溫純之度由養生衛生而得者視曩昔有加乃知此山敦龐貞固之氣獨有所鍾而文人士應斗魁與歲星同臨之說益信其不誣也或曰北斗北方之宿嘗以夏秋見於南方然則北斗一星又南極老人之應壽昌者矣

謝偉堂司李家傳

公諱詩俊字偉堂其先楚人至某公遷蜀世居萬縣之白楊坪祖諱光遠以宿學教授游庠者多出其門後乃居積致厚實二子亦先後成名而謝氏之宗遂大妣氏唐嗜善喜施予年百有三歲神明不衰雲南巡撫請於朝得旨賜上方珍緞二端白金二十兩真壽之門四字里人榮之考諱殿選什邡縣教諭歷任新繁通江教諭升用內閣中書伯考諱東山鹽課司提舉銜綏定府訓導邑乘所載不詳贅矣公幼而沈摯篤於內行母張疾數困榻褥未嘗一日離左右及棄養旨甘不嗜者二十餘月事繼母氏施竭情稱禮以此能益得父歡同母兄弟三異母弟二皆愛敬之一如一曰知有母不知有父者夷俗也何效爲伯兄諱詩正以攻舉子業病亡而避宅養疴百不適志而公獨與偕其兩昆早世乏嗣者以諸子子之諸子之失怙者鞠育皆與己子等於是族人以爲賢善治生總持家政有法以是益饒裕族戚有稱貸者罔不愜意去好施雖自奉損約而周急繼困弗惜也同治初歲飢乏食公倡議里中平糶并請於中書公興工代賑大啟陽見溝居宅梨花莊別墅使貧民有所仰給而戢其亂心識者以爲遠見云公自童子時通制藝卽欲弋獵名塲嗣讀高士傳慕陶靖節之爲人遂泊仕進晚益寄情花木徜徉於山水禽魚之間嘗見梨花莊外翠竹參天綠槐夾道主人携童冠出或花而鋤或藥而監掃石攤書倚書聽泉者隨時而在因名之曰聊園實無園也今夫素封之家紈袴之習其佚游晏樂狃爲故常沉溺旣深之日往往敗德虧行至隕墜家聲弗惜求其杜門謝客足不履城市者蓋亦難之猶復以入孝出弟爲職讀書教子爲事以利濟爲心以弄月吟風澆花種竹爲暮年之娛家庭之樂此庸俗中百無一二者而公居然擅此豈不超人一等哉

聞公素質直能爲人解紛難精岐黃術歲所活常什百人方外書靡不涉覽遇老衲輒喜談釋氏經典歿之日猶展誦梵書數過是殆具佛心而樂濟世者與以同治某年輸餉功議叙布政司理問例書儒林郎從其品也配戴氏江西候補縣丞春亭公女生子一炳勳邑庠生孫二運樞運柯炳勳原名禮鑿舊從予游器局渾練是能奮揚先烈者謝氏之大其未有艾也與

重修成慶門外武廟碑記

國朝肇洪基百神勳佐罔有內外悉顯悉靈軍興以來各行省被賊郡縣賴神力以保全者十常四五而關帝之威靈顯應爲尤多故累朝封號暨春秋日祀典亦視諸神爲尤崇銅邑之有武廟不審所原始其故址則今重修於縣治成慶門外者也邑志載萬歷時奢崇明陷淪至銅取廟匾攻城匾墮斃賊目梅四數人賊大恐遂燒廟去康熙中乃復葺之咸豐庚申藍逆圍銅城廟復燬而正殿巍然獨存神像在焉今猶凜凜有英氣越丁卯前縣于公移建廟祀於城西奉安神牌因文廟舊址而新之而成慶門外數百年之遺像遂淪沒於荒榛野蔓斷碣頽垣無復過而問者癸巳春楚北秦侯來令是邦卽詢父老廟所以復燬之由乃知藍逆困城不克者皆荷神靈默相人第謂廟像獨存爲神之靈而不知存像以存城者尤爲威靈顯應之極也公餘甫暇亟謀興復旣捐俸百緡爲導復募邑樂善者合助錢二千緡有差庀材命匠凡四餘月而落成夫百物之廢興與時消息苟廢矣不值其時雖積數十年之久千百人之感歎流連而茫無一策時至則勃勃發之今之煥然一新者非卽在曩日斷碣頽垣

荒榛野蔓中者耶而一阨於奢逆之焚再阨於藍逆之燼卒使神靈不昧廟貌重新豈非待時而興而守土者亦與有責焉者耶或曰廟無二主則邑無二廟今非有二廟乎不知神在天下猶水在地中無往不遇蘇子云譬如鑿井得泉而曰水專在是豈理也哉且神像屢著靈異亦不可無廟以妥之繼此而十年百年人民安堵老死不見兵革則斯廟之成更以鞏固皇輿獲神無窮之阿護也

吳厚甫明經感應篇時文序

余之甫至巴川也詢同門純篤端謹之士僉曰吳先生岳南明年夏訪岳南於紫陽書院時主講院課二年矣著齒碩德言則動法學者敬之嗣見其猶子登瀛益知岳南有弟爲明經厚甫先生夙負重名門下多顯達士而先生獨資志歿學者尤悼之惜之余方憾不常見岳南伸道義之契而厚甫已爲古人更不獲一接音塵以遍閱當代賢豪用是益隱歎於中不能置甲午春副孝廉秦君方平手一卷來曰此吳厚甫先生感應篇時藝也先生故豪於文謂制藝自有明以來行世者棟充牛汗卽以陰鷲文覺世經二書作帖括體吾鄉老宿亦嘗爲之絕無文感應篇者乃分目其章句得時藝若干篇歿之日門人懼致散軼欲壽劄牘而未果今請定之余維士至今日第以時文博科目卽高自期許爲傳世計亦無過藝林諷誦爭百年後之名稱求其因文見道身體力行往往難之况假著作導人爲善者耶而先生以誘掖之懷爲激揚之舉取太上感應之說發爲詞章俾專攻制藝者樂誦其文而忘其爲格言箴語庶或觸目警心渙然怡然隱動其固有之天良以懲勸善於不覺則雖時文小道而藉此

扶持世教整飭士習其裨益又豈鮮哉讀既盡爲弁數言簡首歸之方平並以置岳南先生勿痛念鶴原爲歿世無傳也

綵虹橋記

水自英井東出折跳石河而南修鱗赴壑蜿蜒逕東北行與合灘會是爲小安溪溪當縣治東南入赤水西界奔流迅疾遇雨輒漲洪濤高浪動飄行人溪有橋曰小井爲銅壁孔道距大廟福興二場各七里許蓋成於乾隆初紀去今且百有餘年者也歲久橋平泥洿漸起盛夏湍激沒者數焉嚮之歌蕩平者於此爲坎窞里人虞之乃大募樂善君子助錢六千餘緡爲弓洞五高度四丈縱長七十尺有奇闊三之一厚半於闊之數以光緒癸巳某月經始閱明年五月落成是役也劉君哲士捐貲最富夏君鼎卿督修最力袁君應奎張君星橋勸募最勤亦最廣會幾何日而振陷起卑峨峨乎成康莊矣天下利濟之事皆賢人君子所欲爲而程功常大時勢常艱往往拊膺太息或數年而弗遂逮數十年而中止得強有力者慷慨任之則衆擎共舉贊襄恐後不復以艱鉅難勝爲疑今哲士一發宏願而鼎卿諸君子奮然翕然各極其推波助瀾之勇以相與疊土而成臺積篲而爲山所謂莫爲之倡雖義弗舉莫爲之和雖善弗終者也可不謂賢與橋既成胡侯額曰綵虹取唐李白雙橋落綵詩意謂合小井而一之也抑更有說焉虹帝弓也星弧射隱鎮懾百怪蛟驅鱷莫利於此行見小安溪上下妖浸不興文瀾迴他日有射策明光者且以斯橋爲嚆矢焉又司教者所厚望也夫

上黎菴齋 庶昌觀察書

前冬恭謁憲轅領到大纂續古文辭見其體例謹嚴決擇精審窮源盡流囊括今古誦之餘質深誠服士生斯世嚮往各殊若循正軌以相肄習不爲岐塗所惑日新月異必有紹馬班韓歐而起者是纂不誠後學繩筏哉伏聞大著有拙真園稿恨未及見既讀是書如見拙真園稿也宜聖定禮刪書後人不以爲前代遺篇而以爲孔氏定本述者之明不讓作者之聖今昔類然則評詞纂序何異說卦文言學者可知所師法矣夫集經史百家之說以求合乎繩墨軌範之間非所造已詣深微必不能別白至當讀繩墨軌範之書而不識集是書者之所造以借砭在己之所學雖日與經史百家相對而已之妍醜莫由自知其爲內疚奚啻倍蓰什佰已也章質性庸愚無博聞強記之能名師益友之導少習古文涉獵徇徃復以科舉之學桎梏半生竟至老無一得沙門日誦法華與證菩提茫然不了庸工操習藝以理牀足遇梓人度材則斧彼鋸彼而已何者所業之不精也今模範在前不就而陶之冶之謂之畫地自域其又奚辭夫文藝末矣取法未上亦無由假以成名違言因文見道上窺聖學毫末耶不揣瀟薄謹錄舊所爲文二十一首呈祈訓示亦知樗櫟散才未足當匠氏一顧然宏獎方殷非葑菲棄倘末以爲不屑效而繩則焉俾得稍識程途藉端趨向庶驚駭下駟附驥尾而不顛蹶者望塵追之矣

李善卿學博七十壽序 代王藝菴郡伯作

蜀自文翁倡化邛益巴涪聲教旁流名都顯邑之區下逮僻鄉陋壤秀良喬野歷周秦數百年不習詩書者翕然

有蒸蒸嚮學之意班氏謂天下郡國設學校官由文翁始重其教也重慶處蜀東偏爲古巴郡江山明秀文物衣冠麗都庠序俎豆之詠歌人材之俊發往往甲於他郡殆文翁遺教致然與國家經制常置教授一員副以訓導佐郡守整飭學校不兼他職其選授則用貢士改官暨學正教諭洊陞者故非經術德業超異恒流輒弗能爲州邑冠余守是邦八年矣先後佐余宣教類不乏宿儒而何君扶九頗以文章名當世踵扶九之後蓋齒碩德羣相推重於膠庠則曰李君善卿善卿籍劍門中己酉拔萃科余齊年友也學術純篤言動有禮法平昔事上官接僚友一以謙謹和平使人坐春風中而不覺人咸稱長者初任榮縣教諭四膺秩滿晉今職今諸生自榮來者必親承杖履如子弟之省父兄寢膳依依極娛樂然後去而渝郡諸弟子或一見再見亦宛然相親愛若家人何盛德之感人也夫教授爲一郡師渝屬十四州邑遠率數百里諸生約束督課常寄其任於州縣學卽歲時請謁無過如比年小聘三年大聘之禮莫由時施其訓迪求若大學成均法合春誦夏弦以造之勢絕不行而就兢焉欲其稱職則唯清操淑望儀表士林俾遠近觀型誠服於不言之教以相與敦品而勗學變俗而革風朝廷所以考績陟明者如是止也善卿不既賢矣乎善卿蒞郡三載以今年二月七秩令誕德配苟孺人亦並年生同寅諸君議乞余言爲壽余聞善卿有丈夫子四長毓芳爲乙酉科選貢其三人皆州弟子員伯垔仲篋能祝哽祝饁者奚賴余言顧余方建渝郡書院肄業生常數百人既延扶九何君院長更資善卿監院事善卿倘不辭耄老時時宣吾教而督率之他日舉鄉飲酒禮當卽以善卿引年且升之王朝備三老五更之選如漢李躬桓榮故事不亦休哉

李光甫起 榮 廣文讀書臺記 資州人

光緒乙未春李君光甫權安居學篆與余有事於渝州一日謀假歸叩其意以築室對請何室曰臺奚臺曰讀書且揖曰吾宅於月山城東喧囂湫隘鄰市面塵無由豁吾目靜吾慮宅後度隙基壘石增尋有倍覆以棟宇壁三而洞一其仰可眺某山俯可臨某水中列牙簽萬軸可資吟嘯備講習以寢以處以游以適以終老是鄉也子盍爲我記之余曰月山亦西蜀都會商賈所輻輳鮮衣華食各炫其珠玉錦繡以爲豪而搢紳士大夫之族習泰安豐又相與積粟累貫買田宅長子孫竭慮操心之不已而欲捐棄一切毅然以讀書自娛蓋亦難焉先生其奚樂之爲且吾嘗見世之讀書者矣竟歲兀兀掠前賢之緒餘出而與時流爭科目其得也轉相沿襲競習於詞華以鳴盛世失則挾其所有遨游大帥間抗談時務希朝廷破格之求而倫彝所關人品心術所屬繫淡焉漠焉出焉入焉若有未暇勤求者務乎其名而其實不足以副也先生殆有感於世道人心而尙論古人返求乎性命身心之故與抑將占名山之一席箋注經史作百年後傳人與不然則斯臺也彈風坐月戰酒慶詩逃暑驅寒何適而不可者乃必汲汲於道學之務金匱石室之藏手不停技口不輟誦甚矣其迂也往者先生司教南川以憂去十稔不復出豈非中有所得能塵視軒冕長揖歸廬者耶在壘之上九曰不事王侯高尚其志先生讀書誠尙矣斯臺之成毋亦有獨善之思乎於是先生暢然意滿恍然神怡越日而更屬以崇善閣記

崇善閣記

崇善閣者偶讀書臺而爲東西室者也光甫既以讀書名其臺乃廣余獨善之說復額其閣曰崇善夫善量宏矣恢之則胞民與物懷保乎萬類而勿傷約之則和厚慈祥統食息起居一泯其暴戾恣睢之習宜諸叻爲善言措諸躬爲善行蘊諸中爲善念始不過一二端漸至於十百千萬億積而累之增益而長之不虧不崩不震不騰夫如是之謂崇崇高象也物之高者莫峻於天然非債輕清之氣以實之則東南傾矣山以泰華爲極其上可摘星辰凌霄漢而屹然終古不頽者唯其不讓土壤也敖倉之粟陳陳相因滄海爲百谷王必涓滴能容而後汪洋乎萬里天下事豈有捷獲者哉先生知從善之難如登也行遠自邇升高自卑奮吾精神志氣與理欲爭一日之消長而又立監佐史建之爲閣書之於壁朝夕省覽以觸目而警心終身行之顛沛持之庶幾其寡過矣乎易之大畜曰剛健篤實輝光日新其德升之象曰君子以順德積小以高大蓋言崇也漢明帝問東平王蒼處家何等最樂王言爲善最樂夫能樂於爲善善則未有不崇者先生和易溫恭與人接無爭無忤初蒞安居時卽佈勸世書若干種臘杪以囊米若干周窶人所謂樂善非與方今時事多艱元惡巨奸州邑接踵而頑梗凶虐諸不逞之徒又從而羽翼之其勢岌岌不可終日苟得一鄉一國之善士盛德相感或可默化潛移隨地隨時隱塞其變亂而漸復其昌熙是知先生崇善之意所慮尤有深遠者雖曰和厚慈祥而已胞民與物而已而所以易風俗迴世運靖人心胥於是乎在登斯閣者勿視爲天祿石渠沾沾焉以讀書誇宏博已也

書馬孝廉昌暨女弟鳳琳傳後

余讀黃祥人廉訪馬孝子傳竊嘆孝子之名得廉訪而益彰者也廉訪司衡蜀志表章人物初與孝子遇於百花潭知爲紹相司馬哲嗣因相契洽厥後闡幽潛者卽鉅筆焉非天假之緣與孝子年未冠吮疽愈母其女弟亦祈禱代親天性肫摯固非尋常兒女子所能企然十室有忠信割股代身之事類此者聞亦聞之而名不出鄉里父若祖非簪纓族無顯交貴戚表揚其懿美濯沒弗傳與草木同朽者胡可勝道今孝子一登賢書又司馬篤愛子遂使庸德之行播於都會聞於朝廷歌詠於學士大夫之口深閨弱息亦附其兄名以彰豈非彼蒼矜憐孝子預爲位置特載筆記事者據實直書以信今而傳後哉虞帝無岳牧錫荐烝又克諧一鰥夫耳閔子不游聖門疇許爲人言無聞者自廉訪之傳出一時祠贊坊吟徵題幾遍亦不幸之幸矣司馬與余爲寅交誼一追孝子往事輒忍泣不能成聲然有如此子享如此名猶不足塞其傷悼余因嘗抱西河之慟者聰明椎魯舐犢皆同安得廉訪其人乞傳述一二言澹余悲思也哉

黎純齋觀察六十壽序

代屬縣諸公作

東川於蜀爲鉅鎮轄府三廳州七縣二十有九南控滇黔北抗甘陝東扼荆楚上游飭營五察吏安民其任莫重於兵備旣當水陸衝要商肆賈艘之輻輳編戶籍氓之稠繁往往與蘇杭漢鎮埒威同閫初設三卡稽釐近復置重慶新關監督洋稅而海疆多故法英諸國之傳教者益駢聚此邦弗絕雖大府總持於上守牧令分理於下其間規畫近域綏靖遠疆非誠信素孚久爲中外官商士民所悅服必不能靜謐於無事光緒辛卯黔陽黎公奉天

子命來觀察淪淪之僚屬百執司奔走承奉未逾年而近者欽悅遠者瞻服羣謂公不識何以使人敬愛若此辭而思之上下相接開誠布公未秩微僚胥假詞色舉三十六州縣無一人忍違指使者御吏之寬也造就人材捐俸優廩經世之學應制之程延兩院長分席課之俾郡人士蒸蒸不變者愛士之誠也法外輸將賈人重困寬彼材力益養利源而屬邑承風悉未至腴削遠人者郵商之惠也外人教堂備載和約保護不力利匪害民官實病之今成都內外折毀教堂以十數而重慶晏然無恙諸州郡亦民教相安者柔遠之措置得宜也其他練兵弭盜救火賑荒督關裕餉諸善政道路揄揚不殫述焉惟念柔遠之道今難言矣中國既與通商求如康熙乾嘉時嚴中外之限何由可得矧雜處此土勢不能禽視而獸遇公昔以英法德參贊出使日本國欽差大臣十稔游歷洞悉海外之山川險易風氣習尚以爲外俗雖異禮則制之人情雖詐誠則服之民族雖紛信則一之我苟有以自備卽曲示優容彼亦將俯首帖耳歡欣感激弗暇奚必包藏禍心甘犯我朝不韙哉故公之保護外人正使入吾控御受吾制防罔生事端重爲吾民累而彼果傾心愛附計聽言從如成都教堂賠款亦邀公一言始決此非忠信篤敬可行蠻狃者耶淺陋者或疑之誠未見其大矣雖然公之設施不在是也夷狄之禍中國至今日爲已極曩公應詔陳言卽有天地神明所震怒忠臣烈士所疾首痛心之議今世變益急忠憤宜益激也朝廷若畀大權必能繫南越置之闕下召呼韓邪使之來朝何者公以韓范材畧入參曾文正幕府籌策制敵之方選將行師之要皆默識其機宜用是文章經濟奉法文正者爲多文正不負所學而公猶未盡厥施其駐日國密電張靖達定

亂使倭人不克逞志於朝鮮者出緒餘耳豈所謂躊躇滿志者哉匪惟不滿志而已使猶任欽使豈復有去年之兵禍者哉國恥未雪而遠猷宏抱僅藩蔽蜀東一隅平昔憂樂天下之心必有歉然不自釋者賴朝廷知公久前月召之入覲將大用公其自二千石以下舉於是爲公慶矣中秋令節值公六秩誕辰某等念入都之行不可留也用纂質言爲壽以紀東川四年之績卜羣情想望後澤之殷而不敢以祝嘏諛詞進他日澄清海甸重膺簡命建節來川則竹帛勳名當與文正後先輝映彼躋公堂而稱兕觥者又不僅三府七匯州二十九縣之僚屬濟濟翔翔已也

李太孺人事畧

嗟乎滇南回逆之變其糜爛可勝述哉溯咸豐丙辰迄同治甲戌用兵幾二十年王師始克底定中間屠戮郡邑戕虐官吏屢勦屢撫將帥亦窘無所施而鄉民之避賊避練避官兵者處無甯晷逃無定居戈矛矢石之餘往往雲散星飄十亡其九遲及事平得歸舊廬者常百里無編戶跡良可哀已若吾所聞李太孺人則有異焉太孺人姓某氏雲南某公繼配淑婉而多能往者避回亂日與某公携其婦孺子息晝突宵奔出燹火荆棘以脫於難脫而邊警弗熄遂竄身蜀之會理州州固與滇接壤地險以遠度可無虞明年髮逆擾蜀而州城復陷當是時某公既歿太孺人衰齒嫠居膽破心摧再挈家走塗值賊囊橐爲空此嗷嗷相倚者猶號陶顛覆不離也轉徙十餘稔艱辛萬狀驚魂甫定翩然南歸踪跡里鄰親故渺莫一存獨李氏盡室無恙穆穆雍雍不異在流離困苦時卽傲

有喪亡而孫曾繩繼四代一堂得太孺人維持調護以致此者郡城數千家殆不多觀可不謂能乎太孺人生子三今存其仲卽郁堂少府尊翁也尊翁亦子三入武庠者曰文華長卽少府往年發川爲黎藿齋觀察所賞留重慶新關稽釐日見親任乙未夏與余共事試韓時述太孺人避難之艱與所以拮据室家之劬若有耿耿弗去鬱者因囑一言誌之余嘗論少府之才之賢必有前德可稱道河靈嶽秀亦視人力基培者爲鍾毓聞太孺人往事昭若發矇矣今茲邊境清肅昆明五百里風潮不與少府旦晚膺民社吾意太孺人就養來蜀當欣然喜輒然笑錦車繡轡中歷指某山某川某城邑富庶繁昌非復避亂會理事殘破荒涼景也

成慶門外武廟落成記

剖壁於山磨礱成器不雕鏤焉可備瓊壘乎曰不可製錦於機縫紉爲服不絺繡焉可供朝祭乎曰不可九仞之山勿虧一簣千里之道弗輟一程宮室之有式也以宅安也堂廡廳舍之旣完而垣堵不封根闌不備觀瞻不肅如是則不可以棲人於棲神乎何有成慶門外武廟頽廢在昔前年夏楚北秦侯募葺一新工旣蒞適卸篆去再隲年少尉馮君復出廉俸爲倡並募冷君秀山張君鼎元續其成旣告竣矣而問序於余余謂無前者美弗彰無後者盛弗傳斯廟傾圮數十年得秦侯以勿廢而神像不金紫椹桶無朱丹鏤刻鉅造宏規籌十完九其於典也爲闕馮君乃起而畢彌之譬如畫龍不點睛則不飛其猶東里子產潤色辭命者乎周室經營洛邑召公考其成而君陳卒其事二君者得勿近之少尉且不欲沒人善也彙先後捐貲者勒諸貞珉於是名氏輸款例得備書

致陳子臧明府書

數日不奉教想念殊殷昨者練丁一議衆議如何稟覆當有成說章在局外豈能干與此事第實德虛衷屢廬顧問苟有可以獻納者似不妨進參末議藉資采擇日來讀書觀變偶有感觸謹就管見所及爲左右瀝陳之夫練勇練丁胥爲裁兵起見兵裁則城池無衛何以爲州邑故當要隘者練勇而不當要隘者亦練丁此保固地方之意也然既曰練丁則非如兵勇之可聚不可散今欲預籌歲費立爲團營是有聚無散明矣名雖練丁實則練勇每歲五六十人所需不下一二千金值此國家多難之秋民力十分拮据卽如鹽釐考棚等項已覺不支而又增以每歲練丁之費此費一增永無停日再加脔削有不民窮財盡者乎且地方現無軍務練此五六十人飽食游手勢必藉端倚勢擾害善良卽使管帶約束安分自守而日久懈生與綠營冗兵何異營兵虛糜國帑則裁之練丁坐耗民力則增之是但知卹國艱而不知卹民艱者也竊思此議雖創自上臺此錢不輸之藩庫民捐民用可減可輕愚意今歲只須籌錢八百千以二百千交城防局作爲此時開操一月用費以六百千入局庫作爲後日調防三月口食其錢籌之各鄉其丁選之四附郭每郭於有業農民中挑十五人入城操練日給百錢一月練畢仍遣歸農如唐府兵之法以後每季入城演習一次年終五次如古菟苗獮狩之法每次操飯則城防局備之旗幟器械皆具偶令緝匪亦由防局支費或以三費局助之不動庫錢庫錢乃三月口糧必待有警之日調防入城始行開支不濟者卽照此項籌派期以事平而止截止之日仍留六百千錢入庫以防後患如此則有練丁之益

無練勇之害籌錢者不成永額應調者可濟急需所謂散則爲農聚則爲兵百年不用一日足備無損於國計無碍於官箴而實有裨於民間之元氣者也臺下心勞撫字籌慮必周倘此日留寬大之恩卽異時受無窮之惠口碑所至奚止甘棠永念而已乎唯明公留意焉

馮協中繪事筆目議

魚樂亭主人工繪人物花鳥五年銅尉求者塞門几案縱橫神疲氣竭而人不諒也客有獻策者請爲美玉論價主人有難色客曰試之韓幹爲朱衣人畫馬酬之百緡今豈無其人與取不害廉與不得雅又何誅焉諸君如笑其不值到門而返此之謂謝客

春秋大夫賜諡說

堯舜禹湯之名皆生號也生號而沒稱之故不別立諡以易名易名之典起於成周穆考諡文昭考諡武成康以來尙矣然猶以臣誅君也自周公制禮作樂賜諡曰文則漸及於臣矣遞春秋尤偏及於大夫矣春秋之大夫以魯三家晉六卿齊國高衛孔甯孫氏爲最著鄭則七穆無賜諡也秦楚蔡則諸臣皆無賜諡也其有賜諡者亦不必名實相符北宮喜之諡貞第以伐滅齊豹故析諸鉏之諡成第以宵從公如死鳥故二子皆賜之生前卽一時一事言之非綜其生平論之綜論生平無如諡公叔貞惠文子而文之爲說又僅以修班制交四鄰當之嘗不能稱其義甚矣賜諡之難言也夫春秋人品賢奸雜出其足當孔門品題者嬰僑鮑瑗外殆無幾人易名之時雖恩

由朝廷而褒貶毀譽多出自學士大夫之口苟挾其私好私惡以爲激揚則公論有不盡協者雖然行出於己名生於人亦懲惡勸善之道也孔子曰君子疾沒世而名不稱焉語曰善善從長故春秋之筆不聞議此禮爲非古

杜母張太淑人六十有六壽序

古無壽母之文自魯頌美僖公曰魯侯燕喜令妻壽母後人斷章摘義循而仿之於是爲母壽濫觴然僖公爲莊公庶子母氏成風非嫡夫人詩人贊美君親胡極意揄揚若此母亦以僖公爲魯之賢君成風爲魯之賢母盛德至善頌禱不置與呂東萊爲春秋二百四十年間上自公侯伯男下逮鄉大夫士能崇周禮紓周禍者成風一人而已然則僖公之賢成風成之僖公享國最久又皆成風之福蔭及之一時以下頌上者稱壽其君至以壽其君之親不賢而能如是乎余嘗三復詩意竊嘆今世簪纓族引此義以祝慈幃者何可勝紀而當之無愧色稱之無溢美則惟杜母張太淑人庶幾近之蓋太淑人固時三封翁之副室而芸生觀祭之賢母也封翁四世獨生嫡配楊太淑人亦三育女而乏嗣因爲封翁曰椒花不實焉可強也當爲君謀徵蘭者周訪里閭得太淑人爲之簪甫入門德言功容嘖嘖豔人口而是時杜氏家範嫡庶之分最明起居服御嘖笑語言無一可僭越者太淑人謹之以分自守以卑自牧婉婉婉婉以事嫡室以上博重慈歡心至若營造之大米鹽之細奉養之勤婚嫁之繁則能分嫡室之勞不重爲嫡室一人累由是舉家訢訢然望其有子矣已而果誕男楊太淑人樂之以爲樛木之卒賴葛藟也其在詩曰螽斯羽詵詵兮宜爾子孫振振兮太淑人之可稱一也封翁策名盛司不仕嗜施予邑乘書爲

累世積善前此創建試院造乘駟橋皆太淑人未入門時事咸同以來安鄉義舉日增如賓興全貞諸會育才平糶救火諸局胥納巨款爲倡而里甲之津梁衢道佃屨之旱乾水溢下暨困苦急危老羸廢疾睹聞所至無一不被封翁之惠賈無一不由楊太淑人與太淑人之贊成者世嘗謂素封之家爲子孫蓄財賄者十九而閩中人尤急太淑人獨相夫子種德以遺後嗣所見豈不遠哉其在詩曰泐酌彼行潦搃彼注茲可以濯鬢豈弟君子民之攸歸封翁有焉采蘋之卒章曰誰其尸之有齊季女太淑人有焉其可稱二也自古義方之教主於嚴君慈母雖賢不能越俎而代何則地道無成者也然封翁舉子遲艾年棄養太淑人母道兼師雖季子不育其課伯仲子勿稍貸幼習禮長勵學壯修德業迪訓諄諄卽老宿講勸無以易用是長君謙甫弱冠卽舉茂才以貲爲郎次君芸生尤通敏練達時務有書畫名應童子試不售輸粟助邊累職至觀察使欽荷覃恩褒封母太淑人里人榮之惜謙甫歸道山遺三子甫授室事無鉅細一唯太淑人是主時楊太淑人亦卽世其以一身兼顧兩宅者翼子貽孫之謀至老弗衰其在詩曰焉得護草言樹之背願言思伯使我心悔太淑人之可稱三也夫婦無公事相夫教子而外莫由見其賢能至身爲副室誕男子猶能使正嫡恩禮有加倚之如左右手始終無纖芥隙無遺憾者斯亦難焉太淑人乃盡彰彰如是福祿永綏又何疑乎今年秋值六十有六帨辰謹誌梗畧爲壽其他淑德懿行式於閨幃稱於鄉閭者不殫紀焉他日孫曾蕃衍積善之家必有大啟爾宇爲公室輔者闕宮之詩曰俾爾昌而熾俾爾壽而富又曰俾爾昌而大俾爾耆而艾芸生承歡舉爵當分工歌堂上吹笙鼓簧一頌之也

劉青舫傳

青舫諱煥藜姓劉氏安居老諸生有宿望余嘗序其蕭齋詩錄品節行誼心竊許之光緒甲午聞青舫已歸道山不覺太息捐膺慨藝林之乏端士也又明年其從弟季倫茂才介王君叔雲少尉來謁述青舫盛德事甚悉而於族人尤篤且厚族人不忍沒其實請爲文表章之余既追念舊識義不獲辭其他端不殫述謹卽季倫所稱紀畧爲傳俾後來者勸焉季倫之言曰吾先世爲黔人康熙初始祖妣嚴攜子懋德懋先懋官入蜀歷數世子姓繁衍創建三祠是爲本族析派三大支公爲懋先公支下七世孫考伯坪公初修家乘舫與弟蓮舫實襄其役如馬遷作史記卒成父書先公支祠草創公歷年葺治楹桷燦新以爲魯頌闕宮所以發人孝享之思非僅輝煌廟祀已也族之人有養有教教者成其材養者不失其所癡兒某貧無依倚猶使奉守祠垣以月米終其身餘亦無游手凍餒者此公之有功於本房也懋公支下貧窶者多祭典幾缺公滋恫焉日以大義曉其族衆集金百餘爲五畝之田以供祀事時德公裔孫某材艱難積貲無嗣因導其馨捐入祠材歿其妻則依公以老於是衆稱廉直一以祠事仰公自公入而祠田六倍於昔炳基者德公八世孫也幼失恃賴公成人公以其勤敏付之祠事至今日新月盛衆莫不歸德公者此公之有勞於家房也懋官公支下自明經濟舟公歿其諸子諸昆皆行尊而齒少事無鉅細輒諮白公公亦盡心謀之無畛域或問濟舟公有子曰梅材聘王保卿通守女以梅材早逝入門守貞公哀之敬之爲繼子承家而經紀之且誠其子硯香曰梅材吾宗也吾與汝當世保之勿俾鄉鄰強梁得欺陵寡婦孤

兒以故濟舟公之族無不托其庇蔭者此公之有德於季房也又曰吾族既別之支良莠弗齊鼠牙雀角之爭必賴公一言始解嘗著祠規族規各二十章以誡族衆祀日輒莊誦之由是頑劣者亦稍稍默化矣編警世書一卷胥六十年閱歷所得者所建青藜玉堂兩書院意在樹人爲光宗計易簣之夕族人畢視猶諄諄以此及三祠爲囑語不及私此公之以誠動合族而合族之所以追慕不忘也季倫言之如此余維德色稷鋤之世民俗儉忍視宗族若路人稍知愛敬者亦僅能吉凶賀弔間遺勿絕求其親同肢體痛癢切膚相與調護維持使人生受其庇歿思其德不置此古人之風末俗所難能僅見者青舫何私於族人而令長幼卑尊齊聲衆口稱道遺行欲使信今傳後如此耶記曰尊祖故敬宗敬宗故收族青舫敦睦篤厚不唯收族人之身抑且收族人之心族人之心豈易收哉嗚呼可以風世矣

送桂篤生明府之任忠州序

代銅梁士民作

黔楊桂公治大足之五年政成治理俗通人和憲檄陟牧忠州轄鄆梁墊三屬行有日矣其治下勒遺愛碑紀銘功德紳父老攀轅臥轍相率飲饒於郊士林作詩歌寵行繪事者爭圖畫其形容生立祠社美哉何惠澤感人之深也銅梁去足邑二百十里邊境毗連往者匪徒嘯聚恃犬羊凶逆之羣藉名民教弗輯謁窟穴焚掠擄殺與官府相抗當是時老弱避禍寨丁壯守田廬場集人練團自保旌旗相望鉦鼓之聲相聞而銅邑之三教參濟諸場適當其衝戶駭家驚亦復枕戈待旦勢岌岌不可終日然無人敢撓其鋒者公曰凶人不除吾民無噍類也事

有速發而禍小者何首鼠爲乃親率團勇冒矢石計誘策伏戰擒渠魁於萬谷場下其諸不逞之徒殲者殲散者散近匿遠逃日就靜謐於是銅足邊鄙之民舉嘻嘻然安堵相慶矣夫以一人之智勇謀畧奮其赫威以除禍亂遂使閭閻十萬戶鷄犬不驚凶頑斂跡卽鄰邑士庶亦得托宇下附末光有燕雀營室之樂而無魍魎攫人之憂如此長官猶不令人欣然感帖然服者未之有也昔虞翊爲朝歌長甯季數千人橫行鄉里州郡不能制翊至而猝平之公非其流亞與公在足多惠政大府所知足民所身受茲不殫述述其威澤之及於銅民爲銅民歌誦謳思而不能忘者製之爲錦以揚我公德政以祝我公無疆之休美焉其詞曰

昌州在昔實爲巖疆地險以遠民氣崛強萑苻匿奸俗滋不靖蟻聚蜂屯劫殺爲幸民教紛爭動毀其宅官吏捕之走險奚擇邊境毗連此蒐彼竄羽翼潛成昕夕煽亂凶饑所張波及鄰邑豺虎噬人十室九泣公卹民命往鋤其豪羣醜抗拒白晝操刀巢窟既深詭譎叵測誘之平壤我戰斯克始以言撫繼以力摧一戰成擒馘其次魁賊首亡命狼奔豕突五年滅跡寒灰冷骨餘黨不支如鳥獸散時平到今星朗雲燦夫耕於田婦織於機曰此安樂公食公衣唯我鄰邑西封旣肅邊烽不警荷公之福唯我鄰邑宴然無事宵小潛蹤拜公之賜宣聖有言近說遠來我公爲政賓門洞開公在黔陽簪纓華胄來官西蜀敷功先奏士食其德民服其疇甘棠勿剪遺愛悠悠此去臨江香山所治前賢後賢動名一致今之刺史爲古方伯何以祝公高振六翮匡濟時艱端賴偉人何以祝公福祿長春借寇不得思郇曷已繖蓋送公香花百里

范叔柵德權明府德政序

強圉作噩孟陬元夕銅城燈火峻張管笙雜沓角抵魚龍曼衍之屬喧闐衢市與爆竹聲相聞扶叟携稚來者亦洩洩融融觀遊於轂擊肩摩之下適邑侯歸自渝郡旌旆清塵車騎按轡市人譁呼夾道稽首馬前以爲吾民豐樂之象皆吾賢侯膏澤所賜也賢侯自前年蒞銅絕奔競杜苞苴公私事一無瞻徇而人服其正公庭內外纖微必察勞形案牘無留無滯而人頌其勤新立兩書院經古學以課士增助敬節養濟院以卹瘠周貧而人懷其惠輿誦所稱不殫述矣方今時勢多艱游手失業之徒率盟會聯羣帕首犴刀出歿於幽險狹僻劫富人子以去巧生還者輒致重金贖之官府查拏則地日數徙詭秘飄忽莫可踪跡所過場集負鎗械前驅無一人敢撻其鋒銳世無橋玄誰忍舍一子之命而不縱國賊者此一害也蠹役需索良民所在多有一奉官牘威權隨之甚或暴戾恣睢罔有賤貴悉凌悉虐方之石壕捕戶東廠逮人無以異是而鄉愚不幸往往以戶婚田土之故蕩產毀家不壓彼谿壑不已卽士林被其辱其亦窮忍屈含垢莫敢誰何此又一害也二害不除南山之虎長橋之蛟審無毒於此者乃賢侯斃三刀匪而銅安百數十里凶人滅跡囚兩悍役而一城四郭二十八場集善良稱快歲雖不豐無魑魅我者矣家縱不給無豺虎我者矣吾儕小人日守窮檐風雨饑饉危殆猶得觀光天化日無寇盜之驚役卒追呼之苦賢侯庇我庸有極乎夫人在陷溺中有拯而起者無可報稱唯報以謳思祝禱之詞永矢弗諼焉爰作頌曰

賢侯芳胄武宣之遺孟博希文異派同支楚北分祊望高荆郢代有通德騰光神嶺觀察蘇省實侯封翁揚州懋績累職斯崇棠棣之華四輝其萼兩貢玉堂侯分一鶚郡國繁劇治理需人帝曰欽哉牧我兆民銅梁在蜀爲古巴川剖符作令繼美前賢侯始下車知俗品雜有貪緣者戒聞勿納風聲旣樹衆枉濟蹤下情上達天日重逢成俗化民首重學校課士經古俾窺堂奧養濟有院敬節有堂普增日饑燹獨以康惟彼械匪行同梟獍清晝攫金劫殺亡命哀我富人憚之如虎侯爲捕馘四封安堵昔日行旅晝禁往來今酣斯寢里門夜開尤有蠹役魚肉良善破人家產手握信讞衙規勒石視等弁髦威脇勢奪不刃而刀邦人之苦侯爲解厄刑其尤者創一懲百方春向暖民氣和樂鷄犬不驚鳥飛魚躍士勤其業風服其疇不煩不擾我侯之麻衣者自衣食者自食百里同風我侯之力我有願欲我侯聚之我有疾苦我侯去之我神明侯我父母人非木石戴德豈朽其告而里而鄰而鄉奔走偕來介壽公堂介壽維何誕膺福祿衆母有母期頤永祝更祝我侯晉秩揚徽蔭及哲嗣五鳳齊飛

杜廣文傳

廣文諱煥南字棠村姓杜氏夔州府廩膳生隸籍萬縣杜於萬爲著族其先兩代貢士一官直牧祠某以選貢出宰安東有循名考某膳員早卒學行爲邑庠冠廣文七歲而孤與仲兄廩生煥章依母氏成立少相愛長相敬庭韓豫順怡怡如也性聰慧誦書不逾中人解悟倍之尤嗜學奇寒異暑弗輟其爲文不阿俗好無倚人門戶習沉毅寡言與人一無爭忤值大事則正襟侃談雖鄉先達不能屈咸豐辛酉冬鶴遊坪巨匪東竄邑境戒嚴萬城無

守禦遷者盪起廣文與仲兄請其母曰城四堡居民萬家恃城爲固城富室咸遠徙吾家雖寒素世食廩祿荷國恩若挈家出則一城瓦解矣母曰然趣作城砦論遍諭遷者且集士紳父老於城隍祠倡言大義陳利害譬曉之衆心稍定齊踴躍白縣官設城守局檄廣文弟兄領其事當是時邊警日至團勇出防者米薪不給經費大窘乃奉官牘貸舖民錢日夜稽戶籍完城堞聚矢石督巡邏守望拮据瘠身疲口瘡辛瘁不遑息日唯歸家再飯而已臘月除日猶冒大雪陟城後都峯促土人削崖據形勝沿江置礮船請增堡團援兵入城守馳三里甲勇分防外隘旬月部署萬城儼若金湯矣明年春兩藍逆先後攻城不得逞厥後走張五降王曹圍周逆紹湧皆城守內外團勇之力實則廣文集城隍祠時之一議激之督城守時之贊畫迫成之也前制府駱文忠公廉其實爲請於朝授六品藍翎訓導廣文淡焉事明平家居不復出日與仲兄研窮舊業再應鄉舉荐不售遂銳意經世之學昕夕無稍休而精力由是憊矣著有假齋文詩存四卷頗爲同志所許病革時語戚友曰吾數年究心時務冀獲有所表見爲國家竭犬馬力而今竟如此天哉子一翰藩時甫六歲今以拔萃登賢書由教習知縣改官溫江教諭後爲宜黃縣令殆能繼父志者

傳曰古稱人才難得非盡囿於生也河嶽靈秀鍾毓不擇豈今昔異運哉當世奇傑文雅宏達之儔衆矣或積學末伸或遠道自期而年不副其志如杜子者可勝慨乎杜子年未三十卽有忠義之氣奮發激越衛國家而保鄉里所謂士先器識非耶文以載道令名隨之矧又有足傳者吾聞杜子與其兄皆奉母教維謹母賢且明日常詔

二子膝前論說古今忠孝節廉事然則杜子誠有所受之也於戲難矣

劉先生傳

劉先生者其先秀孝起家累世毓德逮先生清望益隆性行高潔應童子試不售遂入太學棄帖括業翹然以詩畫自娛好讀書洞達事理與論古今世變人事得失暨國朝掌故之由往往盡委窮源動中竅要摺紳先生未嘗不服其博辨也爲詩若干卷往者嚴渭春中丞一見擊節且契其言論丰采欲邀赴黔中爲助三啟而先生不答中丞高之滇匪躡蜀先生挈家走中山結廬僻處不關人事於是託隱丹青者三十六年中山當鐵山之中林壑幽曠車馬塵所不跡自先生以畫名叩門日衆執贄請業來者又多所裁成人謂他日必作傳人先生泊如也晚年益肆力隸篆書日必課數紙爲程暇時必一作畫詩則隨所感觸而已先生自以耄老無用於世也號曰樗叟且題其廬曰三十六陂秋水山莊蓋有兼葭溯洄之意當世知名士遊南浦者無識不識必訪先生秋水之廬而達宦貴人則婉辭謝之是可想見其人矣先生諱秉堃字敦山萬縣人

劉孝廉傳

同治丁卯四川帶補壬戌恩科鄉試揭曉題名第一人者曰劉君家謨謨字紀三萬縣人其遠族有鵬翥者亦以康熙丁卯科領解相距百八十年異矣紀三天姿卓越讀書目數行下或誦所未見詩文雖累語千百既畢輒覆述之無遺工卷摺日能萬楷尤善鐵筆摹漢人印璽數百方刻爲漢印臨存行世其文詞下筆千言與爭捷常倍

從人人以是益重紀三年十八入庠授徒再倍年始舉於鄉公車三上不得志退而教授雲萬之間歲常數十百人時合肥蒯公守夔聘爲蓮峯文峯兩書院院長分課時藝經古復以其愛公子今官檢討者受業而幕中筆札亦時有所倚任紀三謂知遇之不可辜也銳其精神志氣日擁皋比中口講手削目督耳稽心注一飯之頃五官俱竭甚或通夕不寐猶復力疾作蠅頭書鐫紋石撰友人碑銘傳記從無委諸異日謝以不能者嗜儻矣平生無他癖唯嗜蓄名人碑版古硯陳磚故書法篆刻直據爲身心性命之學而篆刻之精識者尤推爲絕業必傳於後今都下頗有流播者獨詩文常多散佚歿時二子孝廉樹聲聲元尙幼今所采輯裁十之一二而已紀三夙負盛名試禮部時無不以金華殿人相許者雲路寥廓鵬翅不張偃蹇十年至欲以雕蟲末技博身後之名而造物猶若靳之也悲夫

李曉嵐墓誌銘

代李星北作

公諱曙字曉嵐其先由黔遷蜀世居治南北二十里之板橋考諱洪萬以居積起家公生而敦謹甫垂髫身範如成人習童軍業不當意循例爲國子員輟講讀綜理宅政服勤習儉多歷年所家業益隆隆然興與平生履遇順適無他奇節異行可見而渾厚篤實不以澆薄隨俗用是益見重鄉里子本達本超妙年英俊能潛心向學親師取友識者覘其志趣竊謂公之光遠之必將有耀也今夫風俗人心不古昔黨族鄉鄰不質直紛紛挾機械以相攻取負聰明才辨鉅細求勝於人不肯抑然下窮於極肆積漸至於忍薄刻削無復有所培養醴育孝子慈孫以光

大門閭或家法相承其子弟又從而加厲焉會無幾何而衣裳鐘鼓瞬息皆非其能錫光篤慶綿延積累以利嗣人者蓋寥寥矣然則公之謹厚篤實豈不可風乎公生於某年月日歿於某年月日葬某鄉某里配某氏生子二女三皆先後適人者銘曰

丹穴之金胚渾則堅崑山之玉太璞則完松柏無華子清且馥鳳鸞和馴是生鸞鸞人而質美木訥近仁祥和在抱我澤如春南山有木其名曰橋梓善承之蕃衍爲椒作宅肯堂其後必大平泉世澤勃興未艾魏重雙丁晉稱二陸明德昌後君子有穀人文既傑泉壤增靈他年駿發視此銘旌

李春芳墓誌銘代 李星北作

人咸言吾宗宜盛大有遠源焉伯陽以降相業如德裕將才如廣文學如揆詞章如太白忠如綱孝如密經濟如鄴侯無論已卽今合肥高陽兩相國勳名世業亦非所敢望以吾蜀言開之雨亭尙書劍之申夫方伯中江之眉生廉訪皆有懋績可稱道雖不能至然足爲吾宗光寵若夫伏處巖穴身不躋闕廷聞譽不動公卿間一邱一壑日與田夫野老逸士幽人優游歿世奚足異者然能守濬之家範不墜百藥令名勤篤謹儉自食其力無仰息於人無偷安於己治家有政教子有法爲宗老爲鄉善士爲國家順民履中蹈和俯仰於光天化日之下生則使人敬歿則使人思如我春芳公者又豈非吾宗之仰乎公者年碩德久爲閩里所矜重族人表鄉望者必首推公而公子載陽襟懷恢遠材力尤足有爲哲嗣篤生益以見公之積累有素也至公履歷行誼已載於夏君誌文茲不

贊書銘曰黔陽芳冑分系於蜀巴巖衍秀峨連瓜屬七世誕公魁梧偉傑材大難用收影巖穴耕釣所留是曰天民農桑醉飽花鳥長春古道照人漢陰抱甕塵世仰之祥麟威鳳人言弓冶子善筋裘匪惟繼述守創僉優龍灘遠洄鳳山高矗斯爲公宅蕃爾妣續

周母張孺人六秩壽序

安居於隋唐置縣江山明秀風俗人物麗都國朝曷縣立鄉故家世族猶有存者而周氏在安爲尤盛安之周一族宦達隱逸率多賢能有聞譽如太學炬卿者嘗於賓僚徐壽珊廣文座上見之明達端謹言動有儀亦篤實君子也既見之明年爲其母張太孺人六十令誕壽珊手一編囑曰此吾友周炬卿母太孺人懿行也郝範鍾徽里閩交贊僉祈君爲文壽之懿行之狀曰太孺人爲從九銜張公鳳鳴女中書銜良臣君親姑家有世德幼嫻姆教其歸用賓公時兩親猶在堂養志承顏歷十餘年無間舅歿夫兄弟六人析爨而太孺人獨依姑氏以居膝下依依情逾諸妯禮所謂婦事舅姑如事父母者太孺人有焉又曰用賓公少習孫吳嘗以騎射領青衿屢應鄉科不售值同治庚午東川戒嚴藍逆大順擾安境岌岌不可終日太孺人謂用賓君曰公身爲武庠公侯干城貴能扞禦外侮今賊逼鄉境少壯撓鋒鏑老羸轉溝壑婦若女涕泣道路傷心慘目盍提一旅解救之用賓公投袂卽起選團丁精銳者若干人星夜馳赴黑龍嘴扼賊要害屯營設伏以拒賊賊窘數日不得渡遂竄他邑時村寨居民流離遷徙者皆幸安全無恙此用賓公之功實太孺人激勸之力史稱李侃妻勸侃守項城却李希烈不是過

也又曰太孺人生子女六女長適朱次適唐皆恪奉母訓無遺議於夫家子世卿炬卿髫年而孤太孺人教之成人以納粟補國子少子二亦讀書有成識者謂王氏四玉必能光大門閭者也又曰太孺人善理家用賓客既歿家政秩然有紀園廬疆畝倍於疇昔然周困濟乏緩急弗吝族戚中不能自存者鄉鄰有危難者莊戶歲欠額粟除道成梁之募貲者靡不指困以助於是里人益稱道其賢不衰懿行之言如此余唯相夫訓子閨中賢者類能之而事舅姑以孝樂善好施無倦色已爲人情所希矧四郊多壘烽燧日驚人奔走逃匿不暇乃猶從容設謀扞衛桑梓此鬚眉男子不易能豈所望之巾幗弱息者而太孺人獨勗夫子以練圍殺賊保全百千生命於危急存亡之秋陷者立起困者立蘇殆仁人之心濟世安人之行事古所謂陰行善其此類與語曰大德者必得其壽太孺人有此隱德其獲享遐齡無疑者他日由耄耄而期頤百齡衍慶五世同堂史氏載筆揚徽又將爲熙朝增一人瑞不獨安居周氏藉資閭里之榮全族之光寵已也

陳眉生封君家傳

君姓陳氏諱壽齡字眉生其先由湘徙蜀遂家於萬考諱某早卒君與仲弟德菴依母氏成立幼無違教長無違志能纖悉得母氏歡仲弟少君五年君處以和有箴警則於夜深秉燭置酒相對喁喁細語外人秘不聞也仲弟用益敬愛事兄有加禮道光季年家壁立無所得養親資乃棄儒服從雲陽魏翁受計然策魏翁悅其忠篤倚如臂肘久之以思親故固請於魏得旋邑邑有劇君心泉者信義人也與君稱莫逆一日君握手語曰吾輩親老家

貧不能卒讀書取人間富若貴然管仲與鮑叔賈卒顯諸侯事在人爲耳乃合謀張市於郭南號曰興發壽暱
勲以經以營行之數歲揚帆下荆宜指漢滬上則渝敘以西資內富瀘之埠盡岷江入海皆其賈船所及故四
十餘年聲聞益遠今之談商務者川楚淮粵無不知興發壽陳某其人也初君與周君起買嘗於文昌祠前密立
誓約歲有贏必列如干數爲利濟事有渝盟者明神殛之由是歲踐其言會周君捐館其嗣友堂齒稚君獨任買
事贏餘者仍中剖之而利濟如干數猶歲中豫列以爲常安鄉近多善舉如育嬰全貞義渡利農保赤寒衣施粥
義塚諸會養濟棹流卹孤救生濟臘平糶救火諸局君皆有補助不以多寡限唯視會局所不足者足之此一例
也城鄉置義學十二歲收貧家子二百四十人入學飯盲者於訓警館習勸善書日出數十人至通衢勸善設仁
壽藥局市南以貧困來者不取值另館醫士二人爲貧乏療疾曰立人堂其治瘡瘍者曰外科局膏丹備焉增置
白巖書院膏獎奮起肄業士造就實繁之數者歲費約數千金皆二十餘年獨舉無慕自外人者此又一例也往
者瀘州大火燬民居殆半爲蜀中罕有奇劫君捐募萬二千金飛濟焚者明年直隸水復捐千金明年浙江水先
後捐千金有奇又明年貴州旱甘肅荐飢山東河南相繼告賑亦捐金各數百有差不區畛域不由勸輸不邀義
敘此又一例也附郭居民萬戶待君舉火者率數百家其禮賢餽士濟急扶危因事隨時又皆有不可數計者大
府廉其實屢錫褒異丁文誠公督川時嘗以積善餘慶門額五品冠服遣都司某親賚至第里人榮之厥後劉仲
帥亦獎以齒德兼優惠會敏亦獎以玉壘福星卽鎮軍田觀察姚郡伯蒯邑尊馮彭諸公咸致旌額不殫述焉余

嘗壽君六秩一聯云大府亦知名可識善人天下少齊民俱上壽居然生佛萬家看蓋紀實也君寬厚沉默不輕言笑而睿於運籌居常兀坐室中案置檀爐一檠茗鑪一楮墨簿書悉具神游目想舉百物之贏絀四時之消息長江數千里之險夷司事數十百人之能否日會於一室量之度之書之識之號之令之措之行之故謀無不中中無不獲歲所贏輒億萬計而君以施濟爲樂創興祠田贍族外不廣置產業曰勿長子孫驕逸也晚年定宅於舉人關宗祠東偏園林幽潔蓋將老焉丙申邑大饑死亡相屬乃復出任事倡捐平糶布粥厥生全數千人觀察任公下其法於屬邑巫山大甯尤奇荒吏輦金百鎰檄君代賑之於是兩邑之饑孳以活是時制府鹿公創辦四川商務委君商總謝不獲猶力疾任白蠟公司出全力裕國生平好義急公類如此明年疾作遂卒於里第夫人朱溫仁淑惠與君少同苦長同憂患佐興宏業卒成善譽公歿之五日夫人亦偕歸泉壤異哉子男五冢嗣馨德癸巳科舉人通江教諭次興讓邑弟子員次興榮興海均以輸餉功敘五品職次興業出繼仲弟德菴爲嗣與興讓同歲入邑庠興海以增級請封誥君通奉大夫夫人如其品戊戌四月冢嗣以君歿來告哀且謂章知君悉他日有採君遺行者不可無言以爲史氏張本

傳曰太史公曰白圭樂觀時變天下治生者主之猗頓用鹽鹽起而郭縱冶鐵亦與王侯埒富豈非樂事勸業圖生之正道哉今泰西以商立國輪舟鐵軌各竭其聰明材力環地球所至以爭利權蓋算無遺策矣然而豐嗇唯命巧者不足拙者有餘亦人世所恒有陳君之致厚實豈獨其心計工耶抑利人濟物所由來者漸也在禮家施

不及國大夫不收公利陳氏得民平仲譏焉顧任郵之行大司徒垂爲鄉教際此時勢艱難而能傾億萬之資上佐國家下周閭里又朝廷所褒美弗遑者黔敖卜式諸人獨非古義民與陳君以爲善最樂數十稔不倦而身以名榮子以貴顯直足與感一時且其事親孝生則養志歿猶廬墓逾禫與仲弟相愛逮老彌篤天之嘉厚善人又豈一端盡哉曩歲陳伯鸞學使嘗書孝友可風額其門有以夫有以夫

致范椒柎明府書

日來外議洶洶報彰述古責余蠻受傷且有畢命之說雖言未盡實而與彭同去者先後逃回可知彼族桀驁不能以陸賈下趙佗也竊查余棟臣擄去華司鐸一案計今兩月有餘印委各官心力俱瘁卽各縣士紳奉札往說理論者不一其人和解者相望於道而迄無成局日露危機大足居民紛紛上寨鄰邑紳富滾滾入城畢竟龍水鎮動靜不得確耗華司鐸生死未有明言此時謀夫孔多實亦難得要領夫棟臣雖非叛逆却非順民兼以騎虎之勢黨與日集日多一旦兵變陳橋彼又豈能自主現聞糧食缺乏彼族已分途告貸不已繼以估索估索不已繼以搶劫必然之勢也卽使稍安勿躁不敢擅離巢穴而華司鐸一日不釋彼卽可橫行一日無人敢撻其鋒毛羽旣豐恐遲發而禍益大且法人未必久待若以安南法人被擄之事例之亦將勒債款十萬矣見康長索保國會序償法之後我仍不敢用兵投鼠忌器故也必待彼焚掠四出已成流寇然後命將出師不亦晚乎夫棟臣之挾司鐸以自固者一則使大兵不敢發一則有奇貨可久居月來當道謀議皆以取回司鐸爲先着而司鐸不習寢食有傳

聞其病死者卽或未死而彼方處心積慮以得之我乃空口滑舌以釋之秦非無人愚不至此愚以爲今日之計宜選一精詳穩練之細作混入龍水鎮禹家寺玉口坳等處先探司鐸存否必先親見其人再探彼黨實有若干人團民附從者不算現在有無旗幟每日曾否操練糧餉足否謀主爲誰巢穴某處險隘何方逐一探聽明確如司鐸果死已無顧忌便卽密稟上臺酒帥夜起直搗扁穴殲厥渠魁一面遣人議和使不防備或可一舉蕩平若司鐸尙在則遣人議和非許以重賂不可萬金非多八千非少蓋彼黨以劫掠爲生其往投龍鎮者皆欲發外財者也不可以理論不可以威脅而無不可以利動能遂所欲自然瓦解惟此款甚鉅給之自官既非政體輸之自團亦失輿情計惟派諸教民則有詞可措蓋棟臣所以擄司鐸者皆民教不和之宿怨也今旣已和講自宜釋回司鐸司鐸乃教民之宗主宗主釋回無恙而教民不費一錢律以西人和約諸例恐亦無此辦法棟臣等數月之用款誰與償還龍水鎮以後之防範誰與籌備況司鐸無人贖取則奇貨已成匏瓜勢必借教民發難教民等亦知其禍在眉睫紛紛遷徙近者數十里遠者數百里萬一禍機猝起以後之田園屋宇能自保乎現在之衣物財帛不耗散乎與其隨地花銷而後患莫測曷若大家湊款而各保無事棟臣得錢自不與教民爲仇教民出錢卽可與棟臣修好五年積怨一朝完結放下刀劍立買牛犢消患弭兵之策莫切於此然此非丁公不辦也丁公非授意於紳糧亦不辦紳糧非熟習教民之有勢力者委曲開導亦不辦若僅恃渺不相屬之三五書生赤手空談日向棟臣說好是猶畫餅充饑鼓唇止沸庸有濟乎至華司鐸釋回之日仍須親書和約彼此不修舊怨若復詣

總理衙門要挾勒軍督司道究辦則任棟臣所爲司鐸不得辭咎如此則司鐸雖去棟臣亦無遠憂官府不議罪外人不尋仇黨與又有錢可散彼反側子自安矣亦何樂爲叛逆不爲良民哉諸長官所以不肯言阿堵物者懼官令不肅匪風益熾且無款可籌也若出自教民亦何傷於政體況可保若輩身家乎但得解人善導當亦不吝傾囊也雨窗稍暇獨居深念及此不覺其言之長謹質壽席如以爲芻蕘可采盍與丁公一函商之

送范叔柵明府卸任銅梁序

代銅梁士民作

公甫治銅之三年百廢興舉鉅害殲除邦人士謳祝依戴亦旣作頌以紀善績至於今弗諼明年戊戌政通民和歲大稔人咸謂豐樂平康公之賜也十月上旬大府忽檄卸篆邑父老走相告曰公將行矣若之何吾儕當臥轍攀轅以留之識者曰不可則當申訴上官爲吾民借議者曰不能然則敝公數年德政以寵公行可乎曰復矣禱公陞秩祝公遐福可乎曰例詞耳然則何說之辭曰請言近事當八月望前三日鄰氛不靖邑中倉卒戒嚴團防初立人無固志戶丁壯額不遞千迫使乘城分陣有闕瞥見六羸烽火骨慄膽碎傍晚柝起沿濠戈戟林立有攻城狀公率官紳士庶暨合署丁役帕首韉刀奮力堵禦而城外聲東擊西南城危迫時猝聞教堂火發趨奔救焚撲滅未盡城北人連復告急星馳抵拒正蟻聚蜂屯不可爬梳聞者忽飛報曰司鐸被刦出城矣其時煙焰迷天塵埃漲地婦孺號陶人馬驚喧焚者不知何來刦者不知何往五中裂駭狐鼠皆兵而守陴益不敢懈東方旣白圍攻者始稍稍引去城賴以完而公亦精疲力竭矣月晦之日復訛傳外兵來銅鄉團震異懼城守單弱難當大

於敵是不期而集者數千百人公撫之曰此訛言耳百端慰曉團民始爲解甲此依依猶昨日也一旦舍吾民去則公之力保危城撫卹萬衆者其誰白之吾民更何以爲情耶今夫儒者讀聖賢書無非欲綴巍科躋顯秩上報國家下惠黎元以行吾素志已耳旣躬膺民社常則除莠安良變則慎固封守保全百族身家如此盡職良亦未忝乃以民教不和之故無端釁起湧出翻海狂瀾橫流所至使人拒之不能擊之不敢束手張目任其馳驟飛揚於慘雨愁雲之下此際保教保民固無偏倚而失城失鐸究有重輕時危勢迫萬難兼顧此固君親長上所曲原天地鬼神所默鑒者而竟以此去位爲守土者不亦難乎公行矣吾儕小人下情無由上訴惟冀朝廷廉其實諒其衷俾我使君得安復舊治也則銅安兩邑二十八場百八十餘里之紳耆士庶無不以手加額曰天高聽卑皇肯照徹

李筱青明府德政序

代銅梁士民作

古者民頌其上以魯僖思樂一什爲最摯爲僖公能克淮夷也獻猷獻囚之詠不惜鋪張揚厲以稱伐記功而必先祝之曰永錫難老暨闕宮再賡則膺戎狄懲荆舒者直曰俾爾壽富俾爾昌大俾爾耆艾善哉何獻諛貢媚若斯極也勿亦鴻功駿烈實能保國保民使民不能忘而始以祝辭進與君子讀詩至此未嘗不歎眉壽保魯之文爲詩人善頌善禱者也邑侯李公以楚北名孝廉來權茲上下車之始值鄰氛不靖城防未遽戒嚴繕堞濬濠練兵整械守隘備邊諸要政日夕修舉外匪之刀劍刦掠者盡法懲創於是境內恃以無虞且鎮固焉會豪就撫其

叛黨分竄旁邑而余紹全鼻捷敢戰所部常多勁卒首犯銅梁欲趨合州以窺重慶臘月既望前軍突至涼水場將逼城下時城守單弱練卒未經陣壘鄉團道遠者征調弗及公欲反主爲客乘賊不備乃戎服管屢率統帶鄉兵者料簡精銳夜半啟城出聲言發涼水既忽改道白羊意賊知官軍至必趨白羊薄城使我進不得退退無所歸若先至白羊迎擊則烏獸散矣十八日五鼓抵場門果與賊遇黃塵曉霧中無慮千數百人公令壯士燃巨礮轟賊賊衆震駭以爲將軍從天而下也倉皇交綏慶戰三時許賊無退志公益親冒矢石揮軍前進陣斬其軍師徐道人徐道人者賊之謀主彼中所倚以成大業者也我軍既戮其魁乘勝逐北呼聲動山嶽賊遂大潰殺斃悍日多名怯者殲旃奪獲軍械無算是役也公以單騎走險躬先士卒遂使百族感奮士紳不有家丁壯不有身踴躍迅發拚命於鎗血礮肉之下卒令虜功克奏四鄙安全其保我疆圉保我人民者豈僅尋常尺斗膏澤間耶方今春融物茂閭閻安堵如恒邦人鼓舞歡欣咸樂躋堂稱觥以介公壽謂前日不有公則無我民無今日也謹製頌詞竊取眉壽保魯之義歌頌功德他日天錫純嘏長庇吾民夫奚疑者頌曰

隴西之望萃於郢鄂代毓達人冠冕京洛賢侯篤生挺英翹秀巍科既掇羣生在宥來宦西蜀一琴一鶴抗志龔黃先憂後樂雅安始任爲衝繁難期月報政士服民歡大府曰賢再檄茲土邦人仰之方叔召虎時方多故鄰有氛稔楚歌四面風鶴時臨公誠吾民勿怖勿悖陽示優游陰修戒備刀匪橫行良善不免往擒魁渠立正刑典龍水鎮會相戒勿犯何來小醜當我韓范甫竄涼水疾走白羊公率勁旅突阨其吭夜行曉戰兵神以速桴鼓震天

敢退者戮士卒奮呼軍師授首一舉蕩平烏飛獸走乃告於衆窮寇勿追整旅言旋凱歌相隨昔彼嘯聚千百整
整一朝蹴之飄蓬斷梗昔我老弱風雨乘城今酣高枕鷄犬無驚士游於庠農安於畝工賈復業賀功置酒賀功
維何殲厥渠魁置酒維何緝兇親陪方春向暖陽雨及時民物有託拜公之施學校如林家絃戶詠偃武修文賀
公之慶公有高堂福祿駢之公有哲嗣瓜瓞綿之爲告我民我老我幼躋我公堂奉觴上壽有岳如巴有江如瓊
與公不朽禱祝長生

甯經館文鈔卷之三

萬縣杜煥章成軒著

李筱青明府德政序 代銅梁紙商作

邑侯李公治銅梁之三月與利除弊與民更始民既欣欣然望治惕惕然無敢犯法其時鄰氛未靖土匪猶四出劫掠各里場練團修堡紛紛攘攘日以斂錢爲急雖曰富者出資貧者出力而貲力有限謀生無餘不免坐荒本業饑妻寒子卽富者家或中貲此供彼給實亦疲於奔命明知時勢艱虞有民窮財盡之憂徒以暫保身家卽何敢稍惜錙銖顯違衆論究之能補眼前瘡已剜心頭肉也賢侯洞悉民隱念多事之秋弊難遽革蓋心戚之自白羊場之役公率精壯一旅身先士卒襲破余紹全股匪陣斬其軍師徐道人於是餘黨潰散全境肅清公曰此可以蘇吾民矣乃撤城防減練丁裁鄉團科歛諸費罷一切私抽釐而紙商之釐尤首削之一時沾被恩施者懽聲雷動矣先是銅邑紙產皆取道安居舟運太和鎮出售去年秋安人練團修堡經費不充議抽紙釐爲助而紙商弗順也軍興以來商務十虧其九卽蠅頭微利亦險阻艱難中所餘不足資事畜頻加脔削凍餒立見此不言之隱衷無由爲長官訴者而賢侯體卹至之有不令人感激涕零者乎春風送暖邑人紀公戰績咸製錦稱觴爲公壽吾儕不文不能導揚盛美惟從諸君子後繳蓋躋堂望吾賢侯是冒是覆以旣幃此邦也則又不僅吾業紙諸

人感恩戴德已也

彭母熊太宜人七秩壽序

彭生春臺邑庠中個儷士也有口辨能爲人解難紛以宣講勸善故終身不茹葷酒家素微而性質揮霍利濟事亦優爲之處變亂世胆略逾同儕大足之難嘗隻身出入虎口蹈鋒鏑捐項踵欲以陸賈下趙佗乃不爲鄙生之烹者亦幸耳時有勸沮其行者生曰吾上報國家下衛桑梓苟殺身成仁亦揚名顯親事也何怯爲迄招撫議成生與有力方伯王公廉其實獎銜五品並推恩兩子一弟而母太宜人亦蒙觀察任公給五品服霞帔象珠如例里人榮之以爲崔邠之導輿不是過也乙亥夏生以太宜人七旬晉二族親將製錦稱觴特陳事略丐余一言余唯人子欲表揚其親恒情類然然必其親實有可稱述或子有善行可以歸美於親者斯表彰無愧否焉則諛春臺有招撫功例得歸美聞龍鎮被傷時太宜人使人諭之曰苟利軍國死生以之勿以吾爲念壯哉斯言賢於倚門倚閭者矣是安可以不壽謹按春臺之略曰述古母氏熊處士光華公仲女柏村公女弟幼而貞靜年十八歸吾父煥菴公婦道無違時翁姑具慶重慈在堂母事之咸得歡心遭家多故大父母先後棄養生計日迫母以紡績上奉八旬曾祖母孝敬有加曾祖母臨歿猶慰之曰孫婦事我孝願汝享壽過我得佳婦往兒事汝如事我則吾目瞑矣此內寢遺言至今猶有能稱道者又曰先父謝人世逮今二十餘年遺子述古好古信古教養婚育一唯母氏是賴中間經歷艱險百瘁弗辭今年逾七十祭祀賓客之事猶與婦輩共操作灌園芸圃亦躬親焉諫之

則曰吾家故寒素不勤衣食何出人勞則善心生汝不聞敬姜之誠公文伯乎且吾亦樂此不疲無害也由是舉家皆習於勤無偷惰者又曰母生平最喜人讀書家雖不給子孫無幼長悉令就傅卒業述古少從柏村公遊母督之嚴入庠後負笈遠方歸亦必詢其學之進否且謂讀書貴化氣質暴戾者使之平傲狠者使之和躁妄者使之誠篤乃不失爲君子若僅工詞章以弋取科名專矜筆墨以干與人事此尙非善讀書者述古謹誌之不敢忘又曰吾母性慈和崇儉而喜施米鹽所餘輒以濟里中之困乏者嘗念危急人所時有不與周卹則窮民無告亂民得嘯而聚之吝財者欲自保身家得乎故拯一窮民卽少一亂民弭一亂民卽多一良民使人皆盡其力所得爲天下不足靖也事略之言如此今夫婦無公事家庭聚處之常不過奉親相夫育子而已苟大端克盡卽不失其令名矧敎家課子以讀書爲立品之方以施與爲弭亂之計其深識遠慮又豈尋常巾幗所能及者太宜人乃卓卓如是宜其令子克家善體母教而移孝以作忠也漢唐以來多賢母雋不疑李景讓輩皆由慈訓玉成之使春臺捧毛義之檄馳驅皇路則太宜人懿教必有進而益上者他日壽母之文揚鴻鋪駿又豈囑囑于子僅道家常絮語而已哉

重刻幼學歌序

星象塞天窺璣衡者能名斗而窮經之士茫如也海嶽漲地騁航輪者解分方而扁戶之子漠然也蜚僣以來之人事亭毒以內之名物紛紜蕃變而不可辨識者老宿猶慚博洽童子何賅焉雖然詳者繁矣記其略精者格矣

習其粗深者晦矣喻其淺少而喃喃壯老而弗諼多識前言基始韶年童烏解法元李百藥誦琅瑯稻箋何非諫教獨先與余嘗欲纂一書課塾子冗紛鮮暇適浙友吳少青贈以鄉人所著幼學歌簡晰孚當類余懷所欲白因減增數條并稍易其音韻與蜀音小異者畝付剞劂以擴傳播世有拳拳蒙養者備一冊而課之則識之無辨宇宙之慧不足希矣

重刻韻字鑑序

天籟無形風雷洩其竅地籟無垠江河宣其奧人以喉舌成聲隨輕重濁而舒嘯婦謳童吟衢謠村調皆化機自然之元妙也管子謂五方音韻各象其川原泉壤深淺廣狹而出故審音以寄韻定韻以存字雖書契以來造作者爲而同文之治舍是末由畫一聲音之道殆微妙難言哉晚進罕通韻學卽休文讓譜亦僅識別四聲今有並四聲不曉者不獨歐陽李迪落韻黜解已也往游都下護韻字鑑一書鈎稽良便情淮風別雨強半塞牘特加校讐梓公同好俾臨時省覽者不致讀都爲都誦篋作篋急就之章於是焉在若由此而識七音洞十二律通八十四聲以上窺古人制作之精乾坤宣洩之秘是又見深形上之嚆矢矣所望吾黨之精研小學者

秦鳳五文集序

黃河之源不發於宿海積雨而盈之亦行潦耳太行之脈不衍於崑崙撮土而壘之亦邱垤耳人無元精者不壽木無本根者不茂文章千古之事何獨不然然吾見今之誇著作者矣淺陋剽竊妄率操觚問墳典弗知責掌故

弗曉詢風雅源流弗悉猶復栩栩揚揚著等身書試萬言策儼然附作者之林徵論百年以後千里而外卽几席旦暮間不遽爲有識所訕笑者幾希矣合陽秦鳳五廣文邑名宿也夙稟異質有用書靡不流覽而易學尤邃所著經餘問墨闡發易象頗能洞達陰陽窺益虛消息之蘊爰辰卦氣如數章紋論史集選蹊徑獨闢無隻言拾牙後慧學之博者非尋常淺近可同日語也議者謂經餘闌入時藝史餘拉雜詩詞選餘一卷有集用單字者體例弗嚴君子病之然能據經以說理宗史以集選法上取中不蹈近世卑瑣齷齪之習秦君不加人一等哉今世變極矣上書陳策賢豪競起嘗欲得曉暢時務者與抵掌談天下事秦君關心治忽墨藩所餘必尤有經世之書出爲斯人發矇振聵者厝火積薪之上不嫌一策治安乎拭目俟之矣

曾修誠傳

去銅治二十里有山曰六羸烟圍雲抱崗巒秀出環山而居者多文學士隱居子半焉黃冊所稽嘗以曾氏爲著族曾出姒姓夏後也少康封孫成烈於甯後去邑爲曾氏曾在孔門尙矣宋明以來盛於西江今之士著銅邑者毋亦自南豐來與其世系不可考吾友懿甫茂才其篤學於南豐爲近一日手一編謁曰此先府君行述嗣人不忍沒其實唯先生傳之謹按公諱昭興字修誠邑明經廷欽公冢子孝友肅謹善治家人生業年十二輟讀就耕日率母弟四與傭衆共操作男田女機甘勞忍苦卒佐乃翁拓田百畝有奇由是鄉閭皆以爲能後廷欽公盲於目其繼室撫子嚴厲事無鉅細悉苛責之公外酬庶務內承兩親色養誠敬和婉曾無辭微見於顏面廷欽公歿

事繼母氏尤謹其時諸弟已議析爨自金帛米薪以逮園蔬圃果之微末皆唯母氏所恣取靡不罄瓶以奉由是宗族皆以爲賢銅之俗兄弟析箸者必酌留田畝存諸公歲取其息以供祭祀賓客名曰官上卽官府所謂公款也公以經久有贏遂授其弟篤庵以官上事篤庵性恢展銳意有爲時田值湧貴不惜重金市之罄官上息入不足償乃議竭諸昆私蓄以助事未竟而篤庵卽世公乃出彌缺失事得無累而諸昆議助之盈絀不校焉由是里黨皆以爲讓平生善不負人人有負者輒置之族戚姻婭之稱貸者不責其償昆弟通財尤奢與而廉其取唯令諸子以舌代耕減食用自給子若孫請之則泫然曰吾不忍彼飢寒而我溫飽也歿之日召家人至榻前出其貸券盈篋曰此數十年積累也吾非欲盡捐之顧念此區區者非力不能償卽意必欲負強責之徒敗和耳何若以忠厚餘地遺汝輩乎今廢矣遂逝得中六十有奇配某氏生子三憲檢文生憲琛廩生憲璠文童

傳曰書曰惟孝友于兄弟詩曰張仲孝友夫孝則未有不友者然自古之稱孝者虞帝而後厥惟閔騫豈其餘盡不孝不友哉安常處順之日雖得親順親一庭和樂無由見其堅苦卓絕之行唯遭際不偶而能委曲將順忍人所不能忍讓人所不能讓潛移默化永保和諧斯百世聞風者乃不禁咨嗟歎羨者也觀修誠公之內行殆亦景慕前徵者與然吾聞曾子養曾皙以養志著美今後裔繁矣有能盡事親道者固又子輿氏家傳哉

劉公六十壽序

渝郡極人才之盛而書院萃焉光緒癸巳以來省郡試揭曉丹帖報捷者院壁爲赤塗人聚而觀之揚而播之稱

羨嘖嘖僉謂院長符九先生之教澤也院長溫仁孝友與予爲莫逆交主院七年課士首重行誼詢之則曰某也誠篤端謹某也英敏特達歲收百數十人心許者亦僅僅焉考之士論不殊異矣辛丑夏予再子役郡城與院長晤院有劉生子清者名淦榮昌茂才嚮所稱誠篤端謹者也其尊人行年六十浼院長錫文爲壽適院長新瘥不能親楮墨事而囑予代贈一言予初不識子清更不詳悉子清之尊人乃子清必欲揚尊人之美以藉重於院長院長必欲遂其弟子顯親之意以委任於予予乃杳然遜謝偏欲以僉鄙固陋自匿則拂院長獎掖後進之意者無以示賢而逆子清承歡膝下之思者尤無以教孝遂不獲以不文辭院長之言曰劉公字某世業耕年十八廢經生學以治生爲務或田而農或市而賈弟昆以數計子姓男女以十計舉家今六十餘口皆仰給於某公而某公經營調護一庭和藹無擾鋤箕帚尺布斗粟之嫌古所稱百忍傳家不是過也又曰某公性質直喜爲人排紛難里閭有忿爭者事無鉅細輒詣某公質之曲直是非往往有官府不能決者得某公一言而解而譽望以隆殆魯連之流亞與又曰某公家中不中賞遇人急難必一引手救貧病老孤不能自存者必竭力周之或募貧鄉鄰以助之雖一粒一絲沾被者靡不感恩去也行潦之詩曰豈弟君子民之攸歸某公有焉院長之言如此近世人心違古諒直慷慨之夫十室罕覩至一堂三世艾蕭同處猶能使琴瑟籩豆歡欣和樂無纖芥違疑此尤士林所欽景者今某公竟能如是其信能如是無溢美與而院長以信弟子者信其尊人予卽以信院長者信其弟子之親院長不濫舉一事子亦不妄贅一詞唯叙其大端可述者質之院長以歸子清使子清沐院長教澤掇巍科膺青

紫雲泥轉盼必更有所以榮親顯親者稱觴祝嘏之文尙非善頌善禱者也

謝母賀孺人六十壽序

謝於萬爲著族光緒戊子以百歲五世同堂請於朝得旨恩錫如例者爲唐太恭人恭人子二孫十曾元孫數十累葉貴顯其福壽世所艷希一傳再傳沾溉遺澤猶有流風淑氣溢於闈闔前以嗣徽音後以篤光慶如賀孺人是猶可頌焉孺人爲前任新繁縣訓導逮三公冢息幼歸銘齋贈君卽唐太恭人孫婦也曩者親承祖姑色笑默識祖姑年齡由六十而七十而齒髮神志無恙逮八十九而百歲而服食起居仍無恙膝下歡騰備極慈闈樂事曾幾何時而孺人亦將見孫婦矣年六十矣優游歲月頤養天和以至曰耄曰悼上躋太恭人之福若壽亦何難操券獲者美哉始基之也明年四月里人將製錦稱慶郵書寓銅囑予爲文裁之今夫壽母之文古無徵考自魯頌令妻壽母遂爲後世坤維濫觴然亦必實德懿行有可以致遐齡膺厚福者斯揚之非虛譽當之無愧色而婦無公事奉親相夫教子外實亦無所成名而三者道屬庸行又或爲之而未易能能之而未易盡能矣盡矣而不據事直書以揚閭休鋪景鏢則司筆之過也孺人生質貞靜女教嫻習于歸伊始見者以爲大家風範當是時朗峯翁秉鐸綏陽姑氏莫宜人奉太恭人居孺人從諸姊後趨事重慈大得兩闈歡幸姑氏病劇嘗藥侍寢弗懈於年迨翁姑相繼違養而哀戚之忱哭踊之節稱情準禮無幾微文飾其間其誠於奉親如此贈君少治舉業篝燈伴讀梁孟相依旣乃經營家政米鹽簿書下逮倉庾園廩贈君悉身親之而孺人實躬佐之用是昆季析

居不二十年而積田逾上士之祿其出者不侈故其入者常贏其源也不竭故其流也有濟人咸謂贈君能濟前烈然非內助得賢不若是之日長炎炎也其勤於相夫如此自古義方之訓主自嚴君而母氏亦與有責孺人誕男四幼諭教長防閑不令一染紈綺習比見嗣君蘭皋策名國子而器局渾厚西漁就選貳縣而才識練達藜青沉潛嚮學今歲已鬢宮發軔其季爲雪潭則又英姿露爽昂昂乎千里之駒也而四子之規模局度異日成就必爲里族寵光卽愛息之適譚適馮適牟者亦率柔嘉淑慎無間人言豈非丸熊畫荻母氏之箴誠有由耶其嚴於教子如此夫此皆庸行之恒耳當世賢媛淑女或亦易能若巨室弱息少處綺羅之鄉長慣婢僕之奉習肆者常忘敬居安者輒昧危求如孺人之恭儉自持事畜無忝不誠難哉不誠難哉至其處姊妹以和撫猶子以慈遇奴僕以寬且厚親族不給者餽之鄰里有急者周之道殫賑之歲歉蠲之其素所行習也人以爲有唐太恭人之風繼此由蓋而毫仍如乃祖姑上壽百歲五世同堂子若孫簪笏顯揚必尤有燕許之筆馬班之作摛藻揚芬爲孺人增益盛美者則觀縷數言又祝頤之嚆矢也

李觀察傳

觀察字光輔一字守中四川資州人也乾隆初高祖某公由閩遷蜀再傳至衡庵公挾計然策起家於資以觀察貴誥贈資政大夫妻藍封二品夫人贈公質性孝友利濟事知無不爲藍亦善承翁姑勤修家政故觀察德器成於生鞠二人者爲多幼敏慧讀書能寓目不忘逮長以誠意正心爲學時人輒老師目之試童子科屢冠其曹不

售同治癸酉乃用國子副鄉貢時座主今鄂督張香濤宮保美其材期以大成誠勿考教習懼小就也顧十赴鄉舉一應京兆試咸不得於有司始以輸餉叙教職光緒六年部選南川教諭甫蒞任謂其副學某曰是豈不足爲政耶月課諸生文藝指畫筆削如塾師誘弟子者然先達佩之請業生日益衆寒困者悉傾之膏由是南人益勵學節孝請旌例爲儒學專政南俗報舉貞烈歲不什一因開諭諸生勤采訪發幽潛不責一贊一謁而禮書積弊有割執照剗名氏匿眞冒贗詐取人財者力白縣官釐剔而廓清之由是南人益重節南向少義塚疫癘饑凍死者道相屬甚或委溝壑間乃捐俸置地歲瘞常數十人更市屋收息爲醮掃付邑士劉人龍經其事今自南川來者僉曰而塚壘纍焉六百有幾矣是歲饑捐賞佐賑且臘抄出粟繼人以爲常副學某故旅櫬不能歸乃要縣侯隆賻爲倡募致千金以行而觀察亦隨丁外艱去矣去之日邦人士思其遺愛爭奉德教牌匾紀詩歌寵行衣冠填咽祖餞於十里郭外張大令顧同官曰此廣文異數也我輩當勉爲之後權安居訓導其課諸生卹節孝捐米濟臘一如任南川時而倡興宣講刊送警世諸書捐增育嬰永額添置銅梁武廟祭器又南川時所未及者諸生某妄遭橫逆因廉其主者引使服罪某汎與某紳齟齬控縣具杯酒解之兩相愧服安居人至今稱述猶有頌歎弗諼者資州固中文物邦也士風民俗往往爲仁井諸邑冠而培植藝林猶或畜焉觀察在籍時嘗請加肉釐爲賓興書院費議建藝風書院一仿會垣尊經法創鴻文書院延通曉時務者主之廣置籍典講求輿地兵賦算學補修孔廟奎閣諸有關文教者皆毅然任之戊戌本州大水境民舍田屋無算奉母夫人命爲贈公捐白金千

兩賑之得旨建坊給匾如例業師陳某身後無立錫地復出多金倡募同學錢數十萬卹其家家賴以活其戊子賑災已亥修城暨歲費臘米善書棉衣藥餌又皆輸錢百千或數十千各有差而乞貸之邀免者不與焉壁山張甫之久貸無償往責其負適張閱牆釁起母亦病危乃爲平其家難痊其母疾反其所稍償百金者而歸人以爲難謂馮驩之市義不足多也里人旣以端人相推重故歷任牧此邦者公事皆諮訪之而賓興三費諸局築城濬濠練團諸要政且委畀總董焉余棟臣之變榮永諸邑騷動而資中守備獨完有恃無恐者觀察防衛之力也嘗修南湍族譜助建李氏宗祠四合會祠頗爲族人欽戴事母夫人以孝處昆弟無間言從子有危獄力辨解之卒得白丈夫子五長炎筮仕雲南其四猶爲士不令廢學母夫人有疾羣醫束手獨以虔心冥悟誠求方藥不刲股而輒瘞後試屢驗遂爲恒法歲大旱祈雨有應舊治蔗漿業遭戊戌水漿蔗十萬淹爲泥旣潮落煎復如故見者嘖嘖羣相歸奇於神佑也某歲被盜賊賊獲聞牧伯某用法嚴生埋賊首一人遂哀而釋之某婦不得於姑數求死以溫言兩解其結後婦語人曰李副榜活我不然鬼矣某欲爲納粟吏貸之族允而失諾於是出重金爲導某事遂諧其宅心制事類如此居平謙謹和易而胸次洒落所至名區勝蹟遊歷必遍家有養雲樓讀書臺崇善閣皆十年間手築者旣祀先亦怡情也養雲樓祀其先人像自著易書詩集語一卷唐宋詩迴文一卷綠窗小草一卷駢文學步一卷清吟齋聽詩鈔各一卷琴書自適將高臥不復出辛丑某月以助餉功晉職監司賞戴孔雀翎乃勉分湖北試用行有日矣囑予次其往事爲之傳資省覽焉

傳曰孟子美樂正曰其爲人也好善善固優於爲政者哉以祥和溫惠之躬化凌競薄澆之習勝殘去殺於今世尤汲汲者惜乎不數常觀也觀察希蹤賢聖恕人責己見善常若不及權安居日與余歡若平生竊爲作崇善閣記知其能獨善能兼善者天下禍變極矣救焚拯溺惟志士仁人是賴豈善政真無如何哉觀察試政鄂垣吾知其必有濟也往見刊送善書先後不下萬本與人論說動引先正格言爲勸其天性然耶抑欲出其唾餘胥一世惡人格心嚮化者耶

從伯父熙亭夫子墓誌銘

從伯父熙亭夫子既歿葬之三十年其子煥銘以同知銜請封一代贈公奉直大夫錫之誥命焚黃既歲煥銘馳書告章曰吾先人創業艱難以有今日吾兄弟不肖不獲躬遂顯揚俾之歿世吾茲恫焉謬竊虛美增光泉臺終不敢忘其遺行請爲銘誌之謹按公諱忻字熙亭我曾祖府君廩生贈文林郎入忠義孝弟祠諱宗珩字滄海公第七孫邑增生篤齋公第四子生而宏厚篤齋公棄養公甫受書季父吉人公愛育之授室成宅視猶已出年二十八以古學補博士弟子試優等超擢增廣生員鄉荐不得志鬱鬱爲童子師逾數年食指日增仲兄健菴公歿其孤孀皆依以爨公曰是吾責也願脩脯不繼奈何乃罷講携從子煥然經計然業易君介眉者公伯兄夫妻也誠實敦謹聞公貿罄貲與合易司出納公持筭算歷年二十以木綿蔗膏盡川湖之利稱富有焉其入出規制確有式程往往爲閩閩中師法人謂劉晏之權鹽鐵不是過也初公之入賈也欲以煥然爲肱助會煥然物故獨任

艱辛再撫煥然之弟煥奎習兄事而煥奎不祿舉家嗷嗷待養於公公衣食之如曩昔及賈務大獲復柝其所有與之制產立室厚事畜長子孫至於今不匱其奉事吉人公之禮亦因厚撫煥然兄弟而彌念當日之所以受恩故終其事無稍缺蓋孝友家法稟承然也公天性和易平生無急言邊色與人酬酢訥訥然若不出口而淵懷洞達人自不欺從父昆弟二十有四盛德大度以公推首所謂長者非與少困乏不乞憐於人試省時同考生較錙銖者輒笑置之熙臺朱先生嘗語人曰杜某非長貧者後果然以同治五年正月九日卒享壽五十九歲越某月卜葬此山今木拱矣配陶宜人生子三煥庚煥權煥銘皆國子生女三長適太學何良成次適俊士劉高騫次適茂才程鎮孫六翰穆翰鼎翰鐘翰尊翰焜翰焜曾孫子七嗣康嗣堯嗣敦嗣鄴嗣錦嗣鑫銘曰

皇祖孝友祀位於夔續前導後匪公伊誰公有於叔姪撫於公受一施倍心同理同舉世驚慕公緘其口盛大有容陋彼胥斗少甘藜藿老膺厚實神天佑善百鮮一失手創龐業叔子繼之捷徑揚光泉壤麗之有山峩峩有水澹澹蕃林蔚草鞏茲佳城

本宗祠堂記

君子將營宮室宗廟爲先我始祖以楚襄進士官明四川叙州牧例得立廟時張李亂蜀僑居於萬弗果國朝定鼎本宗代有僑人唯無筮仕顯達者及八世養祖始以選貢宰安東後卒於位而廟仍闕如其在籍不仕者咸有志未之逮也九世愷公既歿妣氏朱初建支祠欲致諸公有慮其卑狹者更度高原一區適爲愷公嗣子分土半

捐以入於是二百年敬宗收族之謀及茲定矣宗人以公費微薄竭力集貲構正宇三楹面以廳舍環以左右廊室清厨附之墼基半畝平其前林木數弓蔭其後觀者以爲不奢不陋貞固之業也是役也族之人咸有力焉經始於光緒辛巳越乙酉落成既伐石將丹書其緣起而章適之任銅梁庚子假歸族人迫責前議迺敬告有衆曰是吾家所以妥先靈者殤與無後於是焉禘其世恪守勿失毋或如天水氏售之他姓不顧先人血食也祀田所入僅供祭享嗣得儲蓄舉應爲者擴充之毋或如南蔣氏據倉奪粟變甫田之什爲鼠牙之章也春秋有事羣昭羣穆偕來毋或如太原氏虛其位闕其无人也吾族漸趨式微儻得賢明者維持而經紀之歲有修時有荐祀有規則以勿墜我前人休方今時事日非海波橫溢伏榛滿地彼高臺峻宇畫棟雕甍目艷耳熱之區幾何不據爲巢窟毀於兵燹而此數椽者湫隘堅樸非戎馬所必爭幸相保至百年不淪於邱墟禾黍則世守宗祊者尤望其大啟爾宇也襄陽其復興乎

歐陽佩玉都戎六秩雙壽序

歐陽氏自漢和伯生受尙書於伏生世遂有尙書歐陽學而渤海氏族亦由茲藉盛堅石迪以才藻擅於晉信本詢以書法名於唐永叔以文章顯於宋玄功以製作美於元其他爛吏治廉通經術欽精古樂鐘律發亦指不勝屈然皆博學文雅究鮮以武功煊赫當時者豈武臣難得與抑武臣而有文事者爲難得也若吾所聞佩玉孝廉名標武籍心馳文苑則幾幾乎道學儒林接先代之餘韻流風而未有艾焉夫以今時勢多艱文浩煩矣文風靡

矣文人益頽廢而不能振作矣而朝廷求將帥才且不惜整軍經武水增戰艦陸置防營建學訓兵以備南北緩急之用講求輜略者及是時而效用之佩虎符建龍旗電掣雷轟削平大難豈不安定國家揚聲中外什佰千萬於章甫逢掖者乎而君願以甲科報罷歸卽閉戶讀書口不談戎馬情不歿仕進優游林下日與經生學子相契悅田夫野老相居游一若置天下事於不聞者蓋其志趣高而其識慮尤深且遠也初君之習制舉業也第年兀兀輒高自期許欲以文學出身試童子前茅不售始易文就武以府試第一人入庠隨陟癸酉武科鄉舉族里榮之居泊然曰非吾志也既會試見阨乃徜徉於山水之間圖書之府時太恭人夏在堂年八十餘矣君偕昆季五人昕夕承歡睦睦雍雍共叙庭闈樂事書曰惟孝友于兄弟此之謂與平生強直果毅遇事敢爲雖燕居鄉舍而諸有益於桑梓有害於里閭者罔不倡率而力任之如議衙規設宣講置義學修錫山忠義寨卽其事也前侯桂丁諸公委以公局畀以重任豈無見哉君有姑氏適賀姊氏適唐者家皆中落皆爲養之葬之其後嗣猶飲食而教誨之殆天性友愛然也而亦得力於內助者爲多德配羅恭人性行淑婉能佐君分理家政家遂益饒而奉姑以孝教子孫有法尤宗族鄉黨所稱道者宜其舉案齊眉與君子同賡偕老也余於君未一識面太學羅季良重爲之請乃不爲祝嘏諛詞特就君投戈講藝之意上溯世閔淵源以見君之讀書好學者其來有自而先代遺澤與閭闈善氣無一非壽人壽世之徵也猗與懿哉

朱孺人墓誌銘

太宜人氏朱邑孝廉方正乙卯副貢部選某省某州判仁宇公女孝謹貞明罔乖諭教年十七歸煥南杜公公字棠村詩書族也其大父養雲公以選貢宰安東有政績考覲廷公廩膳於郡郡人欽其學累世清德家範肅焉棠村公亦郡膳員才名傾鄉里歿之日不逮顏子歲者四齡有奇太宜人上奉孀姑下撫遺孤翰藩受其伯父成軒讀而以內教育自任少長訖壯眠食不去懷者垂四十年中間亂離移徙聚散哀樂之故靡有甯息嗚呼悴矣初太宜人奉姑也與嫂氏協衷承順堂闈內外宴如秩如雍睦之風逮今未墜里人敬歎相與聞於朝受旌如例時翰藩已由選拔用教習知縣矣太宜人艱其遠行始改選溫江教諭嗣舉於鄉秩滿仍保宰職指發江西試用噫誰之蔭與世成言節孝子孫必大其信然也朝廷以翰藩貴封母太宜人誥命如其夫品福蔭日隆景命忽傾以光緒二十八年十二月卒於里第得壽六十有四生子一孫二嗣宗嗣伊女一適學員程心德既卒之明年葬於茅山大麓依先塋而墓焉銘曰禮稱共牢詩詠同穴夫婦之別夫壙東合姑塋北迤文梓蟠曲連根結體煌煌天誥載光泉臺閣門恩寵風雲爲開相彼茅山天然屏障一脈五絡回環拱向福者居之龜筮協吉逆龍撼龍術家枉密河嶽靈秀降神則祥固基昌後奕葉允臧

王宜人墓誌銘

宜人氏王邑太學生正相公第三女年二十歸覲廷公諱愉府學膳員以子煥章貴誥贈奉政大夫王贈宜人宜人幼貞慧解字書妙達儒先義理適杜時翁養雲公諱禮宦歿江蘇江甯知縣任宜人奉孀姑無違姑愛重之贈

公詩禮族倡隨伊始賓敬有加而宜人事之惟謹道光乙巳贈公卒宜人鞠遺孤煥章煥南俱稚齒嗣入庠食餼均以城防功保六品藍翎訓導職母教然也南早歿未仕章現教諭銅梁南之子翰藩由拔貢舉人任溫江教諭議分江西試用知縣章子翰聲冠而卒其次翰燦爲邑弟子員藩子嗣宗嗣伊燦子嗣崧嗣衡衡年最幼出繼於聲自燦以下皆宜人歿後生鞠者宜人以同治七年卽世八年來葬茲土閱三十二年而墓治非敢延也蓋有待也銘曰

茅茄之山旁出靈脈五桐爲坪鳳阿龍宅分風劃水慈雲來格巍然一宮丸丸松柏不震不奔鞏十固百瑞蘊黃琮祥發丹珀葛子猷孫視此先澤

奉政府君墓表

先考府君歿葬於大周里四甲之五桐坪距今五十有九年小子章時方九歲弟南七歲兄房弟瑤弟琨相繼殤殞追惟先德童帽在昔惟憶府君易簣時與章母永訣曰吾與君賓敬十餘年所期遠大竟阨於科舉目不瞑焉吾極知君能兼師若父今以諸子累君俾盡吾志徐又曰今日吉否衆曰吉乃呼有偏者三俗語謂暫別爲有偏遂逝時道光乙巳正月十三日也享年三十有二嗚呼此豈無來歷者耶胡閱世未久而倏返太虛也章用是泣識之不敢忘而奉母教因益謹後與南捷學政試從祖父吉人公曰汝兄弟幸繼父志尤當繼其遠者大者使汝父尙在吾門光矣熙臺朱先生曰汝兄弟頗肖汝父然學養之純德器之粹規模之宏闊尙不逮遠甚夫府君歿

世有年猶見重於族尊鄉先正如此雖文章經濟未播人間而揣其志行必有足大宗坊式里閭者值後世德薄無由祈天永命而弟南中道捐俎章復遲暮無成不克褒大顯揚以遂前人未遂之志能勿恫乎府君諱愉字觀廷夔州府學廩膳生姓系出曾坪杜氏爲王考拔貢任江蘇安東知縣諱禮公第四子大王考廩生贈文林郎諱宗珙公第十四孫王妣王孺人以嘉慶甲戌五月誕府君於城南老宅同父兄廩生諱恂同母兄監生諱慎弟教職諱擇皆有名當世者光緒乙亥章由廩生保六品藍翎訓導選授銅梁教諭屢蒙覃恩加級贈府君承德郎晉贈奉政大夫妣氏王贈安人晉贈宜人去年庚子恩正併科章始中式舉人南則不遐其壽僅以郡廩生保六品藍翎教職終南子翰藩拔貢任溫江教諭嗣中舉人保知縣章子翰聲冠而卒次翰嫺縣學生員孫四嗣宗嗣伊藩出嗣崧嗣衡標出聲無子以衡後之於是表於其阡既安先魄且令世世子孫歲時醮祭無忘繼述之思也

奉政棠村君墓誌銘

君諱煥南字棠村姓杜氏府學廩膳生員考諱愉廩生贈奉政大夫王考諱禮拔貢任江蘇安東知縣王妣氏王封孺人妣氏王贈宜人妣氏生子五考歿後存者唯吾與君怡怡切切二十餘年無間顧君性沉毅自許殊高時劉君家謨與余兄弟爲洽友會文講藝才名艷一時而君尤發憤經世之學其視科舉業蔑如也既兩荐不售乃益鑽研墳典泛濫諸子百氏廢寢忘餐而精力由是憊矣甲子八月病於成都試畢亡血萬君靜軒痊之至明年疾作羅丈樹生來君與訣曰吾學不遂志年不遂學造物者太欺人也以同治四年三月卒於城西王氏之宅年

二十有八視先考歿時猶不及四歲傷已君生無過行夙願所期巨晚不克遽副而著述削損復無鴻箋鉅注冀經傳爲傳人所遺假齋文詩存各二卷頗爲當代作者所許然自謂緒餘不足罄蘊蓄而大設施其遺憾豈有窮耶君誕於道光戊戌遲余擢揆二歲旣歿逾月母命葬君五桐坪距先考墓東百步而近配朱氏生子翰蕃由拔貢教習知縣改選溫江教諭癸巳中式舉人秩滿保分江西知縣始請於朝得旨贈君奉政大夫朱氏封太宜人誥下而朱歿矣六月葬於君墓西偏女一適縣學生員程心德孫二嗣宗嗣伊銘曰

君之才可以斗石量君之學不可程塗方天若假之年算山則岱而海則滄吾與君倚慈闈爲教養情之翕亦世謂無兩生聚僅二十八年一人間乃一天上其來也芒乎何因其去也芴乎何果抑歷劫而泡影塵寰耶叩諸佛佛不證我賀君夢弟爲蕘山城隍慰言何解於神傷伐石以銘幽隱尙翼子貽孫其壽昌

彭安人墓誌銘

先考覲廷府君墓之北先妣王宜人墓之西彭安人墓在焉此吾同室三十五年琴瑟友也彭之先來自西江嘉慶初卜宅於萬再傳至太學維觀公儒法範家聯姻者遂多世族君爲維觀公次女以道光辛丑設悅同治乙丑來歸予生子翰聲授室一年卒次翰燦爲縣學生員次翰煊則十六歲殤矣女二長適府學生謝樹藩次適臈錄縣主簿謝樹椿孫二嗣崧嗣衡衡燦出以後聲者方君之入門也安間柔順謹事寡言姑姊妹嘖嘖贊之吾母氏尤欣慰而愛憐之於弟姊能睦以讓其於吾則敬戒勿違兩言盡矣吾賦性平易而內實躁急遇君輒易怒難悅

君獨坦然受至飲泣不辨一語吾方謂夫道宜然繼乃覺其器局褊狹尙在君淵量涵容中也結縵以來與吾共事老母者四年育子女躬井臼者十八年隨任銅梁學署者十三年此十三年中往來銅萬者凡八前後病劇者凡三一以吾應順天試有訛言其死者而胆傷一以哭長子翰聲再哭季子翰煊而肝傷積慟累鬱久而百脈俱病此衰老銷殫所以頻危不治也戊戌十月君送季女子歸吾亦踵至明年返銅則依依不忍別至十月遂不起享年五十有九又明年吾始哭君於水竹故宅而音容渺矣六月視窆五桐坪命兒標治其墓以吾官六品銜銅梁教諭例得勅封因題曰杜母彭安人墓別系以銘

井之甘者易竭花之名者易折人誰不死獨悲君先我而形滅烈士所重者名淑女所望者夫死亦何常獨憐君未覩吾賢書吾愁君病君傷吾離垂死不及握訣薄宦之悔何窮期君不殮於銅而傷於萬吉人邱首天所眷此地有姑娣堪依君冢兒亦及泉相見吾與君何時重逢修德樂善以待其終爾毋我念兮我母爾恫受享百世兮綿綿斯宮

賴劍亭先生讀史贅言序

三代以後世所稱英君毅辟者動曰秦皇漢武卽近今泰西人之言亦謂中國英雄如彼中華盛頓拿破崙之比者惟二君足當之然其絮短較長勿過曰芟夷羣雄威服海甸已耳而於二君精神之所注未盡窺測此何足罄英雄之本量哉人生宇宙如白駒過隙卽使貴爲天子富有四海亦轉瞬間事不能免彼輪迴長保位祿以極人

生之願欲閱陵谷之變遷唯長生不死可以縱心六合游神八表盡吾生權力之所能爲御風乘電以求乎天文
運行地球旋轉人物窮變十二萬年元會之所以然而後爲英雄充類至義之盡此固非仙人不能也夫二君聰
明才智豈不知仙人之荒誕無實哉然竭誠以求破格以招伴或一遇如黃帝之晤廣成周穆之見西王母則吾
願可償卽虛懸無薄而使海內學神仙者皆知人主意向所在必有竭方盡技獻不死之藥以增益年算者故其
冀倖之心至沙邱東萊而弗已後世視之謂之愚當局思之則智矣雖然以二君之智不惜爵賞以延方士猶歎
罔牽延無一得亦可知天下無真神仙人人生無永不死者千百年後新奇幻化之局乾坤尙秘密不宣豈能分一
人騰九天躍九淵目擊而身親之者耶而後世帝王尙尤而效之耳不得於仙變而求佛求之不已則捨其身捨
之不已則賣之爲奴此更愚之愚者而前仆後起卒無一悟則又秦皇漢武作之俑也劍亭先生於讀史之餘區
別邪正識二氏之荒渺憐舉世之瞶矇特綜往代得失之故著爲一編以謂求仙佞佛不惟有國者可鑒前車卽
有身有家者亦勿蹈覆轍署曰讀史贅言所謂言者無罪聞者足戒也方今世連陵夷僧道足跡遍天下嗣君康
平懼其誘惑流俗將梓是書以覺愚頑械來問序余未獲親先正儀型而鄉里所誦說蓋亦崇正黜邪爲吾道干
城者讀其書可想見其爲人矣

方和齋

旭

郡伯五秩晉四壽序

代夔屬六縣寅僚作

闕逢執徐之歲陽月十日盛德在水律中應鐘葭管溫聲將回寒谷恭逢我皇太后七旬萬壽衣冠萬國瞻覲天

顏蜀雖僻處西藩上自官守下遞編氓亦莫不鼓舞欣望闕稱慶而祝嘏前一日則我府憲方公攬揆令辰焉郡人熙熙和聲諧頌謂壽宇宏開尤有揚仁先導者矣民氣旣樂同我太平躋堂介祉兕觥載稱公辭弗獲勉順輿情於是寅僚濟濟製帳詞而祝陳之公爲桐城華胄由拔科筮仕來川歷官蓬州梁山達縣華陽等州縣通判成都首府充庚子辛丑恩正併科鄉試同考官皆有政績可稱道十年之間上諭傳旨嘉獎者三督憲奏保循良者四賢聲播蜀不殫述矣獨念時勢孔殷之日朝廷屢念於上內外臣工振作於下竭慮圖強皇皇焉以興學育才爲急而書院積習未盡除中小學堂得人猶有限欲整齊而畫一之勢非造始蒙蒙廣置教習必不能人皆嚮學國盡知書以爲自強基礎而川省要政其專力於蒙學堂者此議則自公發之條書朝上憲檄夕行亦謂開化改良有汲汲不可終日者初公之赴日本考察學務也他端未遑獨於蒙學措意知彼國之返弱爲強者實肇於此乃著州縣學校謀始八篇其文純潔精審卓然桐城家法間嘗三復讀之曰總論論教育之責非州縣莫屬也曰主義識明宗旨不貳不雜胥國民而教育之此進化之基也曰教員師範不由學習卽課程不能一致設專所比而同之斯爲齊民要術也曰明緩急急於舉事而緩於奏功四年六年之明效亦不一瞬卽至也其曰非小惠者明學生自費斯教員可增而所惠大也曰學會者爲經久計勞之一日而永之百年也曰料民者欲使民無遺學必使戶無遺民教育之善釋此莫備至答難一篇則徵聞考見苦心苦口現宰官身以說法今日社會之書蒙學之報有如此深切著明者乎然而公懷猶虛也有曰直諒之友與吾衝突者焉有曰操經濟之長者更有嘉謨

碩畫以告我者焉蒞變之日卽召各屬官紳商榷學務贊一詞者俯而從之獻一策者延而見之勤懇懇博采周諮是益見用心之密矣夫夔屬蜀東極邊民情樸陋相沿在昔說禮樂敦詩書者士林而已而語以時務強半漠然市井草莽之屬無所謂學尤無所謂教非困也無開其德育者也非愚也柔也無作其智育體育者也今則稍具知覺矣知蒙學生非出洋者矣知蒙學堂爲萬衆謀生者矣強而迫焉漸而摩焉殆亦聞郡伯之風眠者思起窮者思變耶則謀始八篇之有造於國民匪鮮也他日者薪薪蒸蒸學校如林無士農工商兵悉武悉文以育我後生由孝而成而全川國民推訖至廿二行省遍爲完格人公所謂二十年後初學童子悉成壯丁有忠夔愛國之志無廢時失業之心各固完宇同衛神京時則光華復旦母后九旬我公亦七秩有四大猷允升看方叔元老翊贊我嗣皇之中興

鍾受白明府迴天集覽叙

陰霾四塞鬼域雜居天地晦冥之交忽焉陽光普被而盲者明睡者醒病者欠伸萬象昭然而澄清則日之靈也赤地千里江河涸竭草木焚枯之際倏焉滂沱及時而黃者青萎者生達者勾萌百物向榮而欣欣則雨之神也中朝以農立國稼穡爲寶望日者五之一而待雨者常四之三蜀雖夙號漏天特詩人過情之語實則地處溫帶土薄水淺亢陽易逢近且有三歲不稔一災數十州縣者何天膏之恪耶夫雨出於雲雲生於氣細縕者不可見見其山川之磅礴鬱結觸爲油然沛然已耳然而人力不能致之當盛夏苗稿往往灌畦抱甕望斷乎雲霓而無

如何而蛟洪猝發之區偏能突起雲雷陡翻濤浪踪跡所至驟雨橫飛無雲氣之細縕無山川之鬱結怒號而來震撼而去此又不可思議之尤者也聖人疆理天下民事攸關靡不竭力經營獨至雨暘不時則拮据乏術第曰恐懼修省而已六事七事自責而已曾不能立一法創一制通山澤之氣變陰陽之化有可以人力回天者蓋祈禱外更無餘事矣且祈禱亦奚足恃哉古者雩祭之典習盛樂舞皇舞其禮綦重皆緣祈禱而設後世有司治邑亦復廣求雩法博參術數以爲民請命然或行之而效或有效有不效豈祈禱者盡不誠與抑由乞靈於天人事無權遂在可知不可知之數也受白鍾侯治銅之明年政通人和刑清訟理其時春澤愆期夏陽驕亢侯集寅僚士紳祈雨黔南宮設先天九宮諸壇親書旌瓶卦位拜演如儀鼓鐘越宿甘霖沛焉於是邑人忭舞舉侯所布列者行之屢驗遂爲常法侯猶慮推暨之弗廣也乃益考雩祭源流及紀慎齋先生壇式編爲二冊題曰迴天集覽卷後附以王槩雩說取重文實二義思深哉思深哉盥誦一過清風徐來讀其書知其政矣世有關心民瘼者得是集而遍傳之設值偏災有求咸應庶寸楮而膏澤天下也夫

三節母傳

夫三節母者吾再從伯母氏文暨其媳氏劉氏陳氏也文母爲健菴公繼室健菴公諱恒卽德周公第二子其前室王早卒遺子煥然文母入門時猶稚齒母撫之逾常兒後己子煥奎生而其愛仍未割也旣鞠煥然成人復爲娶婦於劉生子翰鴻煥奎亦受昏陳氏誕翰鵬焉凡此皆文母佐健菴公時事迨健菴公歿而母孀矣而煥然又

不祿奎且繼之於是劉陳二媳亦梵梵相弔也當是時家無斗儲室同壁立嗷嗷數口惟恃夫弟熙亭公同居共爨形聚影隨而姑媳茹苦含辛紡織餘生相依爲命翰鵬又不幸早死所賴以延一線之遺者唯翰鴻一人一門三媳兩世孤男門祚之衰薄亦族人所見而神愴者矣夫朝廷旌卹之典殉難臣民外必以節孝首推節則取一日之義而抱終身之憂孝則離己之父母而代夫事其父母彼衣租食稅者安常處順尙難爲懷矧寒素之家米鹽炊爨朝不慮夕復以弱媳孤孫渾眸相對月長日引情境奚堪雖晚節留香而數十年之耐凍忍飢至餓死而不悔者尤爲人所難爲者也吾族故多貞孝而窮獨艱窘三孺人乃萃於一廬嗚呼苦已文母生於嘉慶辛未子一煥奎劉生道光乙酉子一翰鴻陳後劉九年生其子翰鵬不壽以翰鴻次子嗣徽繼之鴻長子則嗣襄也嗣襄以積學入國子子四培元培忠培瑩培瑞皆文劉孺人歿後生者三孺人早歲阨窮至晚年乃稍贍給以光緒中先後請旌得旨如例亦足榮矣人咸言節孝之後必大以三孺人卜之其熾昌或未艾與

代本府福芝泉郡伯 潤 致屬縣諸令書

某兄執事分符以來循聲屢遞徒以河山間阻不獲與高賢時集東閣共議新猷離索之思能無悵歎乃者馬禮臣牧伯奉檄來嘉查中學堂規模宏闊尙不齒冷惟述提學使之意以爲通省中學堂皆已告訖而吾嘉獨否本年新章各學堂年終報部係由提學堉逕達設以嘉府置諸夏五郭公豈非史有闕文耶牧伯謂本年卽不開學必須開堂堂開則學生今冬收考明春入學次第舉行桑榆非晚弟思工程不急堂於何開而修費不齊工於何

急各縣前後繳到者今已餅罄此際加工加料尤是無米增炊仰屋興嗟不能不冀將伯之助也前委紳屢次函催既無影響弟處再行公牘仍付浮沈本欲委員守提以應急需復念執事審察物力體卹民艱同有保赤誠求之心何忍相煎太急之舉第以修費一日不至則中學堂一日不成而高小學程度已足之學生所望於中學堂之進取者甚急卽程度未足之學生其觀感於中學堂之收入者亦甚奢此時不一鼓作氣剋日觀成不惟辜提學責望寅僚之思並難激學生鼓舞奮發之志雖曰領郡者之咎實亦親民者之責也明知催科歛怨賢者不爲而強迫教育今日已成騎虎所謂知其不可而爲之者當亦諸君子所共諒卽七邑士紳所曲原者也是披誠奉瀆無論如何艱窘總期設法籌措源源而來不使將成之功虧於一篑則士林受賜多矣設經費不濟倉卒停工上下交訐之日能置身事外乎是在持衡者之維持調劑而已現擬九月完工十月開堂冬月招考學生并師範生敢請迅速解款於八九月內掃數完納一面延訪本邑士紳品學優長器識安定無嗜好堪充教員者正副各一人無則不强才謙開通性情和易無嗜好可任學堂監學庶務學局收支調查者正副各一二人無亦不强皆定於十月內申送名冊以備採擇至縣中甄別學生凡官立公立私立高小學堂之秀出者皆得與考試由各該學堂校長擇尤報縣於九月內由縣示期考錄大縣八十名中縣五十名並考師範生大縣二十名中縣十二名一律送府考取入堂肄業不日當有告示發下使七邑聞風興起爭自濯磨訓賢有司之樹功於學堂不少也久忘形迹敢布腹心唯執事察納

羅母雷太宜人七十壽序

隄爲於漢置郡國朝改縣屬之嘉因明制也井研亦隄爲郡武陽縣地今隸資州與隄爲今縣毗連疆域雖殊分野皆鶉首之次井有山曰執笏隄有山曰誥軸居其地者多毓科名仕宦而井之泥溪河流輸入岷江直達隄爲東境風水所銜接流動充滿迥彼區之靈秀注於此區苟承其氣尤細縕和合積之愈厚而發之愈光特非累善行仁之家亦不能河連嶽絡假乾坤之清淑以孕生六子蓋人傑而地始靈非偶然焉若羅母雷太宜人固井研之清淑而隄爲之賢媛也嗣君印符孝廉奉府檄構中學堂與余昕夕從事其才能思辨洵足擔任時艱而奮發卓犖之姿獨以爲受成於母教日者手一編請曰今冬陽月母年七十有四里人將製錦爲祝責事略於綬香綬香謏劣不敢自貢諛詞惟念母系出雷氏井研巨族也陳胡族以貴富勝雷族則詩禮翹之高祖暢公由選貢陳臬豫粵曾祖神霄公以詞臣直翰院而編修任臺灣道者爲其從大父舉人司教屏山者爲其從父拔萃作宰宿松者爲其從兄名門貴息兼能讀書識大義人旣嘖嘖艷之而母無驕色于歸之日吾前人以齏商起家兩世單丁歲罄所贏餘爲施濟故衣金食玉不減達官貴人而母無奢志葛覃卷耳之吟皆重堂翁姑所私譽於親族者唯先生序之母之事大王父母及王父也綬香初不甚悉惟時聞王母周宜人曰大王父母每謂吾母爲淑女王父每謂吾母爲孝婦則愛憐可知於吾父尤相敬如賓以其兀兀窮年也嘗勸奮取巍科冀得與婦翁家抗倏藍逆播亂鹽販衰微後復提歸官連齏戶失業幾下同窶人子吾父祖賚志以歿數十年樂善好施之行甲於一邑

者遂難爲繼而吾母上奉衰姑承歡靡懈苟姑氏所欲利濟雖財力未逮亦脫簪珥弗惜焉豆區釜鍾之數又王母所時時道念者唯先生序之先君子棄養之年遺三子二女皆母氏教養成立紹香組香幼時母常於枕上授毛詩且誦且解且間說古今忠孝事及元宰之少習以款動其心不合者隨事箴誡卽出就外傳亦日稽其功課不使卽於遊惰荒嬉而後已是以組香舉於鄉而母愈以勵綬香綬香舉於鄉而母益以督組香謂男子志期遠大勿僅以兩賢書自足也課男孫則有學堂教育課女孫則有家庭教育一門之內肅肅雍雍敬姜勞逸之論又家人所身率而心服者唯先生序之余曰唯唯此卽所以序太宜人也太宜人唯處富貴不矜故能歷豐嗇如一日唯孝事重堂而繼述其善行故世業復興唯教子有義方寓嚴於慈故能使二子成名以顯揚其父祖是二子之名由賢母成之母氏之賢實由詩禮之裔積善之家得之庸詎謂芝草無根醴泉無源耶太宜人以季子貴誥封五品幃服他日兩孝廉顯榮褒大五世同堂尤有增千祿而益百福者則執笏誥軸兩山之靈秀又將蒼萃一門以峻發其聲光三多九如之文尙未足導揚盛美也

新建嘉定府中學堂記

長白福公守嘉郡之三年治化醇美民氣和樂時朝廷銳行新政舉一切機要咸整新之而於學校爲尤急公乃進七邑士紳而訓之曰學校者所以造人材人材者所以濟時艱國家多難之日非與學育俊實不足靜內憂而捍外侮郡治爲省縣樞紐嘉適當南蜀之衝岷嶽靈秀所發攄亦旣代有達人今大學盛於上小學繁於下而中

學不與則人材無由進益令聰穎特達之士徒抱質以遊於一鄉一邑不亦憾乎於是謀度堂基因試院舊址而新之試院者故上南道巡治所也嘉慶初移駐雅州遂易爲院今建學堂其中自前楣迄後宇東西屋合四重禮堂講舍房室暨游息操場咸備外繚百丈磚垣宏矣經始於丙午三月至十月公移守潼州山左王公踵其事閱三月而落成計室屋百有餘間積工數萬費材各數十萬金萬數千皆七邑學局紳董踴躍輸入者是役也舉人羅綬香綜其繁拔貢張昭元員職古鑑明楊秉衡張光耀尹自辛暨故紳藍永雙唐漢贊其備而皆稟承公命以要其成使入是堂者知官紳之勞怨不辭疾苦不避俱爲吾黨育人材則當爭自濯磨以勉副郡伯望也七邑籌費者爲樂山李侯周侯健爲李侯榮縣陳侯威遠善侯夾江熊侯裁眉蕭侯洪雅趙侯章與牛華鹽場潘使樂山典獄毛尉亦副役於工程所例得備書

賈徵君墓誌銘

徵君姓賈氏諱步緯字心九江蘇南滙人也博聞強記少與張文虎齊名惟不嗜科舉學從友人顧金圃借讀數學天算書獨有秘獲咸豐間京畿弗靖欽天監憲書闕文徵君時僑滬上造歷問世南省人奇貨購之海內數理名家以滬上爲會萃而海甯李善蘭尤博偉烈亞力者英儒中魁碩也聞李名聘譯西書餉中國總校之席徵君與焉於是中國始知泰西格致製造之學時曾文正公督兩江創上海製造局延徵君教習航海測量館同光以來蓋三十年於茲著述數十種大要皆天文家言李文忠公識其學聘以天算測三省黃河繪圖進御直鄂兩帥

復保經濟特科均辭不赴里人賢之夫以朝廷破格用人之際奇技異能者皆各挾其所長以唾手人間富若貴而徵君名實尤爲當道所延賞乃或聘之而不就或就之而不受職求之近今蓋亦難矣豈非獨抱絕學高尚其志者與以光緒丙午卒於里第年七十有八子文浩繼天算學文聚精理化學皆有名當世者銘曰地球而上測天星布衣而名重公卿著數十萬言等其身後有作者此傳人

則梅山房叢書叙

天算之學略見於漢書律歷天文等志語焉弗詳肆其業者遂亦弗精西人龍華氏以推步顯明都中國始知有西學然猶以術數薄之也且其學亦無傳書行世誠秘密哉國朝天文家言以數理精蘊歷象考成爲最著次則梅氏叢書實無所謂西法咸豐朝英儒偉列亞力來滬思以西學餉中人檢其談天重學等著開館譯書延海甯李君善蘭尸其役李門人賈君心九任校勘焉賈君與張文虎齊名舊嫻天學宗仰梅氏書者也因名其室曰則梅校書役久用得探西學之精蘊而益增疇昔中學之所未逮曾文正公督兩江創製上海製造局以賈君教習航海測量館李文忠公籌黃河測圖進御賈君主之而直鄂兩督則交章荐君經濟特科可以知其所學矣任滬局三十年著述宏博由局刻發行者九種弦切對數表疇人家尤推絕作由家梓者十餘種如地震地球各論光重氣星各學算法量法代算通書一一徵諸實驗雖書未入蜀而其詰嗣志鴻君嫻於天算如虹君諳於理化皆由薪傳得者可想見其著作之精也賈君以垂暮之年勤學弗諉其傳書又彰彰如是以視梅氏殆亦後先輝映

者與蘇省故多鴻儒金山顧尚之金匱華蘅茅南滙顧金圃皆有述作可稱道惜少所寓目者即則梅升本亦僅識其名稱是亦株守敝廬者之憾事也如虹嘗謂余曰家君夙精製造天學所需儀器若望遠鏡若經緯儀子午儀若借地平指南針若風雨表若寒暑表下逮天文鏡龍骨水車打米機器足踏船出其緒餘均足利用而厚生故其所著書咸有實濟無虛論者余聽其言因以述其崖略弁諸簡首幸如虹郵取一編開我耄慧俾得仰觀俯察不至爲管窺蠡測也則逢人說項矣

補修分水大道記

萬梁爲東川陟省通道上自達官下迄細民輿馬箠笠之跡日千百計而分水一程石磴盤紆履之若一蓋達康達莊者也丙午仲夏暑雨霖大坪山崩墜石三百餘丈橫阻坡坳塌斃行旅者十數而通道以塞越逾險阻行者阻之邑侯汪公漱白以平易道路爲司空之職亦卽有司之事也自輸俸糈爲倡並募官商紳富集貲若干數檄本甲紳首某某董其役旣修復故道復關潤溪東水以避衝激於是百里遐程相循而治鈎梯連棧直達城西以今視昔王道益徵蕩平矣是役也鳩工十千歷日二百費白銀八百有奇半輸自樂善者應列銜名如左方

何母秦太恭人墓表

忠州望族何爲最其登甲科者曰何君榮楠余十年前寅交也一日以書來告曰先母歿葬十六年季弟立祠塚旁楠卽伐渝州峽石爲碑以待誌墓者齡衰宦薄事久弗遂楠茲恫焉唯素心人表之於是章與何君別五年矣

時何君教授潼川兼督本州中學余亦以嘉定教授監中學於籍縣縣故有母氏墓葬二十餘歲始乞銘於范君叔柎今何君治太恭人墓其待銘者亦一紀焉何吾人兩人契同官同事同卽表彰前德亦無不同耶余旣痛吾母氏之久湮不獲早光泉壤而良朋之囑顯其親者又遜謝弗遑以塞人仁孝之意是自外於錫類而使吾友長抱隱憂也其烏可以不文辭謹按太恭人氏秦誥贈朝議大夫曉垣公嫡配也誕生之夕父豁然公夢老人遺黃袱書曰曾元養曾子曾子養曾哲噫異已由是生而誠篤奉親思孝于歸後時惕惕有畏懼心以謂翁姑不憚必違夫子禮法不謹何恤人言故其爲婦也祖姑悅之繼祖姑安之翁姑尤愛而憐之此何爲者畏懼故也守畏懼而不失用能相戒相諭以垂爲家法是時翁姑習勤太恭人善承志井曰紡績場圃之事無日以逸甚或嚴霜烈日猶鋤笠於蔗畦棉壤間此非曾子養志意耶惟其養志斯相夫之敬治家之約濟族之周調治夫弟之勤劬使夫弟臨歿猶作叩謝狀者皆統於一孝中家乘所載不覩縷矣獨念朝議公歿時伯子尙旅京師仲叔季咸稚齒家藏典籍兵燹後無復存者書香之斷續千鈞一髮非有母道兼父與師者安得丸熊畫荻俾芝蘭玉樹聯翩以貢王廷耶且不唯撥科登第而已何出膺民社者皆卓卓有聲耶是又黃袱書之默相者也今夫對青燈讀黃卷者事理非不通達也一行作吏而志氣昏惰矣戕大冠拖長紳者器局非不宏遠也日坐堂皇而譏趣卑陋矣而何氏三鳳獨以通儒爲循良豈非受家庭教育者素耶聞太恭人嘗訓諸子曰汝等學古入官須知內官宜作御史能言天下利病外官宜作州縣能平百姓曲直若輩不憂樂天下而局於州縣抑知訟棍勝於盜賊乎盜

賊之害在一時訟棍之害貽後世之數語者當世達官貴人所不能言而巾幗能道之豈不賢於印纓綬者哉
宜乎諸子之善承母教而移孝以作忠也太恭人生於某年月日卒於某年月日葬於某溪之阡子四榮樹順天
舉人河南尉氏縣知縣榮樟癸酉選貢廣東恩平縣知縣榮楠庚辰進士安徽望江縣知縣榮樞廩生光祿寺署
正銜以諸子貴累封太恭人女四孫十五爾焜湖北府經歷爾昌湖北巡檢爾照湖南知縣爾灯癸卯舉人度支
部主事曾孫十五福均廩生元孫二一堂四代簪笏滿床皆太恭人所發育者庸有艾焉與

州同銜左聘三暨德配六十壽序

左於萬爲著族其居距縣西百里道咸時有以善士名一鄉者曰德芳未之見也見其二道河橋碑題名而已德
芳之冢子曰洪綸嘗治巖務梁萬間曾與一覲其季弟掄元公則吾李月齋師高足也師嘗稱掄元公盛德有德
芳公遺範蓋積厚而流光者咸豐癸丑從師一宿其家質簡高潔儼然先民矩矱然逮今忽忽五十年矣流光如
逝故舊淪落卽吾師清裔亦惟尾仙僅存而淪元公家聲隆隆突過疇昔非盛德美報哉乙巳六月公哲嗣聘三
司李六秩誕辰其猶壻陳君璠笙函余紀文爲壽璠笙之言曰聘三公奉親竭力甚得歡心歿之日小祥猶禁暈
酒時賢以爲難仲弟春亭公敏達多材惜早世不盡其用遺子女六人男公教養婚嫁如已子壽山者春亭公出
也材略肖其先人而潔已奉公尤鄉閭所推重非稟承公教然與公以舊家子習勤居儉倉儲益饒曩者取禾三
百今稽田五增其數漢世所稱萬石君詎足異與公之族繁矣雀鼠競爭時賴調協貧困者尤資給焉若里人紛

難亦必待公言以解又魯仲連之流亞也邇者學堂之費平糶之局道途津梁之義舉無一不藉資殷實公固熱心施與者而德配陳安人復遇事佐助之以是鄉評益無間言瑤笙之言如此余曰此足以壽公矣夫天道福善若福善而不增人以壽人亦孰與爲善者今聘三公以善繼善天福而壽之亦復何疑而吾獨念德芳公之遺澤掄元公之盛德何其延於累世者若是綿綿也於戲懿矣

方炳南紹廉種菊軒畫譜叙

畫通於詩詩料皆畫料也孔門詔小子學詩曰多識於鳥獸草木之名夫名何由多識哉不辨其物安知其名不明其象安辨其物然不解繪畫又烏知其名與象也草之有根葉也木之有枝幹也草木之有華實也不習見者不悉也驗之繪畫而燎然矣鳥之有羽翼也獸之有革毛也鳥獸之有爪牙也不習聞者不曉也徵諸繪畫而豁然矣然而曲直之性向背之形馴猛之容飛走之勢非揣摩盡致體驗入微者亦不能惟妙惟肖使人心曠而神怡此豈非畫中有詩乎炳南方先生以畫名於高梁聞之稔矣今讀其畫譜皆以鳥獸草木之圖教授官校學子者毋亦使學畫者兼學詩與顧學科之畫多用鉛筆爲測量計繪事之畫主用毛筆爲寫生計其法雖殊其理則一會心人自領取耳吾寅友楊建屏裕勳君主課忠州中校圖畫亦用毛筆爲傳習楊固與先生齊名者使各以其心法授之學者則禹鼎所鑄山海經所紀草木鳥獸之名皆可窮形而盡象矣豈第三百篇之留遺哉

開縣鄔宗顯墓誌銘

公諱從周字宗顯姓鄒氏江西建昌人也建昌距南昌爲近明季有南昌鄒高字時升者作宰安定政聲隆隆爲時標艷公其族裔耶不億述也以乾隆己丑偕里人陳君利川市藥材入蜀合資於雲陽之高陽鎮管居鮑積家賴以康而同心之言竟要以同死同穴後如其約於戲古矣公歿葬高陽鎮嗣君宏佐宏遠世繼其業不隕其名慕鄰境開縣之厚俗而遷居焉傳代五子孫益繁昌乃誌公爲始遷祖於是建昌南城遂繼別爲漢豐鄒氏夫人有雄才偉略能舉百產之消息盈虛靜觀時變而足不出庭戶亦無由發抒其精神惟弧矢四方於其所游歷之區慎擇美術有足以濟世而活人者手創艱難以爲百年繼繼承承之計則貽孫翼子使其源彌遠而流彌長此大丈夫不得志於時者之所爲亦卽近世泰西諸國人之長技未可以闔閭輕也今公以藥籠中物世其家而椒聊之實乃繁衍碩大如是豈非慎擇美術厚蓄其隱德以餉遺後人者耶不然何以嗣以續能易買服爲搢紳也公生於乾隆壬戌歿於乾隆某甲子墓於高陽北山享壽幾十有幾配謝氏生子二宏佐宏遠孫七兆瑞兆祥兆慶兆吉兆雲兆煜兆煊曾孫五以成以德以儀以潤元孫八開第開紫開熙開祥開俊開藩開鈞開櫬來孫五登嶽登雲登壽登序登庸開祥爲開縣增廣生員開鈞卽今之服官直隸者鈞夙承先志慮斯墓之遠而或遺也述其始遷崖路由津門郵寄漢嘉乞誌銘以表墓鄒氏昌大其未艾也與銘曰

一木之植而株幹峻發一泉之出而派流旁達物本乎天者生不札人本乎祖者嗣無乏公不宗於贛而祖於蜀遷地爲良兮阜其族高陽有一畝之宮於斯歌亦於斯哭友死無歸者曰於我殯陳君之合葬守以信古無聞而

今有北邙春色輝兩姓雲開接壤兮道邇且舒前人有墓今後人有廬歲時醮掃兮荒穢常除曰此入川之鼻祖也其世世子孫來勿疏

鍾餘慶積厚六十壽言

太史公列貨殖傳白圭樂觀時變而天下治生者主之販脂辱處也而雍伯千金賣漿小業也而張氏千萬倚頓用鹽鹽起郭縱治鐵亦富與王侯埒彼其穰穰熙熙居奇計贏何一非近今所謂商戰哉夫商之爲業一而二焉二而四焉與時俯仰誰不憑其心計與團團中爭衡而拙者常敗巧者常勝均是物也被占之而屢失此占之而屢得往往所持在一日一時之計所差在一毫一忽之微使非智慮精核遠矚高瞻必不能十億而九中而生不逢辰則又蹉躓跌跌雖豪傑之士亦不盡如願違償此其中有運數焉未可以人力強也而晚成之器又若有操券而獲者則於吾友餘慶鍾君見之君吾鄉人也少相知長相暌晚乃遇於漢嘉吾司郡鐸君業郡商於是晨夕過從得其生平所經履者甚悉方君成童時大父猶業菽粉噉噉數口家無甌石之儲君乃廢書習賈謀生計肆貿於粟塵銖市間壓線年年鬱鬱不得志善士陳眉生知其賢也使運蘇湖木綿庄售於嘉陽古郡時逾一紀迄無大獲乃結戛眉張君鏡湖游滬上冀開拓其胸襟眼界以與豪商俊賈爭一日之能而歸途偃蹇爲水神所厄一險於青岩子再危於觀音背身世艱難萬念灰枯不復作陶朱想矣張君曰吾視君險難已脫自此當入佳境君若力怯吾以鉅金佐之由是十年管鮑而綿紗白蠟之利月盛日新大致厚實以視前此之抑塞拓落殆不啻

天淵別矣今夫人棄我取之說童則習之糴賤販貴之事長亦安焉君以握筭之術游五都之市者垂五十年其沉幾觀變豈復有一物之或遺一事之或疎者而昔也用此術而逆今也用此術而順豈非時有亨屯運有蚤暮桃李之先零不如松柏之晚青耶而君既收效桑榆尤能知止知足有鳥盡弓藏之意則又加人一等者也素亦急公好義以助餉功叙職藍翎知縣子二永錫永柱永錫分號重慶永柱分號新都之太平場皆各樹一幟能繼述前徽者今年夏君六秩晉五誕辰親友製錦爲壽囑余一言爲叙其崖略俾知君之由塞而通者其來有自至君子偕老之章富壽多男之祝皆吾鄉人所誦禱不置者固不俟余之覲縷也

致左逸仙刑部書

某聞舉不避親賢能荐士二者相需以有成也昔孔北海薦禰正平蕭揚州薦琅琊王暕人材殊趣愛士則均伏維閣下公廉仁恕容納庶類拔植末學往者王敬之嗣郎備職釐局稻梁資賴扶搖之力人所聞知某竊不諒敬有所請舍從弟某年三十餘命與時仇身遭貧寢筆耕爲養備書成學置之錐囊尙非脫穎之才授以竹書可無落簡之謬聞釐局趙侯與君有素委務殷繁繕寫需人尙祈塵諸荐牘備之餘論夫汗池戩翼借翰於步廬坳牧垂耳假足於鞶鞞使荊州不負白之託許武自成弟之名瞻望惠施無殊身受唯賢者察納

會經館文鈔卷之三

三八

會經館文鈔三卷終

畚經館駢體文鈔一卷

畚經館駢體文鈔目錄

程猷軒姻丈六十壽序

杜母楊恭人六秩壽序

舅母王母左太安人七十壽序

前題

程任之太學六十壽序

程母彭孺人六秩壽序

熊集成姻伯雙壽暨季嗣榮冠帳詞

募賻羅樹生明經啟

誅劉紀三鄉解

金經館駢體文鈔 目錄

畚經館駢體文鈔卷之一

萬縣杜煥章成軒著

程猷軒姻丈六十壽序

辛盤荐歲三朝纔賀元辰卯酒延齡萬象宏開壽宇寫太平之景物燈火樓臺集盛時之衣冠笙歌院落維時飛花處處爆竹聲聲西山曉而南浦晴東郭錦而北城繡走馬則嫣紅十里聽鶯則軟翠六街郝大通攬揆之辰無茲麗景白太傅耆英之會有此華年此所爲春臺共登壽人不老者也程公猷軒姻丈以歲星在巳之年爲芳算週甲之日樞曠之心未已背齡之髮猶新人謂矍鑠哉翁生當文明之世瓊筵旣敞暇祝宜申爰製相州之錦屏特囑張老爲善頌今夫朔桃安棗何關五福之徵宋豔班香徒濫三多之祝使觀型其無述雖揆藻而皆夸公則詩禮名家簪纓華胄睢州官績遠祖早祀鄉賢蜀國科名近宗濟登蕊榜逮錫光於奔葉益衍派於蕃椒蠅利興家步雲公無執袴之習燕謀篤祐起飛公有孝友之思而公善繼前人孔懷天顯壘篋之奏無間於晨昏棣萼之輝倍光於遲暮元方不祀繼子而後難兄白眉最良同居而依愛弟以視煮豆燃箕之詠尺布斗粟之謠直如境隔天淵奚止床分上下所以王謝子弟亦留純謹之風伊洛家聲不愧先賢之裔且夫席豐厚者易即驕奢喜居積者或成鄙嗇衣租食稅誰弗更晏子之裘累黍積銖詎肯貸陳氏之粟公處已恒約利人則周濟臘之局倡之

於早歲寒衣之會被之於窮簷綠粥道旁餉者爲哀王孫而進青錢囊底受者不知誰氏之施而且排難解紛魯仲連誠爲高義礪隅敦品澹臺氏洵爲端人但舉一節之長無非壽相況兼諸福之備何異德星晚與賢阮締交素識荊州芳概景松喬之在望不禁心傾梓里以揚徽非同耳食酌鸞北斗吹鳳南津程門之雪初晴臣甫之詩再拜自愧江郎才退祝釐少夢筆之花却欣李白園開陪宴當游春之序

杜母楊恭人六秩壽序

一陽應律寒回暖谷之天片語乞年春盎生花之管瞻繁星於北斗須髮凝輝挹爽氣於西山罔陵啟頌龍井之源不涸魯池之詠常新則見白巖曉晴翠屏晚秀都歷積雪爭飛益壽之花岑洞流泉盡釀延齡之酒望杜陵而開廣厦冠蓋連雲祝壽母而燕魯侯藻芬垂露不有麗駢之製奚揚聖善之徽如我杜母楊恭人者誠芳閭之名媛實粉閨之令望綜厥懿美可藉言宣溯容華攬揆之年正楊寶獲環之日宏農望族那無詠絮之才京兆名門因有結褵之契拜廟而尊章色喜入門而梁孟情投維時某公以積善之家興懷餘慶峙三公以單丁之裔屬望多男恭人怡志承顏合敬同愛翡翠之巢方穩熊羆之夢思占於是江圯明恩葛樛示惠交柯玉樹總分連理之香並蒂金蓮已見側生之果今夫智不沈者見難遠德不大者量無容寄意於螟蛉何如護胎龍之馬並棲於鸞鳳奚爲逞人彘之雄古無療妬之方世有郊禱之誤豈知稷契同生帝胄仍重慶都曹滕未別天潢誰忘文母果貽謀於燕翼胡分氣於蠡斯而恭人情殷代李夢讓徵蘭但慰厖絲椒衍之心不改琴瑟鼓鐘之樂是以長君謙

甫以茂才而進秩郎官仲子雲笙由太學而增階典籍既紹前人之緒益揚阿母之聲雖安富尊榮不必母由子貴而顯揚褒大何如情以分崇此固鄉曲之美談抑亦藝林所樂道至若持躬有禮御下以寬服三澣之衣富而能儉荷五花之誥貴亦不驕受田者被其賑獨托鉢者蒙其康濟相夫教子無非闡澤之流蹈德詠仁宜有康強之吉今者萊臺獻壽花甲周釐坤應地而恒貞祿自天而永保歡騰子舍集簪笏於滿床秀茁孫枝植琅玕而繞砌此日金萱堂裏箕疇陳五福之休他年武庫門前帝賚進九齡之祝

舅母王母左太安人七十壽序

夫使揚風挖雅徵魯侯壽母之詩鏤月裁雲製唐山夫人之奏則東方侈語浪稱桃實三千西母遐齡艷說菊觴九百揆藻而鋪張鑿說拈毫而鏗耀瓊璣雖復貢媚岡陵無益於闔閭增輝屏障何與於坤儀因知金松綺柏之詞翠鳳青鸞之祝從其諛焉抑亦未已惟我舅母王母左太安人者乃黼廷母舅之德配而式九表兄之賢母也幼嫻壺教老樹閨型蘭幃悉奉師承梓里久崇佛號諸親以戊寅冬仲爲七十誕辰玳瑁梁高則漆金額字琉璃壁敞則丹錦摛華自慙宅相魏舒難爲善頌張老敢舉生平所佩服者以彰聖善之微猷焉今夫桃天之什務宜其室家棗梨之脩先見於姑舅彼鷄鳴侍寢手作羹湯魚躍疏泉躬操井臼僅循分以勤婦職詎養志而得親心矧堂上衰翁已傷盲左閨中嫠姊並泣湘妃外孫餘釐白之思老人多萬瓜之庇承顏怡意不亦難乎安人則鳩杖承歡烏屋推愛草香南國解屈平之重女嬃暨乞東山留羊曇以依謝傳懿親兩姓眷屬一家人謂無芥蒂之

嫌吾知慰椿萱之意其不可及者一也既而琴瑟靜好棋硯常親機杼之聲伴書燈於雪夜桑落之酒佐文會於賓筵謝道韞能解議圍桓少君無慚內助惟是黼廷公天性切直家政嚴明如大帥之行軍風馳電掣比法官之治獄望重威尊鄭婢不敢嘲詩蕭奴爲之束禮安人婉容相遇唾面自甘常操柔道而行靡不怡顏以解使非寓賢於德斂貞爲和未必含飴弄孫之時無間相敬如賓之意其不可及者二也或謂殷富之家驕淫易起執袴之習揮霍爲多石季倫片刻千金劉青州一擲百萬縱安人力持風會恐哲嗣易蹈雷同然而儉樸者室家之肥也奢靡者後人之蠹也敬姜之論勞逸意在防淫王母之倚門閭情殷誠子是以雙麟膝下莫不立鶴雞羣會之雖作陳人早騰聲於夔序式九今成司李更允協乎鄉評而子木長孫彬彬儒者贊勳諸季藹藹吉人家無蕩子之吟世守先民之矩惟式九能承母教故後輩咸遵惟安人克振家聲故儒風不改及不可及者三也或又謂人非聖仁難言博濟婦無公事疇問解推任姒徽音豈在脫簪賑餓郝鍾禮法未聞貸粟指困不知樂善者必好施修德者常惜福安人本現身之說法爲濟世之婆心服練方殷而望授衣者三族殺牲有戒而待舉火者千家推愛獨庇乎孤寒徼福不祈於神鬼所以心齋繡佛從未拈古刹之香手飯活人並不參檀越之號惟念田家辛苦陰貸釜鍾凶歲旱乾時空倉庾扇和風者不遺黍穀祈甘露者樂拜蓮臺而功不自矜善無須伐好花開而鼓聲息時雨過而雲影銷其不可及者四也至若岳峻持躬海涵爲量納瓶於守口鍊冶於操心木屑竹頭天物未暴僕雙姬啞聲色弗加考諸五福之徵無非壽相矧有四德之應宜備榮施以今七秩誕期得援例誥封六品安人九

天綸絳標桐內之芳徽三祝華嵩聚房中之雅管某穉齡寄讀樾蔭夙叨碧草叢生未忘情於雨露青氈如舊莫
申報於瓊瑤聊陳葑菲之詞權佐萊班之舞所願慈雲久庇寶月常圓冬至爲一陽之生古稀卽百齡之券則涓
陽車馬未必輝萱草之堂阿士文章尙堪證菩提之樹

前題

代程洪右賀星沅作

梅花釀雪之天冠蓋連雲之里人愛冬日客坐春風我外姑王母左太安人以康福之年晉古稀之算於時譜房
中之奏躋堂者稱兕而來誦壽母之詩扶杖者刻鳩而導笙歌華黍舞斑萊南極雲開爭騰輝於寶婺北堂春
永喜篤祜於靈萱值子舍之傳觴偕婿鄉而製錦雅歌特介嵩祝用申當夫玉勝徵祥聲絲謹度絮才起詠三都
詞賦之家桃實于歸兩晉烏衣之族椿萱無恙榛棗承歡佳耦曰妃而姻婭稱賢祥女入門而婢奴皆喜手潔盤
匱之奉躬操井臼之勞其相我黼廷外舅也出懋蘋蘩入調琴瑟門有車馬問餽酒於中閨田連陌阡責簿書於
內助是以袁公世德襄贊乃成文舉英雄箴規時有梁鴻聞望因孟德曜而益彰鮑氏家聲得桓少君而彌顯乃
猶媿媿善下踏踏忘勞春服既成則葛覃三什冬儲預勉則寒菜一畦鴛鴦警添線之功鸞刀奏代庖之技用是
賢能並著福德齊臻協卜在鳳凰飛時發祥於熊羆夢裏二難競爽不數驥子龍文上美爲元爭羨金昆玉友長
君年逾弱冠漢廷已舉茂才次郎名重成均唐代猶推司李人言無間母教爲多兼之繞膝孫曾羅一堂於四代
揚徽綸絳捧雙誥於九天而安人方受寵若驚履豐如素慈悲戒殺齋心選佛之場鍾釜言施量米唱籌之會田

間水旱待澤尤殷門外飢寒乞膏殆徧貴而能儉有班姑四德之箴富不自私讖晏嬰三族之意凡所以利人濟物厚族卹鄰者靡不仁粟先供義囊弗吝遂使夫人林下樹德而譽滿東川豈但慈母春暉蔭草而香溢南浦某等誼切舊姻情殷半子階前拜母曾坦腹於東床簾外持觴將開筵於北海愧乏截金之句藉揚蘊玉之輝所望樹茂恒春花繁益壽永綏福祿之日長留功德之雲山培壤而岳增高海有源而流滋大他年歌廣百歲更有雕瓊鏤玉之篇此日詩誦九如權當銘柏頌椒之製

程任之太學六十壽序

夫饜甘飫肥者不足與識太羹之遺味嘈絲雜管者不足與論太古之元音今世侈靡相矜浮華成習角逐於轂輪之會神迷於冠帶之場而夕秀未榮朝華已謝螢光電火固其宜焉若我任之先生者殆不爭桃李之顏而能延松柏之秀者也經橫早歲能讀墳典索邱望重詞壇不數王楊盧駱既童軍之屢冠翻國子以揚聲遂乃水淡名場火觀世態武城之室無澹臺子羽之蹤吳市之偏有梅福神仙之隱晏裘示儉陶甓習勤望者疑古處之衣冠識者重老成之型典兼以鹿車手挽鴻案眉齊雖食稅衣租而不驕人以富雖調危賑困而常損己之餘故作善不求名亦得賢由內助已今者梅條初動花甲剛週蘭孫之秀一莖桂子之芳四蕊錫光篤慶知庭槐之垂蔭者多偕老齊年冀大椿之發榮更遠

程母彭孺人六秩壽序

中秋月滿才開玉宇之祥函夏風清請紀璇閨之瑞敞瑤池於西極鳥使遙臨纒寶婺於南垣辟芒熒燿則有伊川舊族洛水名媛宅倚天城之山城開不夜慶逢花甲之歲甲註長生簪纓之冑偕來巾幗之英畢集蟠桃入座艷稱王母春秋麟醮開尊不借麻姑指爪用徵休於令誕并志喜於覃恩如我旌表節孝程母彭太孺人者固海嶼先生之德配而雪濤茂才之賢母也當其及笄甫字敬懿如賓桓少君之高風鹿車共挽孟德曜之懿範鴻椀長齊方謂四德無違百年偕老矣而乃結褵伊始未逾改火之期破鏡難圓忽罹飲冰之痛欲相從於地下投井奚裨日飲泣於閨中返魂何術於是恩將義割節以孝兼奉黔婁之親未忘寢膳續伯道之祀妙有權宜劉孺則猶是嬰兒敬姜已無慙母道惟螟蛉之無異遂雛鳳之有成是以雪濤嗣君育爲魚泉俊彥干城託咏本折衝禦侮之材鬢序蜚聲實文物衣冠之選而且孫曾滿眼蘭桂愜心習儒術者不廢弦歌作賈人者日勤莞算一堂四代皆奉命於高年三族九宗尤景行於閩教此固壽人之相也抑亦福蔭之徵也今夫桃李之顏逢春易暮柳蒲之質望秋先零雖花蕊之爭榮無本根之能固而蒼松翠柏歷盤錯而彌貞良玉堅金經磨礱而不毀豈非遇以濃者榮華易謝守以淡者精氣長留乎孺人以守貞抱淑之姿養茂祉延禧之體靈源早裕一千尺井水不波寸草長春六十年堂護可樹蘭有膏而馨香自烈花不言而遲暮益芳有水雪以增齡無鉛華之損性坤貞永固不信然歟今者寵荷恩綸榮邀旌典頭銜錫慶用增綺閣之輝耳順延釐更篤華堂之祐繡星妃於寶帳華祝齊廣蔽雲母之屏風萊斑競舞此日徽揚彤管榮名膺兩字之褒他年算比青松上壽稱百年之慶

熊集成姻伯雙壽暨季嗣榮冠帳詞

老人星見聯寶婺以開祥壽者相成賀錦堂而著代惟其篤琴瑟之好綿弓冶之傳是以鴻案齊年有君子偕老之意鯉庭裕後來好逑淑女之賡福祿永綏固其宜已惟我能太姻翁安鄉舊族荆楚名宗髫齡解讀其父書壯志不爭夫宦隱經卷琴囊之際杖履優游邱山林壑之餘烟雲供養德配曾孺人珩璜表德圭璧飭躬人稱內助之賢家有陰行之善茲值懸弧令誕設悅良辰中秋之寶月猶圓大德之春華不老徵純嘏於天錫黃髮增齡祝多男於華封白眉及冠試聽蟠桃會上承歡雜苕菜之歌還看玉鏡臺邊脩贊上椿萱之壽

募賻羅樹生明經啟

夫窮愁托歛殊慙面目可憎措大操文尤覺語言無味然而素車白馬猶修拜墓之儀葛帳練裙豈乏故交之郵生前裹飯歿後指困未免有情能無相挽吾邑羅君樹生幼而文秀世爲禮宗采泮水之芹香分貢樹著梧軒之草名艷詩葩才華則刻燭成文人品如大圭不琢武城之室無澹臺子羽之蹤栗里之偏有靖節先生之隱視彼侯門托足豈徒白眼相看如公斗室銘心祇覺丹鉛可好而乃身遭貧寢命與愁謀顏子一簞空傳賢於東魯長卿四壁誰獻賦於西京於是空冀北而授徒不復指終南爲捷徑天城風月長此隱淪講席星霜修焉老病命之窮也天可必乎今者人歸道山家如逝水遽伯玉行年六十已爲坐化之期孟嘗君食客三千無復可追之債聽華州之哭杞妻無奈猶存訪世族之孤趙武可憐方幼蓋棺而幾不能葬盡室亦何以爲生所望瓜葛懿親芝蘭

故舊不吝傾囊之助稍抒懸馨之憂或千萬以相資貨財爲禮商二三之知已積腋成裘數核其成卽以存諸殷實歲則有息藉以贍其子孫俾生者不垂涕於道旁庶亡者可瞑目於地下存歿銜感惠澤靡涯如賜隆儀請登素版謹啟

誄劉紀三鄉解 爲程少峒作

江深南浦恨添才子之愁月落西山星黯少微之彩乘素驟而仙去曼卿忽主蓉城跨仙鶴以宵還子晉終歸緜嶺文人不壽自昔已然名士堪傷於今爲烈憶親翁顯名之日正安鄉發軔之初榜占龍頭閱百八年而再見樓操鳳手計卅七歲而始光春明之路未通秋夢之情亦惱然而關西夫子不厭苜蓿之餐江左夷吾特引蓮花之幕月輪課士憑玉尺以量才雨化及人仗金鍼而迪教文峯餐而蓮峯館巫峽清而巫山高識者歎明復之才名觀者驚仲塗之聞望固宜傳經槐市允爲後學津梁介壽椿林盡在先生杖履矣而乃甘井易竭梁木先摧薤露之歌不收聲於故里楊風之痛偏拊膺於老成此卽桑梓情親猶鵬賦況乎葭莖誼切曷禁驢悲愧豚犬之無知此日而謬承楣選冀龍鸞之學步他年而難望薪傳有淚沾襟拜素帷其伏地無緣覲面仰白雲之在霄

畚經館聯語一卷

畚經館聯語目錄

輓熊繼謀

輓王會之中表

哭朱熙臺師

哭母舅王黼廷

羅敬之移居

輓劉紀三鄉解

輓王式九中表

輓杜母易太君

鎮江閣三

輓外姑彭母王太君

胡生年春完婚

壽心泉叔父

甯經館聯語目錄

輓范孝與三

輓周西垣

輓王保卿司馬二

銅梁縣學署春聯九

壽黎蕪齋觀察

壽陳子臧明府

土橋場三聖祠二

輓雲生族叔

范叔柵明府續絃

壽魏寶珊廣文

壽朱少英

冷秀山新宅門聯

黔南宮

禹廟

集禊帖九

佛寺鋪節孝總坊二

輓王升甫范廉三

輓范雲吉比部

輓程誠齋

輓程藻廷

輓胡封翁

送何勉之明府之任蓬溪

衛氏宗祠門聯

輓路訪巖邑宰繼室

壽陳眉生封君

劉氏宗祠門聯

壽竇子固母

輓何符九母

富經館聯語目錄

壽慶益生母

澹園春聯

輓陳封翁

趙次珊行館二

畚經館聯語卷之一

萬縣杜煥章成軒著

輓熊繼謀

少壯歡娛老大悲亦義俠亦情豪世態如雲十年可堪回首
知交零落故人盡忽生離忽死別塵緣若夢古來同此傷心

輓王會之中表

壽骨與君同豈意獨留程德孺

首句用子瞻詩

知心惟我在不忍重哭王子安

哭朱熙臺師

先生繫風俗醇澆邑難初平共賴老成維士習
此日是斯文絕續大雅不作誰從正學起吾衰

哭母舅王黼廷

弱歲感親情孟有母趙方孤如草附松難忘澤露

畚經館聯語卷之一

頻年傷老輩謝家墅甯氏宅猶今視昔哭望溪山

羅敬之移居 代族弟謙甫撰

北山楊柳陶潛宅

東郭琴尊謝傅游

輓劉紀三鄉解

才名太累人徐孺何心連年苦下陳蕃榻

道義誠知己王陽無命異日誰彈貢禹冠

輓王式九中表 代劉敦山撰

七賢圖阮嘯稽狂畫筆初成君已逝

萬斛坪花天酒地舊游追念我何堪

輓杜母易太君 代朱綏甫撰

一病經年愧坦腹東床難從王母乞靈藥

五旬歿世想飯心南海去洩觀音脫劫灰

鎮江閣 代游德菴撰
末聯自題

三千里奠定江流蛾眉捲浪象鼻分風鼓閣鐘樓山有主正殿

二十年重新廟貌東閣橫雲南屏帶雨金戈鐵馬神之來

鐘鼓一聲喚起舟中人共濟閣頂

樓臺百尺挽回江上水旋流

岷江東下新瞻樓閣崢嶸願神力普施永鎮巴瀾通蜀楚

瀛海西歸收拾山川靈秀幸鄉邦攬勝恍從吳會瞰金焦

輓外姪彭母王太君

病豈無因憶疇昔兒女傷心可憐一歲一死苦

歿若預料到今日佛天證果難忘三藐三菩提

胡生年春完婚 尊五次子

蘇瓌有子駒千里

敬仲占婚鳳百年

壽心泉叔父

後十年而生我亦占著逢大衍

先五日作壽公當簪菊醉重陽

輓范孝輿 末聯代劉敦山撰

我從薊北言歸離合無端刻骨未忘蘭臭語

君去粵西不果憂勞損壽到頭難遂板輿心

京華聚首無多大邑新加先憂後樂都成幻

海內知心有幾斯人不壽共濟同舟更向誰

四海若論交劉伶舊忝同心友

一官忽歸輓范巨今無聚首時

輓周西垣

大府荐賢能未許文翁終教授

良朋規道義那堪茂叔作陳人

輓王保卿司馬

王恕有樓山集保卿亦
有榕莊詩鈔首聯指此

湘水無情斷送靈輿還梓里

樓山誰嗣幸留遺稿在榕莊

魂兮歸來乎湘水重遊空了一場春夢
死者長已矣巴山舊話難忘八載神交

銅梁縣學署春聯

儀起叔孫通終煩魯國諸生訂儀門

門開程教授定許游楊二子來

不覺春風又來看落落榜花紅迎案上大堂

愧無時雨之化偏離原草綠到階前

非無案牘之勞兵刑不問大堂

偶坐堂皇而理名教爲多

鹿逐少年場奪錦歸來鏡裏白頭還自笑

儀門是年中式

龍鐘文學掾

陳昌曰雅極且爲人誦之

據鞍顧盼春明青眼慮人看

竹簡益新使楊雄載酒問奇下風甘拜二門

桃符又換縱陶侃惜陰勵志去日苦多

官似鄭廣文繫馬祇餘階上下大堂

禽經館聯語卷之一

學無楊伯起啣鱸猶望雀飛來

十八年桃李門牆愧與游楊論道大門

一千里嘉峩山水再從坡穎讀書明年之嘉定任

木蓮爲誰開中朝近已停科舉六堂

桂樹原親種嘉植應知念故人

薄官豐不佳奈靖節先生行將歸去二門

斯文猶未喪望胡瑗弟子翊贊中興

壽黎蕤齋庶昌觀察

著書十萬言度我金鍼開後起

赴闕七千里錫公玉斧贊中興

壽陳子臧明府

美政誰儔分符齊讓太邱長杜工部美姚公詩意

重陽高會采菊來延彭祖年魏文帝致鍾繇書意

土橋場三聖祠

號錫帝君師異名同祀

祥鍾梁覓翼三聖一堂

一卷春秋作者讀者俱成聖

千年文教主之輔之幸同堂

輓雲生族叔

天道何知荒政誰復監白粥

吾宗不幸襄陽今又哭黃州

范叔柵明府續絃

木天移到金蓮炬

花縣裝成玉鏡臺

壽魏寶珊廣文

代門人何燦章擬

文貞

魏徵

本經世長才馬帳韜光尙仰昌黎如北斗

安定胡瑗有景行弟子鱣堂介壽莫教疏廣去東都

壽朱少英

代吳紹青擬

趙充國以湟中屯田見重

謝安石為桓溫司馬之年

冷秀山新宅門聯

詩禮舊傳家不藉名秀水仙仙冷常熟御史冷光

園林新啟宇長飽看嶠嶮山色宅左明月湖光湖旁

黔南宮宮為貴州會館祀南 霧雲將軍以顯應故

將軍本洛下奇英古筑艷傳聞乃有唐代孤臣顯靈異地

廟祭為黔南社會巴川隆特享不徒睢陽祀典配食雙忠睢陽雙忠廟祀張巡許遠南霽雲

禹廟

王本石紐村人蜀水既平千載粉榆崇廟祀

我亦襄陽郡裔楚宮再作兩湖社酒話鄉山

集禊帖選錄

坐叙諸賢由也長

人為清品惠之和

以竹爲懷猶氣管

無弦之曲是情絲

萬死一生爲老將

有知無遇是文人

年陳大有未云樂

生喻之無合是賢

與化同遊觀自在

坐修不老陰長生

一品夫人欣誕日

九年內相快生期

得趣每當無事日

放懷尤託有情天

當亭一覽萬山盡

有竹咸懷九日遊

和氣初生爲日至

羣山當向是天長

佛寺鋪節孝總坊

宣統元年重
建在縣西

前功亦生鐵鑄成十八封姨偏能妬

勁節以貞珉扶起三百名媛再有光

此地有駟馬高車來題楹柱

其人與鄉賢名宦並列祠堂

輓王升甫孝廉

憑素車白馬中歸乎憐君書劍京門辛苦一官成泡影

有經濟文章者鮮矣嗟我風雲壯志淒涼五夜作灰枯

誰教地下修文情戀燕京四月獨遲宣室詔代人撰

賴有季方繼武魂歸蜀道一棺仍載孝廉船

單父具長材黃綬將膺一夕琴聲銷窈子代勳臺從弟撰

陸郎稱貴冑烏衣共把十年姻姪愧蕭嵩

輓范雲吉比部

濟時正需才中外交章帝命郎官參帷幄
報纘初授郡東南多故天教揆帥失股肱

輓程誠齋

編交仰德門聯袂登堂坐我春風聞鯉訓

攬揆懷佳節招魂介壽照人秋月祗蟾光

輓程藻廷

代從叔
心泉撰

小病遽招魂可憐少婦閨中割股難調不死藥

大宗仍繼嗣倘遇嚴親地下破顏應補貽謀詩

輓胡封翁

穆筠孝廉父代
陳生迪九撰

夔門時文筆三峯哲嗣篤生靈秀毓成丹桂籍

胡杲是香山九老令名不朽顯揚盼到紫泥封

送何勉之明府之任蓬溪

代陳眉
生撰

郇黍沛甘霖此行又作西山雨

召棠思遺愛舊治應留南浦雲

衛氏宗祠門聯

代衛崑山撰

先人來自黃州姬籙就湮宗祊未敢題康叔

祠宇開從綠野楚宮如舊抑戒還宜誦武公

輓路訪巖邑宰繼室

代陳眉生撰路之哀啟有
潔已愛民事親育子句

相夫子為潔已愛民之官名媛奚愧

念若人因仰事俯畜以歿賢宰何堪

壽陳眉生封君

大府亦知名可識善人天下少

齊民同祝壽居然生佛萬家看

劉氏宗祠門聯

代劉敦山撰

祠宇榜先塋舊治武陵欣有託

荆湖追故籍分支唐杜未離宗

壽竇子固母

子固時
宰銅梁

河陽滿縣花都是萱堂留美蔭

九日一尊酒應隨萊綵祝春暉

輓何符九母

符九時教
授重慶

臨江號巴國名區壽母揚徽有子齊登循吏傳

渝郡來胡爰教授春暉抱慟同寅怕誦蓼莪詩

壽廖益生母

益生時
宰銅梁

宜男慶多男諸子服官雲南一廣東
四川二四千餘里供祿米

衆母欣有母同寅祝緜八十一瓣頌梅花

澹園春聯

戊戌暫
寓於此

一園暫作行人館

十載重逢故里春左斗才曰
此聯極佳

輓陳封翁

世五
父

此邦不乏鄉先皓首榮封五福備徵公獨擅

令子已成顯宦青氈如舊六旬終養世尤稀

會經館聯語卷之一

趙次珊行館

孟代邑侯周
侯撰

好雨來時望望輜軒瞻葛相

仁風揚處家家團扇繡平原

燕寢清香凝畫戟

鶴琴旅夢促戎裝

會經館聯語全卷終

先大父遺集其文鈔二十一首曾爲遵義黎星使庶昌評

閱集中有上星使書是也覆書亡於兵燹不獲備錄丁卯

以徵集商品遇貴陽陳衡山矩世丈渝州輒話伯考笠菴

開州詩酒事且出黎題卷相示墨藩正合年來吾鄉名宿

強半捐館舍未睹斯集者尙有史子年錫永前輩謝石生

運麒告余曰劉適翁之文學與吾叔菑莊之詩學已不可

多觀吾儕當謹事之于時卓以遺集請較者五年不謀而

同若此曩備員圖書館程丈哲仙秉德數過我曰而忘乃

祖之遺集乎對曰唯未敢忘人事拘牽有志未逮故寄付

剞劂未就者又二年餘嘗憶直方譚丈詔我曰欲刻須全

蓮波陳丈曰依據務審乙青劉丈曰魚豕當去問竹劉丈

曰註字宜確他如陳世五昌左逸仙斗才諸前輩皆與先

大父結文字緣不減於二劉叟三敦山紀前輩今則隻字靡遺愧

忤何極傷已戊辰春索居海上與季舅韜菴適蓋翁仲子

漢舒鴻策妹倩陳友于篤覆較集事謹述所歷以見刊行

之未易會當藏之通邑大都善為護持則僕償前日之非

而文獻或可因以幸存乎孫士卓書

篇名	頁次	行別	字數	原文	正誤
五	二	二	二二	原文	一二
七	二	二	二二	有	而
八	七	二	三六	愛	受
八	一	四	二四	橫下字	振
九	六	二	二二	佛	斛
一〇	九	二	二九	赴	副
一三	一	四	三一	建	多一建字
一四	一	四	三一	潛	潛
一六	二	三	三三	有	以
一六	五	一	一一	迴	迴
一六	九	四	四三	閣	閣
一七	四	二	二三	巧	朽
一九	九	三	三八	脩塞	修塞
二一	四	四	四一	脩塞	修塞
二三	五	一	一九	析	折
二三	一	〇	二四	怙	怙
二四	一	二	二二	氣	氛
二七	二	三	三六	憾	憾
二七	五	二	二九	喻	諭
二九	一	〇	二一	明字下	少一經字
三七	一	〇	八	壁	壁
四〇	一	三	三一	太	大
四三	四	二	二二	法	治
四三	六	四	四二	庚	瘦
二	二	三	三三	桂字下	少一字字
六	五	三	三八	哀	線
六	九	三	三四	腸	腸
六	一	二	一四	森	生
七	六	二	二五	場	場
七	一	〇	一	場	場
八	一	五	八	場	場
一〇	九	八	五	初	初
一一	六	六	一	無一字	無一字
一四	一	四	一	迴字下	少一環字
一五	一	二	二三	樗	樗
一七	二	二	二二	技	披
一九	六	二	二九	又	又
二二	三	四	四三	懷	排橫
二二	二	二	二六	桶	桶
二三	六	二	二八	鄉	鄉
二七	六	三	三一	乘字下	少一青字
二九	一	三	三八	徒	徒
三〇	七	二	二九	場	場
三〇	九	一	一三	其	無其字
三〇	一	〇	三四	場	場
三一	七	一	一九	風	風
三二	一	三	一〇	末	末
三三	五	一	一〇	千	千
三五	五	一	一三	橋	橋
三六	二	七	七	鳥	鳥
三六	二	三	三二	筋	箕

篇名	頁次	行別	字數	原文	正誤
三七	八	一	一九	耄	耄
三八	一	四	九	會	會
四〇	五	三	八	椒	叔
四〇	六	一	八	彰	彰
四三	一	一	二一	於敵	敵於
四三	七	二	二一	場	場
四三	一	〇	三三	鋪	鋪
四三	一	二	三四	末	末
四四	一	四	四三	場	場
四四	四	一	一〇	鳥	鳥
四四	四	二	二〇	場	場
一	五	五	五	場	場
一	六	四	二	無即字	無即字
一	八	二	四二	場	場
二	七	三	三八	族親	親族
四	九	二	二三	護	獲
四	一	四	一八	然	無然字
五	三	四	一五	間	閒
六	八	一	八	子	壽
七	一	四	八	子	子
一〇	三	三	三五	傾之膏	傾膏火助之
一	三	三	三四	稍	待考
一四	一	四	三八	浩	治
二二	六	六	五	孝	孝
二二	六	四	四二	夔	夔
三二	一	一	一八	茅	芳
三二	七	三	三一	場	場
三三	二	一	四三	暈	暈
三四	五	四	四	紹廉	係夾注字
三四	一	二	一五	裕勳	係夾注字
三六	五	七	七	治	治
三七	四	三	三七	場	場
三七	九	二	二八	梁	梁
三	七	二	二八	梁	梁
四	八	一	二八	圮	汜
六	八	三	三二	及	其
六	一	〇	一〇	場	場
七	九	二	二四	也	無也字
八	四	三	三七	壁	壁
八	四	二	二	州	周
三	二	三	三	鋪	鋪
三	三	五	五	范	孝
五	一	一	一三	鐘	鐘
五	一	二	二	官	宜
六	六	二	一六	較	校
一	七	一	一八	較	校
二	四	一	二	蓋	蓋
二	五	一	二	較	校
二	六	八	八	通邑大都	通都大邑

右勘誤一百八十五如承校正集字請示萬縣重慶里八號杜赤仙收當於再版時改訂謹啓

上海图书馆藏书



A541 212 0021 4455B

印
證



出
版

遺集于中華民國十七年由
杜成德堂印贈同時託上海
中華書局科學儀器館寄售
酌收紙本費每部洋壹元
歡迎再版但以取得同意爲
限特告

